

IN TLEN OQUICHIUQUE IN TETIOTLATITLANILUAN DEN TOTECOHTZIN JESUCRISTO

In Itiotionaltzin Dios quipiya tlen hualuilohuas

1 Tlasohtli Teófilo, ihtech in tlen achto noamau onitlaato de nochin in tlamatli tlen Jesús opehualoc quimochihuiliya huan monextiliya.² Ijcon oquimochihuilito hasta in tonali queman otehuicaque ipan neliucac. Ihcuac ayamo otehuicaque, omoluitejqui in Jesús ica in Itiotionaltzin Dios, tlen quichihuasque in tetiotlatitlaniluan aquin oquintlapehpeniloc.³ Huan satepa ic omicohuac, oihxohuac huan omonextiloc Jesús iixpa in tetiotlatitlaniluan quen se tlacatl. Huan ipan ompohuali tonali miyacpa oquinyecmonextilohuaya ica miyac tlamatli tlen omochihuaco, mateitacan in tetiotlatitlaniluan nele oyolihuac Yehhuatzin. Huan oquinnonotzaloc ica quen in Dios tlatequiutilos ipan tlalticpactli.

⁴ Huan ihcuac inuan oilohuayaya, Jesús oquinmoluilic:

—Ahmo xquisacan Jerusalén. Maquichiyacan mapano tetlahtol tlen omechmocaquilti

in Tohueyitahtzin, in tlen yonamechiluihotoya.⁵ De achto in Juan otlacuatequiyaya ica atl, huan ipan se tonali ayacmo huehcau nanquiselisque in Itiotionaltzin Dios. Ijcon mechcuatequisque.

Otehuicaque neliucac in Jesús

⁶ Huan ic inon ihcuac omosentlalihque tehuau Jesús, otetlahtlanihque:

—¿Totecohtzin; yeh in axan queman mechmacalos oc sepa in chicahualistli matimaquisacan tehuau israeltecos?

7 Huan oquinmonanquililic in Jesús:

—Ahmo mechmactihtoque tlen tonali mochihuas quen san Yehhuatzin mopiya tequihuahyotl ic mamochihuilican.⁸ Huan queman nanquiselisque in Itiotionaltzin Dios nanquiselisque techicahualistzin. Huan nantlachipahuasque ica in yancuic tlahtoli de nehuatl quen ipan in hueyi altepetl Jerusalén huan ipan nochin in tlali Judea huan Samaria, huan ic campa ocachi huehca ipan in tlalticpactli.

⁹Queman omihto Jesús inon, yolic otlehcolo neluicac ihcuac oteitzteuque in tetiotlatitlaniluan. Huan ohuala se mextli huan oteixtlapachoc huan ayacmo oteitaque. ¹⁰Yehhuan otlachixticatcahque ic neluicac ihcuac ohuilohuaticatca Jesús, huan ome tlacamen otlquentihoyahque ica istac omonextihque innahuac in tetiotlatitlaniluan. ¹¹Huan oquiniluihque:

—Tlacamen den Galilea, ocachi cuali ayacmo xtlachixtiyecan ic neluicac. Inon Jesús aquin otlehcoloc ic neluicac, oc sepa hualuilohuas ijquin quen onanteitaque ohuilohuac.

Oquitemohque ipatlaca in Judas

¹²Ihcuc ac inon yehhuan omocuepque Jerusalén de ipan in tepetl itoca Olivostepetl. Inon se ohtli ahmo huehca, cana ome kilómetro, quenin in itlanahuatil in judeahtecos oquincahuiliyaya manehnemican ipan in tonali den nesehuilistli. ¹³Queman oahsique ipan in hueyi altepetl Jerusalén, otlehcoque ipan segundo piso den cali canin ocatcayayahque. Ompa omotepaluihoyahque Pedro huan Jacobo huan Juan huan Andrés huan Felipe huan Tomás huan Bartolomé huan Mateo huan Jacobo iconeu Alfeo, huan Simón in aquin ocatca político cananista huan Judas icniu Jacobo. ¹⁴Nochin yehhuan omosentlaliyahque ica se tlanehnehuilistli huan momostli omoyolmachtiyahque. Inuan ocatcahque in sihuamen huan María inana in Jesús, huan tecnihuan.

¹⁵Huan ipan inon tonalten omosentlaliyahque cana se ciento huan sempohuali tlaneltocanimen. Ic inon Pedro omotelquetz tlanepantla huan oquiniluic:

¹⁶—Nocnihuan, xinechmocaquitican. In hueyixtoc David equihcuiloc ica in Judas in tlen ocualiluiloc ica in Itiotonatzin Dios. Yeh in Judas otetemacti in Jesús queman otequitzquihque. ¹⁷Tleca Judas ocatca seja de tehhuanten huan oquipiyaya tlen quichihuas ihtech inin tequitl. ¹⁸Yehhua oya huan oquicou se tlali ica in tomin tlen oquimacaque ica in tlen ahmo cuali oquichiu. Saniman ohuetz ic coyojquetz huan ocuepon, huan oquis nochin icuitlaxcoluan.

¹⁹Huan queman nochin yehhuan aquin ochantiyayahque Jerusalén oquimatque inon, oquitocahhuihque inon tlali Acéldama, huan ica intlaholt quihtosnequi Tlali den Yestli.

²⁰Tleca ihtech in amatl den Salmos ijquin quihtohua:

Maquicahuacan ichan
huan ahmo aquin mamochanti
ihtech.

Huan noyojqui quihtohua:

Oc se maquiana itequiu.

²¹⁻²²Huan ocachi oquiniluic in Pedro:

—Ic inon tel, se tlacatl quiipyia tlen techmiyaquilis mamononotzacan den ihxohualistli ica in Totecohtzin Jesús. Yesquiyani seja aquin ocatca tohuan nochin tonali queman onemohuac tohuan in Totecohtzin Jesús. Opeu inon tonalten queman otlacuatequiyaya in Juan huan

otlan queman ohuilohuac neluicac in Jesús.

²³Huan oquintocahnotzque ome de yehhuan: Matías huan José Barsabás, aquin noyojqui oquitocahhuiyayahque Justo.

²⁴Ihcuac inon otetlatlautihque Yehhuatzin Dios ijquin:

—Totecotzin, Tehhuatzin quinixmatilo inyolo nochin tlacatl. Xitechmonextilili catli yehhua de inin ome tlacatl Tehhuatzin ticmotlaapehpenilihtoc. ²⁵Huan yehhua maquichihua in itequiu in tetiotlatitlanil. Yeh in tequitl tlen Judas equipolo ica itlahtlacol, huan oya in campa oquinamiquiyaya.

²⁶Ihcuac inon oquitlaapehpenihque seya, huan oquis Matías. Ihcuac inon yehhua oquitocahhuihque ihuan in mahtlactli huan se tetiotlatitlaniluan.

Queman ohualuiloahuac in Itiotonatzin Dios

2 Queman oahsic in iilui in judeahtecos itoca Pentecostés, nochten in tlaneltocanimen san secnin ocatcahque. ²Huan san tlamach opeu xahuani chicahuac, mihtos ohualaya neluicac quenin ihcuac huitz chicahuac yehyecatl, huan oquicajque nochin yehhuan quen omolinic ipan in cali canin oyehuatoyahque.

³Ihcuac inon onesque quen itleyo tletl omoxelohtoyahque huan omocauque itzoncuac sehse de yehhuan. ⁴Huan ijcon oteselihque in Itiotonatzin Dios, huan opeuque tlahtohuahque ica oc sehse intlahtol, san quenin in Itiotonatzin Dios oquinyolpehualtiloc matlahtocan.

⁵Ipan in hueyi altepetl Jerusalén ocatcayayahque judeahtecos inon tonali, aquin nele otemahuestiliyahque in Dios. Ohualahque de nohuiyan ipan in tlalticpactli. ⁶Oquicajque quen oxahuantaya huan omosentlalihque inon tlacamen. Huan ahmo oquimatiyahque tlen quihtosque tleca sehse de yehhuan oquicaquiyayahque quenin in tetlamachticahuan otlahtoticatcahque oc sehse intlahtol. ⁷Quen tel oquimautoyahque huan omoluiyahque sequin huan oc sequin:

—Tlen huelis; ¿ahmo den Galilea inin tlacamen aquin tlahtohticaten?

⁸¿Quenin tel, sehseyá de tehhuan tiquincaquihque tlahtohticaten ica tlen tehhuan totlahtol? ⁹Nican oncan tlacamen den tlali Partia huan Media huan Elam huan Mesopotamia huan Judea huan Capadocia huan Ponto huan Asia, ¹⁰huan Frigia huan Panfilia huan Egipto huan in tlali Africa tlen caten ocache ompic den Cirene. Noyojqui oncaten romanohteclos aquin omotepaluhtoyahque nican Jerusalén. Sequin de yehhuan otlacatque judeahtecos huan oc sequin omochiuque tlaneltocanimen ica itlanehnehuilis in judeahtecos. ¹¹Oncaten noyojqui ic tlali Creta huan Arabia. Huan tinochten tiquincaquihque quen tlahtohticaten ica tlen tequin caultzin tequitl mochihua Dios ica tlen tehhuan totlahtol.

¹²Nochten quen tel omonehnehuilihtoyahque

huan ahmo oquimatiyahque
tlen quihtosnequi, huan
omotlahtlaniyahque:
—¿Tlen quihtosnequi nochin inin?
¹³Huan oc sequin ica
ohuehuetzcahque huan
oquihtohuayahque:
—Inin tlacamen huintihque.

In Pedro oquinnonotz in tlacamen

¹⁴Ihcuac inon Pedro omotelquetz
ihuan in oc mahtlactli huan se
tetiotlatitlaniluan huan otlahlo
chicahuac huan oquiniluic:
—Tlacatzitzin den Judea huan
in aquin namochantihoque
nican Jerusalén, xicmatican
tlen quihtosnequi inin huan
xicyecaquican in tlen niyau
namechiluiya. ¹⁵Tehhuantem ahmo
tihiuntihque quen namehhuan
nanquinehnehuiiyahque, tleca
hueloc chicnahue hora tlalca.
¹⁶Tlen panohtica yeh in tlen
oquihto in tetlayolchicau Dios itoca
Joel queman oquihcuiloc:

¹⁷Ijcon omihto in Dios; yimero
ahsis queman tlalpolihuis.

Huan niquinyoltlaxili in
Notiotonaltzin nochin
tlacamen mamocahualo
inyolihtec.

Huan namopiluan tlahtosque ica
notlahtoltzin.

In telpochten
quiylnehnehuiilisque
huan in tetecten motemiquisque.

¹⁸Ipan inon tonali niquinyoltlaxili
Notiotonaltzin ic mocahualos
inyolihtec inon tlacamen
huan sihuamen aquin
quichihuasque notequiu,

huan tlahtosque ica
notlahtoltzin.

¹⁹Tlacpac ipan in neluicactli huan
tlatzintla ipan in tlalticpactli
nictemacas tlachiuten tlen ic
quichihuasque cuenta ayacmo
huehcau itonal Totecohtzin.

²⁰Ipan inon tonali ompayes hueyi
tetzahuitl;
huan achto de ihcuac ahsis,
tlatlpa momanas yestli huan
xotlas in tletl huan mahcocus
in poctli.

Ic inon tlayohuas ica in
tonaltzintli huan mopatlas in
metztli cahso quen yestli.

²¹Huan maquisasque nochten
in aquin tetlatlautisque in
Totecohtzin.

Ijcon oquihcuiloc in Joel.

²²Xicaquican tel, tlacamen de
Israel, tlen niyau namechiluiya. In
Jesús tealtepeu Nazaret, Yehhuatzin
se tlacatl oquitlapetpeniloc in Dios.
Huan inon nanquiyecmatihque
tleca oquimochihuili in hueyi
tlaistlacolten huan in tlachiuten
mahuestic huan in tlanextilisten ic
maquinehnehuiilan techicahualis
in Dios. ²³Omechtemactilhque
Jesús quen omomat in Dios aquin
omoyectlali yihuehcau. Huan
namehhuan onantequitzquihque
huan namehhuan onantemictihque.
Tleca onantetemactihque
matemasohuáltican ica inmahuan
tlacamen ahmo cualten. ²⁴Huan
Dios oteihxitiloc, masque mijqui
oilohuayaya, tleca ahhuel
omocahualo mijqui. ²⁵In hueyixtoc
David oquihcuiloc in tlen
omonextililoc in Itiotonaltzin Dios,

- ica tlen panos ihcuac micohuas in Jesús. Ijcon omihto:
- Nochipa oniquitayaya in
Tohueyitahtzin Dios noixpa.
Yehhuatzin oilohuac nonahuac,
ahmo tlen manechmohmoutis.
- ²⁶ Ic inon oniyolpac, huan
onicuihcuicac. Masque
tilantoc notlacayo, nicmati oc
sepa nihsas;
- ²⁷ tleca Tehhuahtzin ahmo
quicahualos nonemilis canin
caten in mijcamen,
niyan ahmo nechmocahuilis
mapalani notlacayo, tleca
nehhuatl niteconeu
tetlapehpenil.
- ²⁸ Onechnextilhque quen ocachi
cuali ninemi,
huan tinechmomaquilis miyac
paquilstli tleca nohuan
ilohuac.

Ijcon omihto in Jesús.

- ²⁹ Nocnihuan, ic nele cuali
namechiluiya in tochichicacoltzin
David omic huan oquitlapachohque
huan in tlatcochtli nican
Jerusalén. ³⁰ Huan David ocatca
se tlayolchicauqui huan oquimat
quen Dios omocalactili tetlahtol,
quen se teixui David ilohuas in
Cristo aquin mochihuas hueyi
tequihua quen ocatca in David.
- ³¹ Ojcon David, quen oquinextililo
in Itiotonaltzin Dios ica tlen
panos, otlahto ica ihxohualistzin
in Cristo, huan oquihto tenemilis
ahmo mocahuas canin caten in
mijcamen, niyan ahmo palanis
tetlacayo. ³² Huan inin Jesús aquin
Dios oquihxitiloc, Yehhuatzin
in Cristo, huan ic inon nochin
tehhuan cuali ticchipahuasque.

³³ Ojcon Dios oquimahuestililoc
in Jesús ican tequihuahyotl. Huan
Tohueyitahtzin Dios otemacalo in
Itiotonaltzin quen oquimoluilic.
Huan mochiutica inon Itiotonaltzin
Dios nochin inin tlen nanquitztoque
huan nanquicactoque. ³⁴ Tleca
ahmo otlehcoc neluicac in David,
huan san yehhuatl oquihto:

In Tohueyitahtzin oquiluilic in
Notecohtzin:

“Ximotlali nonahuac

³⁵ hasta niquimpinautis nochin in
aquin mitzcocoliyahque.”

³⁶ Axan nicnequi xicyecmatican
nochin namehhuan tlacamen
den Israel quen inin Jesús aquin
namehhuan onantetemactihque
matemicitan, Yehhuatzin in aquin
Dios otetocahhuihque Totecohtzin
huan Cristo tetlapehpenil in Dios.

³⁷ Queman in tlacamen
oquicajque inin, oyoltlocoxque huan
oquitlahtlanihque in Pedro huan in
oc sequin tetiotlatitlaniluan:

—Tocnihuan, ¿tlen cuali
ticchihuasque?

³⁸ Ihcuac inon Pedro
oquinannquilic:

—Ximoyolcuepacan
huan ximocuatequican
sehse de namehhuan ipan
Itocahtzin Jesucristo, huan
mechtlapohpoluisque namotlahtlacol.
Huan ojcon mechmacalos in Dios
in Itiotonaltzin, mamocahualo
namoyolitec. ³⁹ Nanquimatihque
inon tleca omechcaquiltiloc Dios
ica namehhuan huan namopiluan
huan nochin aquin caten huehca
ica intlanehnehuilis, nochin
yehhuau aquin in Totecohtzin Dios
quimonequiltiya quinmononochilis.

40 Ica inon tlahtoli huan oc sequin oquintlatlautic Pedro huan oquinnonotz ijcon:

—Ximaquisacan huan ximoxelocan den inin tlacamen aquin mopolohuahque.

41 Ojcon oquincuatequihque in aquin oquichiuque cuenta ica itlahtol, huan inon tonali omosetilihque inuan in tlaneltocanimen cana yyiy mil tlacamen. **42** Huan oquichiuque cuenta ica nochin in tlen in tetiotlatitlaniluan oquinnextiliyahque, huan san se oquimatque sequin huan oc sequin. Huan omoyolmachtihque huan oquimomahsehuihque tetlaolichtilis Totecohtzin.

Quenin onenque in achtō tlaneltocanimen

43 Nochten quen tel oquimautoyahque quen oquichiuque in tetiotlatitlaniluan in tlaistlacolten huan in tlanexten mahuestic. **44** Huan nochin tlaneltocanimen omosetilihque san secnin huan omoxeluihque nochin in tlen oquipiyayahque sequin huan oc sequin. **45** Oquinemacayayahque intlaluan huan nochin in tlen oquipiyayahque huan omotlasentlaltilhque in tomin, huan quemanaquin quinequi, cuali quixeluisque.

46 Mostli omosentlaliyahque ihtech in hueyi tiopantli den judeahtecus, huan ihtech inchan oquimomahsehuihque tetlaolichtilis Totecohtzin huan opactoyahque ic nochten. **47** In tlaneltocanimen otemahuestiliyahque in

Dios, huan in oc sequinten oquinuelitaque. Huan mostli momiyaquiliyahque in tlaneltocanimen tleca quinmaquixtilohtiu Yehhuatzin Dios.

In tetiotlatitlaniluan quipahtiyahque se xonecuil

3 Ocalactayahque in Pedro huan Juan ihtech in hueyi tiopantli cana yyiy horahtiolac, tleca inon in hora ic moyolmachtisque. **2** Huan nochipa ompa ocatcayaya se tlacatl xonecuil de ihcuac otlacat. Oquihuicayayahque inahuac in tiopantli, huan oquicahuayayahque inahuac in puerta itoca Cualtzin, maquintlahtlanili limosna in aquin ompa ocalaquiyayahque.

3 Ihcuac in xonecuil oquitac quen ocalactayahque in Pedro huan Juan ipan in tiopantli, oquintlahtlanili se limosna. **4** Ihcuac inon in Pedro huan Juan oquiequitaque huan oquiluc in Pedro:

—iXitechcaqui!

5 Inon xonecuil oquichiu cuenta, huan oquinehnehuiliyaya cana quimacanihque itlahten. **6** Huan in Pedro oquiluc:

—Ahmo nicpiya niyan plata niyan oro, pero in tlen nicpiya nimitzmacas. Ica tetequihuahyotl in Jesucristo den altepetl Nazaret, ximoquetza huan xinehnemi.

7 Huan in Pedro oquiquitzqui in xonecuil ic iyecman huan oquiquetz huan saniman ochicau icxihuan.

8 Ihcuac inon omoquetz saniman in xonecuil huan opeu nehnemi. Inuan ocalac ihtech in tiopantli nehnentiu huan patlantiu huan

temahuestilihi in Dios. ⁹Nochin tlacatl oquitaque nehnentinemi huan temahuestilihi in Dios. ¹⁰Huan quen tel oquimautoyahque huan omomoutihque ica in tlen opanoc. Tleca oquixmatiyahque yehhua in aquin omotlaliyaya quitlahtlani limosna inahuac in puerta tlen itoca in Cualtzin.

**Tlen oquihto in Pedro ihtech
in icaltenco Salomón**

¹¹Ocatca se lugar itoca icaltenco Salomón huan ompa oyahque in Pedro huan Juan. In xonecuil aquin oquipahtihque ahmo oquinixcahuayaya huan nochin in tlacamen quen tel oquimautoyahque huan otzecuunque nepa quitasque tlen opanoc. ¹²Ihcuac oquitac inon, in Pedro oquiniluic in tlacamen:

—Tlacatzitzin den Israel, ¿tleca quen tel nanquimatihi? Ahmo xicnehnehuilcan oticpahtihque inin tlacatl ica tochicahualis noso tleca tequin titemahuestiliyahque. ¹³In Dios aquin oquineltocaque tochichicacoluan Abraham huan Isaac huan Jacob, Yehhuatzin aquin omohueyitili Iconetzin Jesús, in aquin namehhuan onantetemactihque innajco in tequihuahmen. Huan queman Pilato in tequihuah tecahcahuasquiyani, namehhuan ahmo onanquinejque. ¹⁴Masque inon Jesús mahuestic teixpa in Dios, namehhuan onanquitlahtlanilihque maquicahcahua in Pilato se temictiyani. ¹⁵Ijcon onanquicahuilhque matemicitan in aquin techmacalo in nemilistli.

Huan Dios oteihxtiloc in Jesús ipan in tlaltecochtli, huan ic inon tehhuan ticchipahuahque. ¹⁶Huan Dios oquipahtiloc inin tlacatl aquin nanquixmatihque, tleca tehhuan ticneltocabque ica techicahualis inon Jesús. Ijcon nanquitahque quen oquiyecpahtihque tleca ticneltocabque ipan Itocahtzin Jesús.

¹⁷'Tlacatzitzin den Israel, nicmati niyan namehhuan niyan namotequihuan ahmo onanquinehnehuiliyahque tlen onanquichiuticatcabque queman onantetemactihque matemicitan in Jesús. ¹⁸Huan Dios oquimochihuili ijcon in tlen yoquihtohque ic incamac in tetlayolchicaucahan, quen oquipiyaya tlen tlapanolos in Cristo tetlapehpenil in Dios ica in miquilistli. ¹⁹Axan tel, ximoyolcuepacan huan mechtlapohpoluilisque namotlahtlacol. Ihcuac inon in Totecohtzin cuali mechyolpacmacalos. ²⁰Huan mohualtitlanis in Jesús, Yehhuatzin in tetlapehpenil in Dios aquin omihtoc mechmaquixtilos. ²¹Huan quiyiya tlen mocahualos neluicac hasta queman Dios mochihuas nochin in tlen yomihtoc ipan itlahtoltzin. Ijcon yihuehcau otlahcuilohque in tlayolchicaucamen tetlapehpeniluan in Dios. ²²Ojcon oquiniluic in Moisés aquin tochichicacoltzin: “Dios in Totecohtzin mechualtitlanilos se namocniu, quen onechualtitlanilo nehhuatl. Yeh noyojqui se tlayolchicaucui ica itlahtoltzin Dios. Xicchihuacan

cuenta ica nochin tlen mechiluilos.
23 Tleca mopolosque ihtech ichanihcahuan den Israel nochin tlacatl aquin ahmo quichihuilis cuenta ica Yehhuatzin aquin mechnonotzalos.” Ijcon oquihcuiloc in Moisés.

24 Huan ihcuac onentoya in tlayolchicauqui Samuel hasta axan, nochin in tlayolchicaucamen otlahtohque noyojqui ica tlen panotica axan. **25** Dios oquincaquiltiloc tochichicacoluan huan yeh in tlen omechualahsic axan, quen Yehhuatzin Dios omoluic in Abraham: “Ica se mochichicaixui niquinchihuilis molui cuali nochin tlacamen ipan in tlalticpactli.” **26** Dios omechualtitlanililoc in Iconetzin acho ica namehhuan, mamechuelitalo namochten ic nanquicahuasque in tlen ahmo cuali.

In tetiotlatitlaniluan Pedro huan Juan inixpa in tequihuahmen

4 Ihcuac mononotzticaten in Pedro huan Juan, ohualahque in tiopixcamen den judeahtecos ihuan in comandante den tiopantli. Noyojqui inuan ohualahque in saduceos. Yehhuan sequin tlamachtiyanimen den itlanahuatil den judeahtecos aquin ahmo oquineltocaque ica in ihxohualistli. **2** Ocualltoyahque tleca Pedro huan Juan oquinextiliyahque in tlacamen quen in Jesús oihxohuac huan ic inon ihsasque in mijcamen. **3** Ihcuac inon oquinquitzquihque huan oquincalaquihque telpiloyan huan hasta ic mostla

tleca yitiotlac huan ayacmo ocatca tlixcomacalistli. **4** Huan oquineltocaque miyacten aquin oquicajque in itlahtoltzin Dios huan ic yehhuan oahsic cana macuili mil in tlaneltocanimen san yehhuan tlacamen.

5 Ic mostla ipan Jerusalén omosentlalihque in tequihuahmen den altepetl, huan in tetecten, huan in tlamachtiyanimen den itlanahuatil in judeahtecos.

6 Noyojqui ihuan Anás, yehhua in hueyixtoc den tiopixcamen, huan Caifás huan Juan huan Alejandro huan nochin ichanihcahuan in achtohque den tiopixcamen. **7** Huan oquintitlanque maquinanacan in Pedro huan Juan, huan oquintlalihque tlanepantla huan oquintlahtlanihque:

—¿Ica tlen tequihuahyotl, noso aquin omechiluic xicpahtican inon tlacat?

8 Ihcuac inon in Pedro oquiniluic quen Itiotonatzin Dios ocualmacaloc:

—Tequihuahmen huan tetecten den Israel, **9** onantechtlahtlanihque quen oticpalehuihque se cocoxqui, huan quen opahtic.

10 Tiquihtohuahque namoixpa, maquimatican nochin tlacamen den Israel, inin tlacatl aquin nicanca namoixpa omopahtic ica Itocahtzin Jesucristo tealtepeu itoca Nazaret. Yehhuatzin in aquin namehhuan onantetemactihque matemicitan ipan in cruz, huan oteihxitiloc Dios ipan in tlaltecochtli. **11** Quemaniyan quen se tlacatl quixtlastra tetl tlen ahmo yehui huan satepa san yehhua

quinamiquis. Ijcon namehhuan onanteixtlasque in Jesús, huan satepa oquixohuac Yehhuatzin ocache de nochin. ¹²Niyan aquin oc se cuali techmaquixtilos tleca techmacatoque san Yehhuatzin Itocahtzin Jesús quen Totemaquixtcahtzin.

¹³In tequihuahmen huan in teteceten quen tel oquimautoyahque quemana oquitaque in Pedro huan Juan ahmo omomoutihque ic tlanonotzasque, tleca oquimatque quen ahyic omomachtiyahque huan ahmo tlen inquisca. Huan ic inon oquichiuque cuenta quen in Pedro huan Juan tehuan onemiyayahque in Jesús. ¹⁴Huan in tlacatl aquin oquipahtihque ompa ocatca inahuac in Pedro huan Juan, huan ic inon in tequihuahnen ahhue oquinahhuaque.

¹⁵Ihcuac inon oquitequiutihque maquinquixtican in Pedro huan Juan huan omonohnotzque san yehuanten, ¹⁶huan oquihtoqe:

—¿Tlen ticchihuasque ica inin tlacamen? Tleca quimatihque nochten in aquin chancaten Jerusalén quen oquichiuque inin tlamelajcan tlapahtilistli, huan ahhue tiquixtlasque. ¹⁷Ayacmo ticnequiuhque maquinonotzacan inin tlamachtilistli huan ic inon tiquintlacahualtisque inin inehuan huan axan ayacmo matlanonotzacan ica itlahtol Jesús.

¹⁸Ihcuac inon oquinnotzque huan oquinahuatihque ayacmo matlanonotzacan niyan ayacmo maquinnextilican ica itlahtoltzin Jesús. ¹⁹Huan in Pedro huan Juan oquiniluihque in tequihuahnen:

—¿Tlen ocache monequis in Dios? Cox, ¿titetlacamatique Yehhuatzin noso tamechtlacamatique?
²⁰Tehhuan ahhue ticahuasque ic titlahtosque in tlen tiquitztoque huan tlen ticactoque.

²¹Ihcuac inon in tequihuahmen oc sepa oquintlacahualtihque in Pedro huan Juan huan oquincaque, tleca ahmo ocahsihque quen quintlapanoltisque. Huan noyojqui omomoutiyayahque inon tequihuahmen ica in tlacamen den altepetl, tleca nochten oquinuelitahque in tetiotlatitlaniluan huan otemahuestilihticatcahque in Dios ica in tlen opanoc. ²²Tleca inon tlacatl aquin oquipahtihque ica techicahualis in Dios oquipiyaya ocache de ompohuali xihuitl.

²³Huan quemana oquincaque in Pedro huan Juan, oyahque canin ocatcahque in tlaneltocanimen. Huan oquinnotzque nochin in tlen oquiniluihque in tiopixcamen huan in teteceten. ²⁴Queman oquicajque inon, nochten omoyolmachtiyahque ica in Dios huan oquihtoque:

—Tohueyitahtzin, Tehhuatzin aquin oquimochihuili in neluicactli huan in tlalticpacatl huan in atl, huan nochin in tlamantli tlen oncan. ²⁵Tehhuatzin ica Tetiontonatzin oticualmomaquili tetlaquehual David maquihto:

—¿Tleca motlahtolchihuiyahque in tlalticpac tlacamen?
San tlaluis quinehnehuiyahque.
²⁶In tequihuahmen den tlalticpacatl oteixnamijque, huan omosechiuque matecocolican in Totecohtzin Dios huan in Cristo.

Ijcon equihcuilic in David.

In tlaneltoconimen quitlahtlanihque maquinylchicahualo in Totecohtzin

²⁷Tleca ic nele, Herodes huan Poncio Pilato, ihuan in tlacamen omosechiue ihtech inin hueyi altepetl matecocolican tetlasohconetzin Jesùs, aquin omotemacti ica tetequiu.

²⁸Yehhuan oquichiuque nochin tlen Tehhuatzin oticmonequilti mapano. ²⁹Huan axan, Totecohtzin, xicmotali quen techmohmoutisque huan xitechmoyolchicahuili tehhuan titetlaquehualtzintzin matitlanonotzacan ica motlahtoltzin huan ahmo matimomoutican.

³⁰Mapahtican in cocoxcamen temajco huan matequitihuia ica techicahualis in tlachiutnen mahuestic ica Itocatzin Moconetzin, in aquin Motlapehpeniltzin toJesùs.

Ijcon omoyolmachtihque.

³¹Queman otlanque moyolmachtiyahque, ohuehueyocac canin omosentlaliyahque huan nochten oquinyolchicahualo ica techicahualis in Itiotonaltzin Dios huan ayacmo omomoutihque matlahtocan ica itlahtoltzin Dios.

Oquixehxelohque nochin tlen oquipiyayahque

³²Huan in miyacten aquin otlaneltoque san se intlamachilis oculamatque. Ahmo aquin oquihahuaya in tlen quipiya san yehhua inuaxca, in tlahmo nochin in tlen oquipiyayahque ooliliutoya sansecnin. ³³In tetiotlatitlaniluan oquiyecchipauque ica in ihxohualistzin in Totecohtzin Jesùs

huan molui chicahuac intlahtol. Huan nochin oquinmotiochihuili in Dios. ³⁴Ahmo ocatca niyan aquin tlen oquipolohuaya, tleca oquinemacayayahque nochin in tlen oquipiyayahque, tlalten noso calten, huan oculicayayahque in tomin.

³⁵Huan oquitemactiyayahque inmajco in tetiotlatitlaniluan huan yehhuan omoxehxeluiyahque san quen oquinequiyaya seja.

³⁶Ijcon oquichiu se tlacatl itoca José den ichanihcáhuan Leví, huan itocahyan Chipre, huan in tetiotlatitlaniluan oquitocahuiyahque Bernabé, tlen quihtosnequi in aquin tlayolchicahua. ³⁷Inin tlacatl oquinemacac se itlal huan oculicac in tomin huan oquitemacti inmajco in tetiotlatitlaniluan.

In tlahtlacoli tlen oquichiuque Ananías huan Safira

5 Huan se tlacatl itoca Ananías ihuan isihuau Safira oquinemacaque se intlal. ²Huan inon tlacatl oquitemacti in tomin inmajco in tetiotlatitlaniluan, masque oquimocahui sa se chihton ic oquincahcayau. Ihuan oquisematiyaya isihuau. ³Ihcuac inon oquiluic in Pedro:

—Ananías; étleca otimocau ica in Satanás mamitzolyquitzi huan oticmocahui sequin tomin tlen omitzmacaque ica in tlali tlen oticnemacac? Tel, éticnehnehuiliya cuali titecahcayahuas in Itiotonaltzin Dios? ⁴Inon tlali mohuaxca ocatca. Ahmo oticpiyaya tlen ticnemacas. Huan queman oticnemacac, moyaxca nochin in tomin. Étleca

oticnehnehuili ticchihuas inin?
Otiistlacat ahmo san ica in tlacatl, in
tlahmo hasta ihuan in Dios.

⁵Queman Ananías oquicac inin,
ohuetz mijqui. Huan nochten in
aquin oquimatque inon, molui
omomoutihque. ⁶Ihcuac inon
ohualahque sequin telpopochten,
huan oquipipiquihque itlacayo huan
oquiquixtihque huan oquihuicaque
quitocahque.

⁷Cana yi yi hora satepa, ocalac
isihuau Ananías, huan ahmo
oquimatiyaya tlen opanotoya.

⁸Pedro oquitlahtlanic:

—Xinechilui: ¿Onanquinemacaque
in tlali ica in tomin quen
onanquihtohque?

Huan otlananquilic yehhuatl:

—Ic nele ijcon ic oticnemacaque.

⁹Ihcuac inon in Pedro
oquitlahtlanic:

—¿Tleca san se
onanquimatque namehhuan
ic nanquimohsihuayahque
Tetiotonatzin Totecohtzin?

Nepa quiahuac huitzen in aquin
oquitocaque monamic huan axan
tehhuatl mitzuicasque noyojqui.

¹⁰Ic inon yehhuatl ohuetz mijqui
icxitla in Pedro. Queman ocalajque
in telpopochten ocahsitohque
yimijqui, huan oquihuicaque
huan oquitocaque inahuac inamic.

¹¹Huan omomoutihque nochten
in tlaneltocanimen ipan in
itiotlayehualoltzin in Dios, ihuan in
aquin oquimatque inon tlen opanoc.

Oquinextiliyahque ica tlachiuten mahuestic

¹²Huan oquichihuayayahque
in tetiotlatitlaniluan tlanepantla

den tlacamen miyac tlachiuten
mahuestic tlen ic quichihuasque
cuenta, huan nochten
omosentlaliyahque ipan Icaltenco
in Salomón. ¹³Niyan aquin den oc
sequinten omoixcohyehuiyahque
inuan monelosque in
tlaneltocanimen huan in tlacamen
molui oquinuelitayayahque. ¹⁴Huan
miyac tlacamen huan sihuamen
oquineltocaque ica in Totecohtzin.
¹⁵Noyojqui oquinquixtiyahque
in cocoxcamen ipan ohtli,
huan oquintlaliyahque
ipan tlapechtli. Huan queman
apanohuaya in Pedro, macana
huetzis isehualyo ipan yehhuan
ic mapahcticán. ¹⁶Huan hasta den
oc sequin hueyi altepemen tlen
caten tlanahuac, ohualahque
miyac tlacamen ipan Jerusalén.
Huan oquinualicayayahque
incocoxcahuan huan in aquin
oquipixtoyahque in ahmo
cuali yehycatl, huan nochten
opahtiyayahque.

Oquinmohsihuayayahque in tetiotlatitlaniluan

¹⁷Ihcuac inon in achtohque
den tiopixcamen huan in
saduceos, yehhuan aquin
oquipalehuiyahque, molui
oquinnexicaluiyahque. ¹⁸Huan
oquinquitzquihque presos
in tetiotlatitlaniluan, huan
oquinclalaquihque ipan in
telpiloyan. ¹⁹Huan tlayohua se
ángel den Totecohtzin oquintlapo
in puertas den telpiloyan huan
oquinquixti. Huan oquiniluic:
²⁰—Xiyacan ximoquetzacan
ihtech in tiopantli huan

xiquinnonotzacan nochin tlacamen ica in tlahtoli de inin yancuic nemilstli.

²¹Queman oquicajque inon, ic tlapoyaucan ocalajque ihtech in tiopantli huan opeque quinextiliyahque.

Ihcuac inon in achtohque den tiopixcamen omosentlalihque ihuan in hueyi junta den Israel, quihtosnequi nochin in tetecen den judeahicos, huan oquintequiutihque maquinanacan in tetiotlatitlaniluan de ihtech in telpiloyan. ²²Huan quemana oahsitoque in topilihten ihtech in telpiloyan, ayacmo oquinahsitoque. Huan omocuepque tlanahuatiyahque:

²³—Oticasitosohque yec tzactoc in telpiloyan huan in soldados oquipipixtoyahque iixpa in puertas, huan quemana otitlapohque, ahmo aquin oticasitosohque tlahetc.

²⁴Queman oquicajque inon, in achtoque den tiopixcamen huan in comandante omotlahtlanihque se huan oc seya:

—¿Tlen panos axan?

²⁵Ihcuac inon oahsic se tlacatl quihtotiu:

—In tlacamen aquin onanquincalaquihque telpiloyan yiompa caten tiopan tlamachtihoque ica in oc sequin tlacamen.

²⁶Ihcuac inon in comandante oya ihuan in topilihten huan oquinualicac in tetiotlatitlaniluan, huan ahmo oquinocoliyayahque, tleca omomoutiyayahque cana quintemacasquiyanihque

in oc sequiten. ²⁷Queman oquinualicahque, oquintlalihque iixpa in tequihuahmen den tiopantli, huan in hueyixtoc den tiopixcamen oquiniluic:

²⁸—Tehhuan

otamechtlacahualtihque namehhuan ayacmo xitlanextilican ica itlahtol Jesús. ¿Huan tlen onanquichiuhque? Namehhuan yonanquimiyaquilihque namotlahtol ipan Jerusalén huan nanquinequihque nantechtlahtlacoltisque ic omic inon Jesús.

²⁹Ihcuac inon otlananquilic in Pedro ihuan in oc sequin tetiotlatitlaniluan:

—Ticpiyahque tlen tictlacamatique in Dios huan ahmo in tlacamen. ³⁰In Dios den tochichicacoluan oteihxitiloc in Jesús aquin namehhuan onantemictihque, quen onantetemactihque matemasohuáltican ipan in cruz.

³¹Dios oquimotlalili in Jesús huehcapa canin ocachi mahuestic huan oquimochihuili Totecohtzin huan Totemaquixticahtzin.

Yehhuatl in aquin oquinmocahuili mamoyolcuepacan in tlacamen den Israél huan maquintlapohpoluican intlahtlacol. ³²Inin tlahtoli tehhuani ticchipahuahque huan noyojqui quichipahualo Itiotonatzin Dios. Yehhuatzin in aquin Dios quinmomaquilihtoc mamocahualo inyolihtec in aquin tetlacamatique.

³³Queman oquicajque in tiopixcamen, oculanque huan oquinequiyayahque quinmictisque. ³⁴Huan ocatca

se tequihua itlanelnehuilis fariseo itoca Gamaliel, huan ocatca tlamachtiyani ica itlanahuatil in judeahotecos. Huan oquihuelitayayahque molui in tlacamen. Yehhuatl omoquetz huan oquinahuati maquinquixtican san chihton in tetiotlatitlaniluan.

35 Ihcuac inon oquiniluic in tequihuahmen:

—Tlacamen den Israel, xicchihuacan cuenta quen nanquichihuasque ihuan inin tlacamen. **36** Tleca nanquilnamiquihque namehhuan ayamo temouti huehcau, omohueyili se tlacatl itoca Teudas huan oquihto mach yehhua se tlacatl hueyi iquisca. Huan oquipantocaque cana nahue ciento tlacamen. Huan oquitemo inemictilis huan omochayauque nochin aquin oquipantocayayahque huan ojcon omotlamixexelohque. **37** Satepa, ipan in tonali queman oquiquixtihque censo, noyoqui omohueyili in Judas, itocahyan Galilea, huan miyacten oquicuitlapanuiyahque, huan noyoqui oquitemo inemictilis huan omochachayauque nochin in aquin oquicuitlapanuiyahque. **38** Ic inon, xiquincahuacan inin tlacamen huan ahmo ximocalactican inuan, tleca tla inin tlahtoli ca itlanelnehuilis tlacatl, ijcon tlamic tlamach. **39** Huan tla nele den Dios, namehhuan ahhue nanquixitinisque. Ximomaluican ahmo nanteixnamiquihque in Dios.

40 Oquihtohque nocthen mach cuali ocatcaya inon itlahtol in Gamaliel. Oquinnotzque

in tetiotlatitlaniluan huan oquinuihuitejque huan oquintlacahualtihque ayacmo matlanonotzacan ica itlahtoltzin Jesús, huan ic satepa oquincahcauque. **41** Huan yehhuan oquisque iixpa in tequihuahmen, molui pactihue tleca Dios omocahualoc maquiimpinautican tepampa in Jesús. **42** Huan mostli ipan inchan huan ipan tiopan ahmo omotzecohque ic oquinnextiliyahque ica itlahtoltzin Jesús.

Oquintocahuiyahque in chicome tetlaxehxelohuanimen

6 Ipan inon tonali oquimiyaquilihque in tlaneltocanimen. Huan in aquin otlahtohuayahque ica intlahtol griego opeuke quintenehuahque ica in judeahotecos, huan oquihtohuayahque mach ahmo quinyecchiuhahque cuenta ica in viudas griegohtecas queman omoxehxelohuayahque mostli in tlacuali. **1** Ihcuac inon in mahtlactli huan ome tetiotlatitlaniluan oquinsentlalihque nochin tlaneltocanimen huan oquiniluihque:

—Ocachi cuali ahmo matimotzecocan ic titlanonotzasque ica itlahtoltzin Dios ic maticxehxelocan tlacuali. **3** Ic inon, tocnihuan, xiquintemocan chicome tlacatl ic namehhuan, aquin ahmo tlacahcayauiqui, huan aquin tlanehnehuiliyahque, huan aquin quipiyahque in techicahualis Itiotonaltzin in Dios. Huan xiquinmacacan inon tequitl. **4** Huan

tehuante timoyolmachtisque
huan tiquinnextilisque ica
itlahtoltzin Dios.

⁵Omosechiue nochten ic tlen
oquihtohque in tetiotlatitlaniluan,
huan oquitlapehpenihque
in Esteban, se tlacatl aquin
yec otaneltocayaya huan
quiyolquitzquihtoc in techicahualis
Itiotonatzin in Dios. Huan noyojqui
oquintlapehpenihque in Felipe,
huan Prócoro, huan Nicanor, huan
Timón, huan Parmenas, huan
Nicolás, yeh se tlacatl ochantiyaya
Antioquía. Yehhuatl se griegohteco
aquin oquineltocac quen judeahteco.
⁶Saniman oquinualicahque
iixpa in tetiotlatitlaniluan
huan omoyolmachtihque huan
oquitlalihque inman ipan
yehhuan, maquinylchicahuacan
maquintlalilican intequiu.

⁷Huan ocachi omochayau
itlahtoltzin Totecohtzin huan ipan
Jerusalén ocachi oquimiyaquilihque
in tlaneltocanimen, huan
otaneltoque miyac tiopixcamen
ica in Jesucristo.

Oquiquitzquihi que preso in Esteban

⁸Oquichihuayaya in Esteban
miyac tlachiutен mahuestic iixpa in
tlacamen, tleca Dios oquimacaloc
tequihuahyotl huan oquihuelitaloc.
⁹Ihcuac inon sequin tlacamen den
ololi itoca Esclavos Libertados
opeuque motlahtolchihuiyahque
ica in Esteban. Huan
oquimpalehuihque oc sequin
tlacamen den altepemen den Cirene,
huan den Alejandría, huan den tlali
Cilicia, huan den tlali Asia. ¹⁰Huan
ahhuel oquixnamiquiyayahque

in Esteban tleca otahtohuaya
ica tetlanehnehuilis Itiotonatzin
in Dios. ¹¹Ihcuac inon
oquintlaxtlahuhihque sequin ica
mamotencuacan quen Esteban
otepactecatoya ica itlahtol in
Moisés huan ica Yehhuatzin
Dios. ¹²Ijquin oquichiuque
maquicocolican in Esteban in
teteften huan in tlamachtiyanimen
den itlanahuatil Moisés. Huan
oquiquitzquihi que huan ocuicaque
iixpa in tequihuahmen. ¹³Huan
oquintemohque in aquin
quichipahuahque:

—Inin tlacatl nochipa quipacteca
inin tiopantli huan itlanahuatil
Moisés. ¹⁴Oticajque quemán
oquihto mach inon Jesús tealtepeu
Nazaret quixininis inin tiopantli
huan quipatilis itlanehnehuilis
Moisés.

¹⁵Ihcuac inon, quemán oquitaque
in Esteban in tequihuahmen
huan nochin in aquin ompa
oyehuatoyahque, oquitaque nesi
ixayac in Esteban quen ixayac se
ángel.

Quenin Esteban omopalehui

7 Ihcuac inon in hueyixtoc den
tiopixcamen oquithatlani in
Esteban:

—Tel, ¿melahuac tlen ic
omitzteluihque?

²Huan otlananquilic yehhuatl:

—Tocnihuan huan totatahhuan,
xinechcaquican. Tohueyiratzin
Dios mahuestic oquimonextilili
tochichicacoltzin Abraham quemán
ocatca ipan tlali Mesopotamia,
ihcuac ayamo yau mochantiya
Harán. ³Huan oquimoluilic in

Dios: "Xicahua motlal huan nochin mochanihcahuan, huan xiayu ipan in tlali tlen nehhua nimitznextilis." ⁴Ihcuac inon oquis Abraham den tlali Caldea huan oya mochantlaliya ic Harán. Huan ihcuac omic itata Abraham, Dios omohualicac ipan inin tlali canin namehhuan nancaten axan. ⁵Huan ahmo oquimomaquili niyan tlen tlali nican, niyan canin quitlalis icxi, huan Dios oquimocalactili itlahtoltzin quimacalos satepa inon tlali. Huan satepa ihcuac miquis, inin tlali ihuaxca yes ipiluan, masque ipan inon tonali Abraham ayamo oquipiyayaya ipiluan. ⁶Huan Dios oquimoluilic quen ichichicaixuihuan in Abraham mochantisque quen sentlapalchanimen ihtech se tetlal para nahue ciento xihuitl. Huan ompa yesque tlaquehualten aquin ahmo quinmaluisque. ⁷Huan noyojqui oquimoluilic in Dios: "Nehhua niquintlapanoltis inon tlacamen aquin quinchihualtisque tlaquehualten, huan satepa quisasque de ompa inon techichicaixuihuan huan nechmahuestilisque ipan inin tlali." ⁸Ihcuac inon Dios omotlahtolnamijque ihuan Abraham, huan omotequiuti maquitlali in ixmatcayotl den judeaheco ipan nochten telpocamen, ijcon maquinehnehuilcan yehhuan tehuaxca in Dios. Ic inon, queman otlacat iconeu in Abraham itoca Isaac, ipan chicueyi tonali Abraham oquitlalili in ixmatcayotl huan noyojqui ijcon oquichiu Isaac ica

iconeu Jacob, huan ojcon oquichiu Jacob ica in mahtlactli huan ome ipiluan aquin in tetatahmen den ololten den Israel.

⁹'Huan inohque ipiluan Jacob tochichicacoluan. Huan se de yehhuan itoca José oquinexicaluiyayahque in icnihuan huan ic inon oquinemacaque. Huan in aquin oquicouque ocuicaque ipan in tlali Egipto. Huan in Dios omopalehui in José. ¹⁰Huan masque molui oquimohsihuahque, oquimaquiaxtiloc in Dios. Oquimacaloc itlanehnehuilis in José huan oquihuelitac in hueyixtoc den Egipto itoca Faraón. Huan in Faraón oquitocahui quen tequihua den Egipto huan ocuicac nochin tequitl ipan ichan in hueyixtoc.

¹¹Ihcuac inon ohuala se hueyi apistli huan oquitlapanoltiyayahque ipan in tlali Egipto huan ipan tlali Canaán, huan tochichicacoluan oquitlamihque tlen quicuahtyesque.

¹²Huan queman Jacob oquicac ic Egipto oncan tlen quicuasque, oquintitlan in tochichicacoluan in acho viaje. ¹³Ic oupa oyahque, José omoteixmatilti ihuan icnihuan. Huan oquinuicac iixpa in hueyixtoc Faraón maquinixmati ichanihcahuan José yehhuan judeahicos. ¹⁴Ihcuac inon José otlatequiuti maquianakan itata Jacob huan nochten ichanihcahuan. Huan yehhuan ocatcahque yehpohuali huan caxtoli tlacatl.

¹⁵Ojcon opanoc huan Jacob oya mochantiya ipan tlali Egipto, canin omic huan satepa omijque oc sequin tochichicacoluan. ¹⁶Satepa oquinuicaque intlacayo ipan

in altepetl Siquem, huan ompa oquintocaque ipan se tlacoyoctli. Inon tlacoyoctli yeh in tlen achto Abraham oquicohuili ipiluan in Hamor ipan altepetl Siquem huan anquimati quesqui ipatiu.

¹⁷Opanoc miyac xihuitl huan opolihuiyaya oc chihton ic quisasque in israeltecos quen Dios omocalacti tetlahtol ihuan Abraham. Huan omomiyaqilihtohque inon tochichicacoluan nepa Egipio.

¹⁸Ihcuac inon omochiu hueyixtoc se tlacatl in aquin ahmo oquixmat in José. ¹⁹Inon hueyixtoc oquincahcadayau in tochichicacoluan huan ahmo oquinmalui. Huan oquiniluic maquintohuetzocan impiluan aquin tlacatis telpocatl, huan ijcon mamiquican huan ahmo mamiyaquilican ocachi inon tlacamen. ²⁰Ipan inon tonali otlatcat in Moisés huan Dios otepacti in conetl. Itata ihuan inana oquiscaltihque ipan ichan cana yiyyi metztli. ²¹Ohualahsic in tonali maquixtohuetzocan, huan oquian in conetl iichpocau in hueyixtoc den Egipio huan oquiyoliti quen ihuaxca. ²²Ic inon, Moisés oquixtlamachtihque ica nochin in tlen oquimatiyahque in tlacamen den Egipio, huan ocatca molui yolchicahuac ica tlen oquihohuaya huan tlen oquichihuayaya.

²³Queman inon Moisés oquipyayaya ompohuali xihuitl, oquinec quinitas ichantlacahuan, yeh in tlacamen israeltecos. ²⁴Ompa oquitac quen se tlacatl egipciohteco oquihuihhuitectoya se itlacaicniu, huan oquipalehui

inon ichantlacau. Omomacuep in Moisés huan ic inon oquimicti in egipciohteco. ²⁵Tleca Moisés oquinehnehuiliyaya mach icnihuan in israeltecos quichihuasque cuenta quen Dios quinmaquixtisque ica yehhuatl, huan yehhuan ahmo oquichiueque cuenta ojconon.

²⁶Ic mostla Moisés omopachoc innahuac ome itlacaicniuhan aquin omotehuihtoyahque huan quen yehhuatl oquinec quinxelos, oquiniluic:

“Namehhuan nanicnimen; ¿tela nanmotehuiyahque se huan oc seya?” ²⁷Ihcuac inon in aquin ahmo oquimalui aquin ihuan omocualantihtoya oquixtopeu se lado in Moisés huan oquiluic: “¿Huan aquin omitztlali cahso quen tequihua huan tlixcomacani ica tehhuanten? ²⁸¿Ticnequi tinechmictis noyojqui quen yalua oticmicti in egipciohteco?” ²⁹Queman oquicac inin, Moisés ocholo huan oya ipan in tlali Madián. Huan ompa ocatca quen sentlapalchani, huan oquimpix ome ipiluan.

³⁰Opanoc cana ompohuali xihuitl huan se tonali ic ocatcayaya ipan se acahualtlahtli inahuac se tepetl itocahyan Sinaí, oquimonextili se ángel ipan itleyo in tletl quen san opanchichina in sahsal.

³¹Moisés quen tel oquimat ica in tlen oquitztehuac huan queman omopacho maquiyequita, otetlahtolcac in Totecohtzin huan oquimihtaluihahuac: ³²“Nehhuatl in Dios den mochichicacoluan, yehhuan Abraham huan Isaac huan Jacob.” Ihcuac inon Moisés opeu

huehueyoca ica moucayotl huan ahmo oixcohyeu quiitas.³³ Huan in Totecohtzin oquimolulic: "Xiquixti motecac tleca canin tiihcatica tlali molui mahuestic.³⁴ Nehhuatl niquitztoc quenin tlapanohuahque nopoluan nepa tlali Egipto, huan nicactoc quen tenahque, huan onitemo ic niquinquixtis. Xihuala tel, huan nimitztitlanis Egipto."

³⁵ Yeh in Moisés aquin acho toquixtlasque huan oquiluihque: "¿Aquin omitztlali cahso quen tequihua huan tlrixcomacani?" Dios oquimotitlanili quen tequihua huan tlamaquixtiyani huan oquipalehui in ángel aquin oquimonextili ipan inon sahsal ipan in acahualtlahtli.³⁶ Yeh in Moisés aquin oquinquixti tochichicacoluan quiahuac in Egipto, huan oquichiu in tlachiuten mahuestic tlen ic quichihuasque cuenta ica in Dios ipan inon tlali, huan ipan in mar itoca Mar Chichiltic, huan ipan in acahualtlahtli cana oc se ompohuali xihuitl.³⁷ Inin Moisés yehhua in aquin oquiniluic in tlacamen den Israel: "Dios mechmohualtitlanilis se tlayolchicauqui quen onechualtitlan nehhuatl, huan yehhuatl quisas se de namehhuan. Xicchihuacan cuenta ica yehhuatl."³⁸ Noyojqui Moisés yeh in aquin ihuan ocatca in tlacamen den Israel ipan in acahualtlahtli, huan ihuan in ángel aquin ihuan otlahito ipan in tepetl itoca Sinaí. Ocatca ihuan tochichicacoluan huan oquiselic in tlahtoli de nemilistli matechpanolti.³⁹ Huan tochichicacoluan ahmo oquinejque quitlacamatisque, huan oquixtlasque huan inyolihtec

yoquinequiyayahque mocuepasque Egipto.⁴⁰ Ic inon oquiluihque in Aarón icniu in Moisés: "Ticnequihque xitechchihchihuili dioses matechyecanacan tehhuan, tleca ahmo ticmatihque tlen oquipanoc inon Moisés aquin otechquixti Egipto."⁴¹ Ihcuac inon oquichihchihuilhque se cuacue tlamachihchiutli huan oquitlaolichtique. Oquinmictilihque yolcamen ic maquimahuestilican inon tlamachihchiutli.⁴² Ihcuac inon Dios oquixohuac den yehhuanten huan omocahuilhque maquimahuestilican in sitlaten den neluicactli. Ojcon ca ipan iamau se tlayolchicauqui canin omoluic in Dios:

Namehhuantzitzin israeltecos, nanquinehnehuiliyahque nannechmahuestiliyahque ihcuac onanquitlaolichtihque ipan in ompohuali xihuitl ipan inon acahualtlahtli.

⁴³ Huan onanquihuicayayahque ipalia in tlamachihchiutli itoca Moloc, aquin onanquimahuestiliyahque ihuan isitlal oc se tlamachihchiutli itoca Renfán, yehhuau tlamachihchiutlen tlen namehhuan onanquichiuque maquimahuestilican. Huan ic inon namechquixtilis namotlal huan namechtlanis ipan tlali Babilonia.

⁴⁴ Ihcuac ocatcahque ipan in acahualtlahtli oquipiyayahque tochichicacoluan in manteado cali quen in tiopan canin oquieuque in itlanahuatil Moisés.

Oquichiuque inon tiopan quen
Dios oquimonextili in Moisés.
⁴⁵ Tochichicacoluan oquiselihque
inon tiopan quen intetlocolil
huan ocualicaque ipan yancuic
intlatl. Yeh in Josué aquin
oquintlicanaltiyaya queman
oquin cuiilihque intlatl in oc sequin
tlacamen aquin Dios oquinquixtiloc.
Ijcon ocatca ihcuac ohualnexohuac
in hueyixtoc David. ⁴⁶ Yehhuatl
oquitlahuelitalo in Dios huan
oquinec quichihchiwas tecaltzin
Dios aquin temahuestiliyahque
ichanihcahuan in Jacob. ⁴⁷ Huan
yeh in iconeu David itoca Salomón
aquin oquichihchiu inon tecaltzin
Dios. ⁴⁸ Huan in Dios aquin ilohuac
neluicac ahmo mochantilo ipan cali
tlamachihchiutli. Quen oquihto se
tlayolchicauqui:

⁴⁹ Mihtohua Totecohtzin,
Nehhua nitequihua ipan
neluicatli canin nimotlaliya,
huan in tlalticpactli yeh in tlen
ipan nicsehuis nocxi.
¿Tlen cali
nannechchihchihiuilisque?
¿Tleca ticnehnehuiliyahque
nicnequis campa nimosehuis?

⁵⁰ Cox, ¿ahmo nehhuatl aquin
oquinmochihchiu nochin inin
tlamantli?

⁵¹ Noyojqui oquiniluic in Esteban:
—Huan namehhuan nochipa
tequin mohsiucamen huan
ahmo nanquitlacamatihque
itlahtoltzin Dios. Namehhuan
nanquichihuahque ijcon quen
namochichicacoluan quen
nochipa nanquixnamiquihque
in Itiotonaltzin Dios. ⁵² Tleca
namochichicacoluan ahmo

oquichiuque cuenta ica intlahtol
inon tetlanonotzcahuan Dios.
Oquinmictihque yehhuan aquin
oquihtohque quen hualuilohuas
in Tlamelajcatzintli Jesús,
huan queman ohualuilohuac,
onantetemactihque matemictican.
⁵³ Ahmo onantetlacamatque,
masque onanquiselihque
in itlahtoltzin Dios tlen
omechpanoltilihque in ángeles.

Quen oquimictihque in Esteban

⁵⁴ Queman in tlacamen oquicajque
inon itlahtol Esteban, ocualanque
hasta omotlancuechohque. ⁵⁵ Huan
in Esteban quiyolquitzquihtoc
Itiotonaltzin Dios, huan oahcotlachix
neluicac huan oquitac in tlanextli
canin ilohuac in Dios, huan oteitac
in Jesús motelquetzalohtoc ipan
iyecmatzin in Dios. ⁵⁶ Ic inon in
Esteban oquihto:

—Xiquitacan, nepa neluicac
niquita in Tetiachicau ica nochin
tlacatl moquetzalohtoc ipan
teyecmatzin in Dios.

⁵⁷ Huan yehhuan omonacastzajque
huan ocoutzahtzihque chicahuac
huan ocualquitzquihque in
Esteban. ⁵⁸ Huan oquiquixtihque
quiahuac ipan in altepetl huan
opeuque quitemacahque. Huan
in motencuanimen oquicautejque
impampijca inahuac in tlahpiyani
den tiopixcamen itoca Saulo.

⁵⁹ Huan ihcuac oquitemacatoyahque,
in Esteban otzahtzic in Dios huan
oquihto:

—Notecohtzin Jesús, xicmoselili
nonemilis.

⁶⁰ Satepa omotlancuaquetz huan
otzahtzic chicahuac:

—Notecohtzin, ahmo xiquinmotlahtlacoltili inin tlacamen.

Huan satepa de ihcuac oquihto inon, omic.

Saulo quincocoliya in tlaneltocanimen

8 Huan Saulo ihuan oquisematiyahque in aquin oquimictihque. Inon tonali opeu se hueyi tlamatecalistli ipan itiotlayehualoltzin ompa Jerusalén. Omoxexelohque nochten inon tlaneltocanimen huan omochayauque ipan in tlali Judea huan Samaria, huan omocauque Jerusalén san yehhuan in tetiotlatitlaniluan. ²Huan oc sequin tlaneltocanimen oquitocaque in Esteban huan molui ic otlocoxque. ³Ijconon Saulo molui oquintlahuelitac in tlaneltocanimen, huan ocalaquiyaya sehse inchahchan huan oquinquixtiyaya ipan cali huan oquintotoxohtaya in tlacamen huan sihuamen, huan oquinuicac ihtech telpiloyan.

Otlanonotzque in yancuic itlahtoltzin Cristo ipan in altepetl Samaria

⁴Huan yehhuan aquin ocholohque Jerusalén otlanonotzayayahque ica in yancuic itlahtoltzin Cristo ic nohuiyan canic oyayahque. ⁵Huan ijcon se tlaxelohuani itoca Felipe oya ipan in altepetl Samaria huan opeu quinnonotza ica in itlahtoltzin Cristo. ⁶Huan in tlacamen omosentlaliyayahque huan nochten oquichiuque cuenta in tlen oquiniluiyaya in Felipe. Huan

noyojqui oquitayayahque quen molui mahuestic in tiotlachiutlen oquichihuayaya. ⁷Tleca oquimpahti miyacten in aquin oquipiyayahque in ahmo cuali yehyecatl. Huan ijcon tzahtzitihue ihcuac oquisayayahque. Noyojqui oquimpahti miyacten aquin mocoupitzquetzcatecan huan in xoneculten. ⁸Huan ipan inon altepetl nochten opactoyahque.

⁹Huan ocatca se tlacatl itoca Simón. Huan omotenextiliyaya tlamatqui. Ijcon oquincahcayahuayaya in tlacamen den altepetl Samaria. Huan oquihtohuaya: “Nele neh nicmati.” ¹⁰Nochin oquineltocayayahque ica yehhua. Ijconon nochten ocualsematque inon tlacatl huelis yehhua ichicahualistzin Dios.

¹¹Huan ica yehhua oquichihuayayahque cuenta, tleca yihuehcau oquincahcayahuayaya ica in tlamatcayotl. ¹²Huan oquineltocaque itlahtol Felipe, quen oquinnonotz ica tetlatequiutilistzin Dios huan quen cuali maquisasque ica Itocahtzin Jesucristo. Huan ic inon omocuatequihque nochten quen tlacamen huan sihuamen. ¹³Noyojqui Simón oquineltocac huan omocuatequi. Huan ijcon oquicuitlapapanuic in Felipe, huan tequin oquihuelitac quen oquichihuayaya ica iman in tlanextilisten huan in tlachiutlen mahuestic.

¹⁴Huan oquimatque in tetiotlatitlaniluan aquin ocatcahque Jerusalén quen oquiselihque itlahtoltzin Dios in tlacamen den Samaria. Oquintitlanque ompa

in Pedro huan Juan. ¹⁵Ihcuac oahsihque, omoyolmachtihque ica in tlaneltocanimen den Samaria, mateselican in Itiotonatzin Dios.

¹⁶Tleca ayamo quinualahsilotoc niyan se de yehhuan. San omocuatequihque ica Itocahtzin Totecohtzin Jesús. ¹⁷Ic inon Pedro huan Juan oquitlalihque inman ipan yehhuan, huan ijcon oteselihque Itiotonatzin Dios.

¹⁸Queman Simón oquitac quen quinualahsitu in Itiotonatzin Dios san ic oquitlalihque inman in tetiotlatitlaniluan, oquinnextili tomin, ¹⁹huan oquiniluic:

—Xinechmaca noyojqui inon tequitl. Ihcuac neh noyojqui nictlalis noman ipan san aquin, yeh noyojqui maquiseli in Itiotonatzin Dios.

²⁰Ihcuac inon oquiluic in Pedro:

—Oachi cuali xiyau mictlan ican motomin tleca ticnehnehuiliya cuali ticoahuas itetlocolil Dios. ²¹Ahmo tlen ticpiya tiquitas ipan inin, tleca ahmo tlamelajcan moyolo iixpa in Dios. ²²Xicahua inon motlahtlacol huan ximotlatlauti tenahuac in Dios tla cana mitztlapohpoluilos ica tlen ticnehnehuilihtoc ipan moyolo.

²³Tleca nicnehnehuiliya tequin tinexicoltic. Ic inon motlahtlacol nesi yimitzilpihtoc.

²⁴Huan ijconon oquinanquilic in Simón:

—Nopampa ximoyolmachtican namehhuan, ahmo tlen nopa maahsi in tlen onannechiluihque.

²⁵In tetiotlatitlaniluan oquchipauque huan otlanonotzque ica itlahtoltzin Dios ipan miyac

altepemen den Samaria, huan omocuepque Jerusalén.

Felipe oquicaquilti se tlacatl den tlali Etiopía

²⁶Satepa de inin, se ángel den Totecohtzin oquiluic in Felipe:

—Xiyau ic tlahtzintla ipan ohtli tlen temohua Jerusalén huan yau ahsí ipan altepetl Gaza.

Yeh in ohtli tlen panohua ipan in hueyi acahualtlahtli. ²⁷Oya Felipe huan ipan ohtli oquinamic se hueyi tequihua den tlali Etiopía. Yeh inon tlacatl itlaeucu in sihuatl hueyixtoc den Etiopía itoca Candace. Inon tlacatl oyahtoya quimahuestiliya Dios nepa Jerusalén. ²⁸Yehhuatl mocueptica ipan ialtepeu, huan yehuatiu ipan se cocoucarro. Huan momachtihui ipan iamau in tlayolchicauqui Isaías. ²⁹Oncan in Itiotonatzin Dios oquiliuic in Felipe:

—Ximohualpacho nonahuac ipan in cocoucarro.

³⁰Huan omopacho Felipe huan oquicac ihcuac oamapouticatca ipan iamau Isaías, huan oquitlahtlani:

—¿Monehnehuiliya tlen momachtilohtica?

³¹In tlacatl oquinanquilic:

—Ahhuel nicnehnehuilis; ahmo oncan aquin nechyequiluis.

Huan oquinotz in Felipe:

—Xihualehco huan ximotlali nonahuac.

³²Oquipoutoya in Itlahcuiloltzin canin quipiya inin:

Ocuicaque quen calnelo ic quimictis, huan omocau

tlamach quen calnelo ihcuac
moichcayotequi.

Niyan ahmo oquitlapo icamac.

33 Oquipinautihque masque ahmo
tlen oquichiu.

Cox, ¿aquin cuali quihtos
ica inon ahmo cuali tlen
oquichihuilihque?

Tleca oquimictihque nican
tlalticpac.

34 In tequihua oquitlahtlanic in
Felipe:

—Nimitztlatlautiya, huan
xinechilui; ¿tlahtohua in
tlayolchicauqui ica san yehhua noso
ica oc seya?

35 Ihcuac inon in Felipe opeu
tlanonotza ipan in Itlahcuiloltzin
canin oquipouticatca in tequihua
huan oquyequiluic in yancuic
tlahtoli ica Jesús. **36** Huan ihcuac
opanotayahque canin ocatca in atl,
oquihto in tequihua:

—Nicanca in atl. Cox, ¿cuali nica
nimocuatequis?

37 Felipe oquinanquilic:
—Cuali tla ic nele moneltoca ipan
moyolo.

Huan oquinanquilic in tlacatl:
—Nicneltoca in Jesucristo
Iconetzin in Dios.

38 Ic inon oquitelquetz in
cocoucarro huan otemohque in
inehuan ipan in atl huan in Felipe
oquicuatequi in tlacatl. **39** Ihcuac
ohualehcotayahque ipan in atl
in Itiotonatzin Dios ocuicaloc in
Felipe, huan ayacmo oquitac in
tlacatl. Huan yehhua ijcon oya
pactiu. **40** Huan Felipe san tlama
oahsihto ipan in altepetl Azoto,
huan opanotaya ipan altepemen
tlanonotztiu in itlahtoltzin den

temaquixtilistli. Huan ijcon oahsic
ipan oc se altepetl itoca Cesarea.

Quen oquineltocac in Saulo

9 Ihcuac inon in Saulo
quintemohtinemi hasta
quinmictis in tlaneltocanimen
ica Totecohtzin. Huan ic inon oya
quita in hueyixtoc den tiopixcamen.
2 Huan oquitlahtlanili in
tlasellarolten tlen ic motemactihiu
inahuac in tequihuahmen ipan
in tiopanten ihtech in altepetl
Damasco, ic mamocahuilican
quintemos in tlaneltocanimen.
Quinualicasquiyani tlatemactilten
in tlacamen huan sihuamen ipan
in altepetl Jerusalén. **3** Huan
ayacmo huehca ic ahsis ipan
altepetl Damasco huan san tlamach
oquitac se tlanextli ohualpetlan
den neluicac. **4** Huan ohuetz tlalpa
in Saulo huan oquicactehuac tlen
cualiluiya:

—Saulo, ¿tleca tinechmateca?

5 Ijcon otetlahtlani in Saulo:
—¿Aquin Tehhuatzin,
Notecohtzin?

Huan oquihualnanquililoc:
—Nehhua niJesús. Yeh in nehhuatl
tinechmateca. San tehhuatl mosel
timocococohtica, quen quichihua in
cuacue ihcuac quitlasa in icxi quen
ihcuac quitzintzapiniyahque.

6 Huan Saulo opapatlacaticatca ica
moucayotl, huan otetlahtlani:

—Notecohtzin, ¿tlen monequi
manicchihuas?

Huan omonanquilic in
Totocohtzin:

—Ximoquetza huan xiyau ipan in
altepetl huan ompa mitziluisque
tlen ticpiya ticchihuas.

⁷Huan tequin omomoutihticatcahue in tlacamen aquin oquicuitlapapanuihtinemiyayahque in Saulo, tleca oquicacteueque tlahtoli huan ahmo aquin oquitaque.

⁸Saniman omoquetztehuac in Saulo, huan yolic ic oyectlahtlachix huan ahhuel tlen oquitac. Ijcon omomaquitzquihtayahque ic oyahque ipan in altepetl Damasco.

⁹Ipan yiyi tonali ahhuel tlen oquitac, huan ahmo tlen oquicua huan niyan tlen oconic.

¹⁰Se tlaneltocani ochantiyaya ipan in altepetl Damasco itoca Ananías. Omoixahsitehuac in Totecohtzin huan omonotz:

—iAnanías!

Huan otenanquilic yehhuatl:
—¿Tlen monequi, Notecohtzin?

¹¹Huan Totecohtzin omoluic:
—Xiyau ipan calle itoca Derecha huan tiahsis ichan Judas. Huan titlahtlanis ica se tlacatl itoca Saulo, ialtepeu itoca Tarso.

Nepa moyolmachtihtoc. ¹²Huan onicmocochnextili se tlacatl itoca Ananías aquin omopacho inahuac huan oquitlali iman ipan yehhua. Huan ijcon matlachiya oc sepa.

¹³Queman oquicac inin, Ananías oquiluic:

—Notecohtzin, nechnonotztoque miyachten ica inon tlacatl, huan ic nochin in tlen ahmo cuali quichiutoc ica tetlapehpeniluan nepa Jerusalén. ¹⁴Huan axan nican ohualahsic ica intlasellarolten den achtohque tiopixcamen. Huan ijcon quinuicanihque tlamactilten nochin yehhuan aquin quineltocahque ica Tehhuatzin.

¹⁵Ic inon omihto in Totecohtzin: —Xiyau, tleca yinicpehpenihtoc inon tlacatl matlanonotza ica nehhua. Quinnonotzas in aquin ahmo judeahtecus ic nohuiyan ipan in tlalticpactli, ihuan inueyixtoque. Huan noyojqui quinnonotzas in tlacamen den Israel. ¹⁶Nicnextilis quen tequin quipiya tlapanos nopampa.

¹⁷Ijcon Ananías oya ipan in cali canin ocatca Saulo. Oquiahsito huan oquitlalili iman ipan yehhua huan oquiluic:

—Tocniu Saulo, Totecohtzin Jesús omitzmonextililoc ipan in ohtli canic otihualaya. Yehhuatzin onechualtitlaniloc ic xitlachiya oc sepa huan mitzualhsisque in Itiotonatzin Dios.

¹⁸Saniman ohuetz in tlen oquimohsiuhuhticatca ipan ixtelolo huan oc sepa cuali otlachix in Saulo. Ic inon omeu huan omocuatequi.

¹⁹Huan satepa otlacua huan omelan oc sepa. Huan omocau sequin tonalten inuan in tlaneltocanimen aquin ochantiyayahque ipan in altepetl Damasco.

Saulo tlanonotza ipan in altepetl Damasco

²⁰In Saulo saniman opeu tlanonotza ipan in tiopanten den judeahtecus. Huan oquiniluic in Jesús Iconetzin Dios. ²¹Nochten aquin oquicacticatcahue quen tel oquimauteueque huan oquihotheueque:

—Nele inin tlacatl yeh in aquin oquinmatecatinemiyaya in tlaneltocanimen den Jesús nepa Jerusalén. Huan nican noyojqui

ohuala maquinana in tlamactilten. Huan quintemactisquiyani inmajco in achtohque tiopixcamen.

22Ijcon Saulo ocachi chicahuac otlanonotzayaya quen Jesús, Yehhuatzin in Cristo Tetlapehpeniltzin Dios. Huan ijcon oquinnontzacuato in judeahtecos aquin ochantiyayahque ipan in altepetl Damasco.

Saulo omaquis inmajco in judeahtecos

23Satepa den miyac tonalten ocualsematque in judeahtecos quen quimictisque in Saulo.
24Huan oquimat yehhuatl. Quen tlahca huan quen tlayohua oquipihpiyahque ipan in puerta canin in Saulo quisasquiyani ipan in altepetl ic quimictisquiyanihque.
25Huan in tlaneltocanimen oquitlalihque iihtectla se hueyi chiquihuitl huan ic tlayohua oquitemohuihque ipan in tepamitl tlen quiyehualohua in altepetl huan ijcon omaquis.

Saulo omocuep Jerusalén

26Queman oahsic Jerusalén Saulo oquinec mosetilis inuan in tlaneltocanimen. Huan yehhuan nochten quimoucaitahque, tleca ahmo oquimatiyahque tla cana yi tlaneltocani. **27**Masque ahmo oquixmatiyayahque, in Bernabé oquinixmatilti in tetiotlatitlaniluan. Oquinnonotz quen Saulo oteitac Totecohtzin ipan in ohtli huan ijcon tehuan otlahtoc. Noyoqui oquinnonotz quen Saulo ahmo oquimohmoutic ic tlanonotzas mateneltocacan ica in Jesús ipan

in altepetl Damasco. **28**Ic inon Saulo omocau ipan in altepetl Jerusalén huan nisic nepic inuan oyaya. **29**Huan ahmo ica moucayotl ic otlanonotzayaya mateneltocacan ica in Totecohtzin. Huan omoixnamijque ic monohnotza ihuan in judeahtecos aquin tlahtohuahque intlahtol in griegohtecos. Ic inon omotemacayayahque ic quimictisque. **30**Queman oquimatzque inon, in tocniuhan ocuicaque in Saulo ipan in altepetl Cesarea, huan oquitlanque ipan oce se altepetl itoca Tarsio.

31Huan ic inon ayacmo oquintzacuiliyahque in tlaneltocanimen ica in Jesús huan omochicauque ipan nochin altepemen ipan tlali Judea huan tlali Galilea huan tlali Samaria. Huan nochten temoucaitztinemihque teixpa in Dios huan oquinyolchicahualoc Itiotonaltzin. Huan ijcon omomiyaquilihque in tlaneltocanimen.

Omopahtic in Eneas

32Quen Pedro oquinchanuihtinemiyaya in tocniuhan, noyoqui oya quinita sequin tetlapehpeniluan Dios aquin ochantiyayahque ipan altepetl Lida. **33**Ompa oquiahsic se tlacatl itoca Eneas, in aquin omocouitzquetzticatca cana chicueyi xiupa. **34**Huan Pedro oquiluic:
 —Eneas, Jesucristo mitzpahtilos. Ximehua huan xicyectlali mopehpech.

Eneas niman omeu. ³⁵Huan oquitaque nochten aquin chantihque ipan in altepemen Lida huan Sarón. Huan oquilcaque in acho intlaneltoquilis huan oquineltocaque itlahtoltzin Totecohtzin.

Quen oihzac in Dorcas

³⁶Ipan inon tonalten ipan in altepetl Jope ocatca se tlaneltocani itoca Tabita, huan ica itlahtol griegohteco oquitocahhuiyayahque Dorcas. Inon sihuatl nochipa oquichiutinemyaya cuali huan oquimpalehuiyaya in prohues.

³⁷Ipan inon tonalten omococo huan omic in Dorcas. Huan queman oquipahpacaque, oquitecaque itlacayo ipan in piso segundo.

³⁸In altepetl Jope ahmo huehca moitzcatacen ihuan in altepetl Lida, canin ocatca in Pedro. In tlaneltocanimen oquimatque yehhua ompa ocatca huan oquintitlanque ome tlacamen mayacan quiluican:

—Xihsihui huan xihuala ic Jope.

³⁹Ic inon Pedro oya inuan.

Queman oahsico, oquihuicahque canin ocatca itlacayo in mijqui. Huan nochten in viudas oquiyehualohque in Pedro huan otzatzahztitezque. Huan oquinextilhque itlaquenuan tlen oquichihchiu in Dorcas ihcuac onemiyaya. ⁴⁰Saniman in Pedro oquinquixtic nochten huan yehhua omotlancuaquetz huan omoyolmacthi. Huan oquitzcaticca in sihuatl mictoc huan oquiluic:

—Tabita, xiihsa.

Ic inon niman oquitlapo iixtelolo huan queman oquitac in Pedro,

omohualeu huan omotlali ipan ipehpech. ⁴¹Pedro oquimaquitzqui huan oquiquetz. Saniman oquinnotz in tocniuhan ihuan in viudas, huan ijconon oquinnextili yolqui. ⁴²Inon omomat nohuiyan ipan in altepetl Jope, huan miyacten oquineltocaque ica Totecohtzin. ⁴³Huan omocau Pedro sequin tonalten ipan inon altepetl, ichan se cuitlaxchihchiuqui itoca Simón.

Pedro oquicaquilti Cornelio

10 Ipan in altepetl Cesarea ocatca se tlacatl itoca Cornelio. Yehhuatl se tlayecanqui ica se ololi den soldados itoca Italianos. ²Inon tlacatl ihuan nochin ichanihcahuan otemahuestilihque Dios huan otetlacamatque. Noyojqui oquimacayaya miyac tomin tlen ic oquimpalehuiyaya in judeahtecus aquin oquimpolohuayaya huan nochipa omoyolmachtiyaya ica Dios. ³Ipan se tonali, cana yihi horahiotlac, oquicochitac yec tlamelajcan se ángel. Ohualcalac in ángel huan oquinotz:

—iCornelio!

⁴Cornelio ic oquitac in ángel omonontzacu ica moucayotl. Huan otetlahtlani:

—¿Notecohtzin, tlen inin?

Huan oquinanquilic in ángel:

—Oquicaquiloc in Dios tlen ic otimoyolmacthi huan quen otiquimpalehuiyaya in aquin oquipolohuaya. ⁵Tel, xiquintitlani motlaquehualuan ipan in altepetl Jope. Maquinotzacan mahuala in Simón, noyojqui itoca Pedro.

⁶Quichampixtoc ichan oc se itoca Simón noyojqui. Yehhuatl se cuitlaxchihchiuqui mochantihtoc inahuac in mar. Yehhuatl in Pedro mitziluis tlen ticchiutiyes.

⁷Ihcuac inon oya in ángel aquin oquinotz. Oquinnotz in Cornelio inehuan aquin oquipalehuichticatcahque huan se soldado yolcuali aquin temahuestiliya in Dios huan moyolohmati ihuan Cornelio.

⁸Oquiniluic tlen oquitac huan satepa oquintitlan ipan in altepetl Jope.

⁹Ic mostla mero oquiahsitohque ipan altepetl Jope. Huan Pedro otlehcoc ipan in cali den sotea cana ic nepantla. Oquinec moyolmachtis.

¹⁰Huan tequin oapismicticatca. Yoquinequiyaya tlacuas huan ic oquichihchihuilihticatcahque itlacual, otlaconchitac. ¹¹Ipan neluicactli oquitac ohualtemohuaya ic tlalpa quen se hueyi manta. Quen se payo tlaquechilpili. ¹²Ihtech inon manta ocatcahque san tlen yolkamen huan totomen. ¹³Ic inon oquicactehuac se tlahtoli tlen oquiluic:

—Ximoquetza Pedro. Xicmicti huan ticusas.

¹⁴Huan in Pedro otenanquilic:
—Ahmo, Notecohtzin,
ahyic nicamahuuya ica tlen
techtlacahualtiya tehhuau
judeahtecos.

¹⁵Huan oc sepa oquicac inon tlahtoli huan oquiluic:

—Queman Dios mihtos ayacmo quintlacahualtihtoc, tehhuatl ahmo xiquixtlasa.

¹⁶Ijcon opanoc yexpa, huan inon manta omocuep ic

neluicac. ¹⁷Huan Pedro molui omonehnehuilihticatca tlen inon oquitac. Huan niman oahsicohque caltenco itlanahuatilan Cornelio.

Ijcon ohualahque tlahtlantihuitzen canin ichan Simón. ¹⁸Ihcuac yotlahtoteque, otlahltlanque chicahuac in tla ompa yetoc seja itoca Simón Pedro. ¹⁹Ijcon Pedro oc monehnehuilihtica in tlen oquicochitac queman in Itiotonatzin Dios oquimoluilic:

—Xicaqui, mitznotzahque yiyyi tlacamen. ²⁰Xitemo huan xiayu inuan. Huan ahmo xicchiconehnehuili niyan chihton tleca nehhuatl notlatitlaniluan.

²¹Ijcon Pedro otemic huan oquinahsito itlatitlaniluan Cornelio huan oquiniluic:

—Nehhuatl in aquin nanquitemohuahque. ¿Tlen ic onanualahque?

²²Yehhuan oquinanquilihque:
—Otechualtitlan in tlayecanqui Cornelio. Yehuatl se cuali tlacatl molui quimahuestiliyahque huan temoucaita in Dios. Nochten in judeahtecos quihuelitahque huan quitlasohtlahque. Se ángel oquiluic matenotza mahuilohua ichan, huan yehhuatl maquicaqui yec in tlen tiemoluilis.

²³Ijcon oquinsehui in Pedro, huan ihuan omocauque inon tlayohua. Huan ic mostla Pedro inuan oya, huan oquiyolchicauque sequin tocniuhan aquin ochantiyayahque ipan in altepetl Jope.

²⁴Ic huiptla oahsitohque ipan altepetl Cesarea canin oquinchixtoya in Cornelio inahuac se ololi den ichanihcahuan huan

itenonotzcahuan melahuac.

Nochten itetlatlautiluan.

²⁵ Queman Pedro oahsic ichan in Cornelio, yehhua oquisehui huan omotlancuaquetz iixpa maquimahuestili. ²⁶ Huan Pedro oquiquetz huan oquiluic:

—¡Ximoquetza! Nehhuatl noyojqui nitlacatl quen tehhuatl.

²⁷ Ic ihuan omonohnotzicatca, ocalac in Pedro huan oquinuitac miyacten tlacamen ompa omosentlalihque. ²⁸ Ijcon Pedro oquiniluic:

—Yinanquimatihque techtlacahualtilohtoc tehhuan judeahtecus ica totlanehnehuilis matimone locan inuan in sentlapalchanimen. Niyan ahhuell ticalaquisque inchan. Huan Dios onechnextililoc ahmo niquixtohuetzos niyan aquin. ²⁹ Ic inon san quen onannechnotzque onihualla, niyan nitlahtolchihua. Huan axan onihualla nicmatis tlen ica onannechnotzque.

³⁰ Ic inon oquinanquilic in Cornelio:

—Yipanotoc nahue tonali ic inin hora nican onicatca nochan onimosauticatca. Huan onimoyolmachticatca ipan yi yi horahtiotlac, quen mostli. Huan oniquitac noixpa se tlacatl tzotzotlaca itlaquen.

³¹ Huan onechiluic: “Cornelio, in Dios no omocac in tlen otimoyolmachi, huan molnamiqui quen otiquimpalehui in aquin oquimpolohuaya. ³² Xicanacan Simón Pedro ipan in altepetl Jope. Ompa quichampixtoc in oc se Simón, se cuitlaxchihchiuqui aquin

chanti inahuac in mar. Queman hualas, mohuan monohnotzas.”

³³ Ijcon onitlatitlan ihsuican mamitztemocan, huan ocachi cuali yohualuilohuac. Axan tinochten nican ticateen teixpa in Dios huan ticnequihque ticaquisque nochin tlen Totecohtzin teiluilohtoc technonotzasque.

In Pedro opeu tlanonotza ichan in Cornelio

³⁴ Ic inon Pedro opeu quinnonotza huan oquiniluic:

—Axan nicnehnehuiliya ic nele Dios ahmo techchichicotla sohtlalo.

³⁵ Huan moseliya masque aquin temoucaita huan mochihua in tlen cuali. Ahmo mochihua cuenta de canin chani. ³⁶ Dios oquinnonotzaloc ica in cuali itlahtoltzin. Yeh in Jesucristo aquin otechnextililoc quen otechyequitaloc in Dios. Huan Yehhuatzin Totecohtzin tinochten.

³⁷ Yinanquimatihque tlen opanoc ipan intlal in judeahtecus. In Juan otlanonotzayaya matlacuatequican huan satepa ihcuac inon, in Jesús tealtepeu itoca Nazaret ohualquixohuac in tlali Galilea.

³⁸ Nanquimatihque quen Dios otemacaloc techicahualistzin in Itiotonaltzin Dios huan quen omochiutinemiaya tlen cuali huan omopahtihtinemiyayahque in aquin otlapanolticatcahque ica ichicahualis in ahmo cuali tlacatl. Ijcon omochihuaya tleca Dios tehuan ohuiloahuayaya.

³⁹ Huan tamechmacaticaten cuenta nochin tlen omochiu in Jesús quen nohuiyan ic Judea

huan ipan in altepetl Jerusalén. Huan satepa otemictihque. Ijcon otemasohualtihque ipan in cruz.

40 Huan Dios oteyolitihque ipan yi yi tonali huan otechmonextililoc.

41 Ahmo oquinmonextililoc nochin tlacamen, tlahmo san tehhuan aquin Dios otechtlapehpeniloc de acho to ic ticchipahuasque. Ihcuac oyolihuac den mijcamen tehuau otitlacuahque.

42 Huan otechtequiutiloc matiquonnotzca can in tlacamen huan matitlate mactican quen Dios otetocahhuihque Yehhuatzin Jesús quen Tlixcomacani ica in tlacamen huan in mijcamen.

43 Noyojqui de yihuehcau nochin tetlayolchica cauhuan Dios otechnextilihque quen hualuilohuas in Jesús. Oqui tohque nochin aquin quinelto casque ica itlahtoltzin quintlapohpoluilos intlahtlacol.

**Quiseliyahque in Itiotonaltzin
Dios in aquin ahmo judeahtecos**

44 Pedro oc tlano notztica ihcuac oquinualahxiltiloc in Itiotonaltzin Dios nochin yehhuanten aquin oquicacticatcahque itlahtol. **45** Huan ic inon quen tel oquimautejque in tlaneltocanimen judeahtecos aquin ihuan ohualahque in Pedro. Tleca ijcon in Itiotonaltzin Dios noyojqui oquinualahxiltiloc inin tlacamen, masque ahmo judeahtecos. **46** Tleca inon judeahtecos oquincaquiyayahque oc seseya ic tlahtohuahque huan ic temahuestiliyahque in Dios. **47** Ijcon in Pedro oquintlahtlani:

—Cox, ¿concan aquin cuali quintzacu ilis ic mocuate quisque

inihque tlacamen? Tleca yehhu an oteseli hque in Itiotonaltzin Dios sajcon quen tehhuan.

48 Huan oquiniluic mayacan mocuatequican ica Tetocahtzin Jesucristo. Huan satepa oquitlatlautihque Pedro mamocahua inuan se quesqui tonali.

**Quimati ltiya in Pedro ipan
in tetiotlayehualoltzin
Dios nepa Jerusalén**

11 In tetiotlatitlaniluan huan in tlaneltocanimen aquin ocatcahque ipan in tlali Judea oquicajque quen sequin tlacamen ahmo judeahtecos noyojqui oquiseli hque itlahtoltzin Dios.

2 Huan ihcuac omocuep Jerusalén in Pedro, oquitlahtolchihuihque in tlaneltocanimen judeahtecos.

3 Oquitlahtlanihque:

—¿Tleca otiya tiquinita yehhu an aquin sentlapalchanimen, huan inuan otitlacua?

4 Ic inon in Pedro oquintlamino notz nochin tlen opanoc. Oquiniluic:

5 —Onicatca ipan altepetl Jope, huan ihcuac onimoyolmachihticatca, onicoco chitac. Huan oniquitac nesi quen se hueyi manta. Ohualtemohuaya ic neluicac huan oilpih toya naucan ipan iyecac huan onechualahsic. **6** Ihcuac onitlachix yec oniquinitac iihtectla ompa ocatcahque san tlen yolcamen huan totomen. **7** Huan onicac se tlahtoli tlen onechiluic: “Ximoquetza Pedro. Xicmicti huan ticusas.” **8** Huan onicteluic:

“Ocachi cuali ahmo, Notecohtzin, tleca ahyic nicamahuiya tlen techtlacahualtihtoque.” ⁹Ic inon oc sepa onechiluiloc: “Queman Dios omihto: Ayacmo mechtlacahualtihtoc; tehhuatl ahmo xiquixtla.” ¹⁰Ijquin opanoc yexpa, huan saniman omocuep ic neluicac inon manta. ¹¹Ic inon hora oahsitolque yiyi tlacamen ipan in cali canin onicatca. Oquinualtitlanque den altepetl Cesarea, manechtemocan. ¹²Huan Itiotonatzin Dios onechtitlaniloc inuan huan ahmo tlen manicchiconehnehuili. Noyoqui nohuan oyahque inohque chicuasin tocnihuan. Tinocchten oticalajque ichan inon Cornelio. ¹³Otechnonotz quen nepa ichan oquitztoya se ángel oicatoya huan oquiluic in Cornelio: “Xiquintitlan in tlacamen ipan in altepetl Jope maquinotzacan in Simón Pedro. ¹⁴Huan yehhuatl mitziluis quenin cuali mechmaquixtisque tehhuatl huan nochin mochanihcahuan.” ¹⁵Ihcuac onipeu niquinnonotza, oquinualhxiltiloc Itiotonatzin Dios quen otechualahxiltiloc achto. ¹⁶Ic inon oniquilnamic quen otechiluiloc Totecohtzin: “Ic nele in Juan otlacuatequi ica atl, huan namehhuan mechcuatequilos ica Itiotonatzin Dios.” ¹⁷Tla Dios ijcon oquinmacaloc noyoqui in tlen otechmacaloc tehhuan aquin otiteneltocaque Totecohtzin Jesucristo, ahhuel niteixnamiquis Dios.

¹⁸Ic inon ihcuac in tocnihuan oquicajque inon tlahtoli, ayacmo tlen oquihtohque huan

otemahuestilihque in Dios.

Oquihtohque:

—Ijcon quiqtosnequi Dios noyoqui oquincahuililoc mamoyolcuepacan in tlacamen ahmo judeahotecos huan ijcon maquipiyacan in nemilstli nochipa.

In tetiotlayehualoltzin Dios den altepetl Antioquía

¹⁹Ihcuac oquimictihque in Esteban, opeuque quinmatecaque in oc sequin tlaneltocanimen. Sequinten omoxexelohque huan oahsique in tlali Fenicia, huan oc sequin in tlali Chipre. Huan oc sequin oahsique ipan in altepetl Antioquía. Ompa otlanonotzque ica san yehhuan in judeahotecos ica itlahtoltzin Dios. ²⁰Huan sequin tlaneltocanimen inchan Chipre huan Cirene oahsitolque Antioquía. Huan otlanonotzque ihuan in masehualten ica itlahtoltzin Dios. Oquinmachtihque itlahtoltzin Jesucristo ijcon quinmaquixtilos. ²¹Techicahualis Totecohtzin ica oquimpalehuiloc, huan ijcon miyaquin oquilcaque in achto intlaneltoquilis. Oteneltocaque Totecohtzin.

²²Ihcuac in tlaneltocanimen ipan itiotlayehualoltzin Jerusalén oquicactejque tlen opanoc Antioquía, niman oquititlanque in Bernabé mayau quinita. ²³Ihcuac oahsic in Bernabé, oquitac quen Dios oquintiochihualoc, huan tequin opac. Oquinyolchicahuato nochten mayecan yolcuali teixpa in Dios. ²⁴Tleca in Bernabé se cuali tlacatl huan molui quipixtoc Itiotonatzin Dios. Huan yec

oteneltocac. Ic inon miyac tlacamen oteneltocaque Totecohtzin.

²⁵Ihcuc ac inon, in Bernabé oya quitemohua in Saulo ipan in altepetl Tarso. Queman oquiahsic, oquihuicac Antioquía. ²⁶Ipan sentetl xihuitl ocatcahque inuan in tlaneltocanimen, huan oquinmachtihoyahque miyacten. Yeh in Antioquía canin acho oquitocahhuiyahque cristianos in tlaneltocanimen tleca nentinemihque quen Cristo.

²⁷Ipan inon tonalten oquisque Jerusalén sequin tetlanonotzcahuan Dios huan oahsitzohque Antioquía. ²⁸Seya itoca Agabo omoquetz inepanco in tlaneltocanimen. Huan ica tetlanehnehuilis Itiotonatzin Dios oquihto mach ahsiquiu se mayantli nohuiyan. Huan ijcon opanoc ipan in tonalten den hueyixtoc Claudio. ²⁹Ic inon in tlaneltocanimen ipan Antioquía oquinehnehuilihque quimpalehuisque in tocnihuan aquin chantitoque ipan in tlali Judea, quen cuali quitemaca seya. ³⁰Huan ijcon oquichiuque, huan oquintitlanilihque intetlapalol inmajco in Bernabé huan Saulo. Yehhuan oquimactilihque in tlayecancamen ipan itiotlayehualoltzin nepa Judea.

Quimictihque in Jacobo huan oquitzactoyahque in Pedro

12 Ipan inon tonalten in hueyixtoc Herodes oquinmohsihui sequin tlaneltocanimen. ²Oquitequiuti maquimictican in Jacobo, icniu in Juan. ³Huan quen

oquinehnehuili oquimpacti in judeahtecos, oquintequiuti noyojqui maquiquitzquican in Pedro. Inon opanoc ipan in iluitl ihcuac oquicuahque in pantzin in tlen ahmo semautoc. ⁴Ihcuc ac oquiquitzquihque in Pedro, in hueyixtoc Herodes otlatitlan maquitzacuacan ipan in telpiloyan. Huan oquipihpixticatcahque huan omopapatlaticatcahque in nahue ololten ica nanahue soldados. Oquinehnehuiliyaya quitemactini maquimictican maquipano iilui in judeahtecos itoca pascua. ⁵Ijcon in Pedro oquitzactoyahque huan oquiyecipihpixticatcahque. Huan in tlaneltocanimen mostli omoyolmachtihicatcahque huan molui omotlatlautihticatcahque ica yehhuatl.

Dios momaquixtiya in Pedro ipan in telpiloyan

⁶Ipan in tlayohua acho den tonali ihcuac in Herodes quitemactini, cocochtoya in Pedro inuan ome soldados. Oquilpihtoyahque ica ome cadena huan oquipihpixtihticatcahque oc sequin soldados. ⁷Ihsiuac oquimonextili se ángel den Totecohtzin huan otlanextehuac ipan in telpiloyan. In ángel oquiahcolquitzqui ic oquihxiti huan oquiluic:

—Ximehua ihsiuacan.

Ic inon oquimacahcautehuac in cadenas. ⁸Huan in ángel oquiluic ocachi:

—Ximotlahcoilpi huan xictlali motecac.

Ihcuc ac ijcon oquichiu in Pedro, in ángel oquiluic:

—Xictlali mopampijca huan xinechcuitlapanui.

⁹ Huan Pedro oquis tlacuitlapa den ángel, niyan ic oquimat tla nele melahuac in tlen quichihua in ángel. Oquimonenextili quen oquicochitac. ¹⁰ Huan opanoque in achto ololi den soldados huan niman ipan in oc se ololi. Huan ihcuac oahsihque ipan in puerta den tepostli tlachixtica ic ohtli, inon puerta isel omotlapo. Oquisque huan ihcuac onehnенque oc chihton ipan in ohtli, in ángel oquicautehuac in Pedro. ¹¹ Ic inon in Pedro oixtlamautehuac huan oquihto:

—Axan nicnehnehuiliya melahuac Totecohtzin omohualtitlan teángel para nechmaquixtis iixpa in Herodes huan ojcon ayacuel tlen nechchihuilisque in judeahicos.

¹² Oquiyolnehnehuilihticatca in Pedro ic inon huan oahsic ichan María, inanatzin

Juan Marcos. Huan nepa omosentlalihtoyahque miyacten ic omoyolmachtihtoyahque. ¹³ Ihcuac otlixcalani ipan in puerta den sahuan, se ichpocatl itoca Rode oquinahualitac aquinon. ¹⁴ Huan queman oquitencac in Pedro, ahmo oquitlapo in puerta. Ica paquilistli otzecuin tlahtec quinnahuatiya ichanihcahuan mach Pedro ocatca iixco in puerta. ¹⁵ Ijcon oquiluihque in ichpocatl:

—iOtimonacaspatlac!

Huan in ichpocatl oquintlaneltoctiyaya ic nele yehhuatl in Pedro. Huan yehhuan ahmo oquineltocaque huan oquihtohque:

—Ahmo yehhuatl; yeh in itonal.

¹⁶ Huan Pedro san ijcon oquichiuticatca huan ihcuac yoquitlapoluihque, oquitaque huan quen tel oquimauteuque. ¹⁷ Huan yehhuatl oquinchihuili senyas ica iman mamocahuacan, huan oquinnonotz quen Totecohtzin omoquixtic ipan in telpiloyan. Huan oquiniluic:

—Xiquiluican inin in Jacobo ihuan in tocnihiuan.

Huan ic inon oquis in Pedro huan ijcon oya oc se lado.

¹⁸ Ihcuac yiayu tlatui, tequin oixpoliuque in soldados tleca ahmo oquimatque tlen opanoc ica in Pedro. ¹⁹ Herodes otlatitlan maquitemocan huan quen ayacuel oquiahsic, oquintlahtlanic in soldados tlen opanoc. Otlatitlan Herodes maquinmictican in tlixpiyanimen. Satepa inon Herodes oquis Judea huan omochantihto Cesarea.

Quen omic in Herodes

²⁰ Ocualantoya in Herodes ica in tlacamen den altepemen Tiro huan Sidón. Huan yehhuan oquisematque quen quiyolcuepas in Herodes. Omosetilhque ihuan se itequihuahicniu Herodes itoca Blasto. In Blasto inca otlahto inon tlacamen iixpa in Herodes, tleca Herodes oquintecpanohuaya hasta inuan ocualan. ²¹ Herodes oquintlatilanili mahualacan quimatican tlen tonali. Huan ipan inon tonali omotlaquenti ica cuahcuali itlaquen huan omotlali canin tlixcomaca huan oquinnonotz. ²² Ijcon in tlacamen opeueque nahuatihque chicahuac:

—iInin aquin tlahtohua ahmo san tlacatl, in tlahmo se dios!

²³Ipan inon hora se ángel den Totecohtzin oquicoco in Herodes. Tleca ahmo oquitemacac in mahuesyotl in Dios. Yehhua ooculteyin ic omic.

²⁴Huan itlahtoltzin Totecohtzin omochayautaya huan otlanonotzayahque nohuiyan.

²⁵Bernabé huan Saulo oquitlamihque intequi ic tlen oyahque Jerusalén huan omocuepque Antioquía. Inuan oyahyaya in Juan aquin noyojqui itoca Marcos.

**Bernabé huan Saulo
oquintitlanque matlanonotzacan
ipan oc sequin tlalten**

13 Ocatcahque tetlanonotzcahuan huan tlamachtiyanimen ipan tetiotlayehualoltzin Dios tlen ocatca Antioquía. Yehhuan Bernabé, huan Simón aquin noyojqui oquitocahhuiyaya Negro, huan Lucio ialtepeu Cirene, huan Manaén, huan Saulo. In Manaén yeh in aquin oyol ichan in hueyixtoc Herodes.²Ipan se tonali ihcuac omosentlalihtoyahque mamoyolmachtican huan mamosahuacan, in Itiotionaltzin Dios oquinmoluilic:

—Xinechsecnintlalilican in Bernabé huan Saulo ica in tequitl tlen yiniquiniluhtoc.

³Ic inon ocachi omoyolmachtihque huan omosauque huan oquintlalilihque inman impan Bernabé huan Saulo, quihtosnequi maquinyolchicahualo

ica inon tequitl. Ijcon omomatlapalohque ic oyahque.

**In tetiotlatitlaniluan tlanonotzahque
ipan in tlali Chipre**

⁴Satepa quen inon Itiotionaltzin Dios oquintitlaniloc in Bernabé huan Saulo, oyahque tel ipan in altepetl Seleucia huan de ompa oquisque ipan barco oahsique ipan in tlali inepanco in atl itoca Chipre.

⁵Ihcuac oahsique ompa itentla in atl ca se altepetl itoca Salamina. Ompa opeuke tlanonotzahque ica itlahtoltzin Dios ipan tiopanten den judeahtecus. Juan noyojqui oyaya inuan quen intepalehuicau.

⁶Onemiyayahque ipan inon tlali hasta oahsique ipan in altepetl Pafos. Ompa ocahsitohque se judeahteco itoca Barjesús.

Yehhua se tlamatqui. Molui tlacahcayaqui tleca oquiuhuaya mach ocatca tetlanonotzcau Dios.⁷Inon tlamatqui ocatca ihuan in hueyixtoc Sergio Paulo. Yehhuatl se tlacatl molui tlanehnehuilisyo. In hueyixtoc otlatitlan

maquinnotzacan in Bernabé huan Saulo, tleca oquinequiyaya quicaquis itlahtoltzin Dios.⁸Huan inon tlamatqui, aquin noyojqui itoca Elimas, oquinixnamic ahmo maquitlaneltocti in hueyixtoc.

⁹In Saulo, noyojqui itoca Pablo, molui quipixtoc Itiotionaltzin Dios.

¹⁰Yehhua oquyequixitac in Elimas huan oquiluic:

—Titlacahcayaqui; ticoneu in ahmo cuali tlacatl. Tehhuatl tiquixnamiqui nochin tlen cuali. Ocachi cuali ximocamasehui huan ayacmo xiistlacatlahohtinemi ica

itlahtoltzin Totecohtzin.¹¹ Axan tel, Totecohtzin mitztlapanoltisque, huan timochihuas tipopoyotl se quesqui tonali.

Saniman ihtech otlapoyau, huan oquitemohuaya seja aquin maquimaquitzquitiu tleca ayacuel tlachiya.¹² Queman oquitac inon tlen opanoc, in hueyixtoc niman oquineltocac tleca tequin otehueltili itlahtoltzin Totecohtzin.

Pablo huan Bernabé oahsicohque ipan in altepetl Antioquía de Pisidia

¹³ Pablo huan yehhuan aquin ihuan oyahyaya oquisque ipan altepetl Pafos ipan barco, huan oahsikhque ipan altepetl Perge tlen ca ipan in tlali Panfilia. Huan in Juan Marcos oquincautehuac huan omocuep Jerusalén.¹⁴ Satepa de inon oquisque de Perge huan oyahque ipan in altepetl Antioquía ipan in tlali Pisidia. Huan ipan in tonali den nesehuilistli den judeahicos ocalajque ipan in tiopan de yehhuan huan ompa omosehuihque.¹⁵ In tequihuahmen den tiopan oquimpohuilihque in itlanahuatil Moisés huan intlahtol tetlayolchicaucahuan Dios. Huan satepa queman otlan ic inon, oquintlatitlanilihque in Pablo huan Bernabé huan oquiniluihque:

—Tocnihuan, tla oncan tlen tlahtoli ic nantechyolchicahuasque, cuali nantechnonotzasque axan.

¹⁶ Ijcon omotelquetz in Pablo huan oquiahcoc in iman ic yau quinnonotza:

—Xicaquican, nomasehualicnihuan, ihuan nochten aquin temoucaitahque

in Dios.¹⁷ Tohueyitahtzin Dios oquintlapehpeniloc tochichicacoluan. Oquinmiyaquililoc ihcuac ochantiyahque ic sentlapal ipan in tlali Egipto. Huan satepa oquinquixtiloc ipan inon tlali ica techicahualis.¹⁸ Huan Dios omoxico intlamachilis cana ompohuali xihuitl ipan in hueyi acahualtlahtli.¹⁹ Huan omoxitinilihque in chicome ololten den tlacamen aquin ochantiyahque ipan in tlali Canaán huan oquinmacaloc in tlali in tochichicacoluan.²⁰ Huan satepa ipan nahue ciento xihuitl huan tlahco, Yehhuatzin oquimotlalili in tlixcomacanimen hasta itonal in tlayolchicauqui Samuel.²¹ Ijconon otetlahtlanilihque in Dios: “Xitechmomaquila se in hueyixtoc matechtequiutis.” Huan oquinmacaloc in Dios in hueyixtoc Saúl ipan ompohuali xihuitl. Yehhuatl iconeu Cis, se tlacatl den ichanihcahuán Benjamín.²² Huan satepa Dios oquiquixtilo in Saúl, huan omotlali hueyixtoc in David. Huan Yehhuatzin omihto: “Axan nele nechpactiya inin David, iconeu Isaí, tleca quichihuas nochin tlen nicnequi.”²³ Huan se ichichicaixiui inon David yeh in Jesús. Huan Dios omotlali Yehhuatzin ic quinmaquixtilos in tlacamen den Israel, quen omihto.²⁴ Ihcuac ayamo hualuilohuahtoc in Jesús, in Juan Tlacuatequiyani yoquinnonotz in tlacamen den Israel. Oquiniluic: “Mamopatla namotlamachilis ic nanmocatequisque.”²⁵ Huan ihcuac imiquilistempa, in Juan Tlacuatequiyani oquihto:

“Ahmo nehhua in Cristo quen nanquinehnehuiliya. Huan satepa de nehhua hualuilohuas Yehhuatzin huan ahmo tlen noquisca niyan ic nimochihua tetlapalehuiyani.”

²⁶Huan techichicaixuihuan namehhuan techichicaixuihuan Abraham, ihuan nochin aquin temoucaitasque in Dios. Huan tecchtitlanilihoc inin tlahtoli den tlamaquixtilistli. ²⁷Huan in aquin omochantiyayahque Jerusalén niyan itlayecancahuan ahmo oteixmatiyayahque in Jesús. Niyan oquinehnehuiliyahque tlen quihtosnequi in tlahcuiloli den tetlayolchicaucahuan, masque quipohuasque ic chichicueyi den nesehuilistli. Ijcon yehhuan oquitzonquixtique inon tlahcuiloli ihcuac otetlahtlacoltihque in Jesús. ²⁸Huan masque ahhuel otechipahuilhque niyan tlen ic temictisque, oquitlahtlanihque in Pilato matlatequiuti ic matemictican. ²⁹Queman otechihuilihque nochin tlen tlahcuilohtoc, otetemohuiahque ipan in cruz huan otehuicaque tetocabque. ³⁰Huan Dios oteihxitiloc ipan in mijcamen. ³¹Huan ic huehcau sequin tonalten in Jesús oquinmonextili in aquin tehuan onemiyayahque ihcuac onemohuac ic Galilea huan Jerusalén. Huan axan yehhuan tlanonotztinemihque ica itlahtoltzin Dios.

³²Huan tehuan tamechnonotzahque ica in cuali tlahtoli; inon tlahtoli oquinmaque tocoluan. ³³Inon tlen yomotzonquixti ica tlen

achto techiluilohtoc tehhuan in titeixuihan, quen yoteihxitiloc in Jesús. Quen ca tlahcuilohtoc noyojqui ipan in salmo ome, quen Dios oteiluiloc: “Tehhuatl tinoconeuy; yonimitzpehpeni matlatequiutiya in tlacamen.” ³⁴Huan quen nele oteihxitiloc ipan in mijcamen, ahyic ocachi mapalani tetlacayo, ijconon omihto: “Nimitzyecmacas in tlatiochihualistli quen oniquiluhtoya in David.” ³⁵Ic inon ca tlahcuilotoc ipan oce Salmo quen tla omihtoc in Jesús: “Ahmo mocahuilis mapalani in notlacayo in aquin Tlamelajcatzintli Teconetzin.” ³⁶Tleca David oquipalehui ialtepeu quen oquinextililoc in Dios, huan satepa omic, huan inahuac oquitocaque in itatahhuan, huan opalan itlacayo. ³⁷Huan inon aquin oteihxitiloc in Dios, ahmo opalan tetlacayo. ³⁸Xicyecmatican nocnihuan, ipampa inin Jesús, tamechnonotzasque quen mechtlapohpoluisque namotlahtlacol. ³⁹Yehhuatzin cuali quintlapohpoluilos intlahtlacol nochin in aquin teneltocasque, masque ica itlanahuatil Moisés ahhuel quixtlapachosque intlahtlacol. ⁴⁰Ximomaluican tel, ahmo mamechahsi inin tlen oquihcuilohque in tetlayolchicaucahuan quen omihto in Dios:

⁴¹Xiquitacan namehhuan aquin ahmo tlacaqui; xicchihuacan cuenta quen nampolihuisque. Tleca nicchihuas se tequitl ipan namotonal, huan inon tequitl

ahmo nanquinelto casque
masque seja mechnonotzas.

⁴²Huan ihcuac oquisque in Pablo huan Bernabé, oquintlahtlanilihque in tlacamen maquinnonotzacan ica inin tlahtoli ipan chicueyi tonali, yeh den nesehuilistli. ⁴³Ihcuc yomoxexelohque in tlacamen den tiopan, oquinquitlapanuihque in Pablo huan Bernabé miyaquin judeahtecus ihuan in aquin ijcon oquineltocaque. Huan yehhuan oquinnonotzayayahque mamoquezacan chicahuac ica tetlasohtlalis Dios.

⁴⁴Huan ipan chicueyi tonali omosentlalihque nochten den altepetl ic maquicaquican itlahtoltzin Dios. ⁴⁵Huan ihcuac oquitaque in judeahtecus in miyac tlacamen omosentlalihtoyahque, ocualanke huan opeuque ica tlatlahuahque in Pablo huan oquipactecayayahque. ⁴⁶Ihcuc inon omoixcohyehuihque in Pablo huan Bernabé ic oquiniluihque:

—Huelica otamechnonotzque achto ica itlahtoltzin Dios, huan quen ahmo nanquinequihque nanquiselisque in tlen ic nancahsisquiyanihque in nemilistli nochipa, tehhuan tiyasque tiquinnotzasque in aquin ahmo judeahtecus. ⁴⁷Tleca ijcon otechualtitlaniloc in Totecohtzin huan omiho:

Nimitztlalihtoc quen tlanextli ic maquinehnehuilcan in aquin ahmo judeahtecus.

Maticualicacan in tlamaquixtilistli ic nohuiyan ipan in tlalticpactli.

⁴⁸Ic oquicajque in tlacamen aquin ahmo judeahtecus, opajque

huan opeuque quiuhuahque cualtzin itlahtoltzin Totecohtzin. Huan oquineltocaque nochin

yehhuan in aquin tlatlalili den Dios macahsican in nemilistli nochipa. ⁴⁹Huan ijcon omochayau in itlahtoltzin Totecohtzin ic nohuiyan ipan inon altepemen.

⁵⁰Huan oquinolchicauque in judeahtecus inon sihuamen molui tlaneltocanimen de yehhuan huan aquin hueyi inquisca, maquinmohsihuican in Pablo huan Bernabé. Huan ic inon oquintotocaque ipan inon altepemen. ⁵¹Huan in Pablo huan Bernabé omoxotzehtzelohque ica in teutli ic maquichihuacan cuenta ica intlahtlacol inon tlacamen, huan oyahque ipan in altepetl Iconio.

⁵²Huan in tlaneltocanimen molui oyolpajque ica in Itiotonaltzin Dios.

Pablo huan Bernabé ipan in altepetl Iconio

14 Ipan in altepetl Iconio in Pablo huan Bernabé ocalajque sansecnin ipan in tiopantli den judeahtecus. Huan oquinnonotzque miyac, huan sequin oquineltocaque huan sequin ahmo. ²Huan inohque judeahtecus aquin ahmo oquineltocaque oquinolchicauque yehhuan aquin ahmo judeahtecus, maquinehnehuilcan ahmo cuali in tlaneltocanimen. ³Ic inon omocauque yehhuan nepa miyac tonalten, huan omoixcohyehuihque ic oquinnonotzque ica itlahtoltzin Dios, tleca otetemachihque in Totecohtzin. Huan Tohueyitahtzin oquinmactilo in chicahualistli maquichihuacan

in tlachiutен mahuestic huan in tlaistlacolten. Ijcon oquinnextilihque quen Dios otlahuelitalo ic tlen oquinonotzayayahque. ⁴Huan omoxehxelohque in tlacamen den altepetl. Sequin oquimpalehuiyahque in judeahotecos huan oc sequin oquimpalehuiyahque in tetiotlatitlaniluan. ⁵Ic inon sequin judeahotecos huan sequin in aquin ahmo judeahotecos san ocualsematque ihuan in tequihuahmen maquimpinautican huan maquintemacakan. ⁶Huan ic oquimatque in Pablo huan Bernabé, ocholohque ic Listra huan ic Derbe, ome altepemen den tlali Licaonia huan ipan in tlalten tlen quiyehualohua inon altepemen. ⁷Huan nepa noyojqui oquinnonotzayayahque in tlahtoli den tlamaquixtilistli.

Oquitemacaque in Pablo ipan in altepetl Listra

⁸Ipan in altepetl Listra ocatca se tlacatl aquin ahuel onehnemiyaya tleca inon tlacatl cuecueltic ic otlacat, huan ahyic onehnen. ⁹Inin tlacatl oquicactoya in tlen Pablo oquihtohuaya huan Pablo oquiequitac huan oquinehnehuili cana quineltocas ic pahtis. ¹⁰Ic inon oquilaic in Pablo ica chicahuac itlahtol:

—Ximoquetza yec ica in mocxi.

Huan in tiacatl saniman omoquetz huan niman opeu nehnemi. ¹¹Ic oquitaque in tlen oquichiu in Pablo, in tlacamen opeuque tzahtzihque ica itlahtol Licaonia, huan oquihtohuayahque:

—iDioses oixnesihque quen tlacamen ohualtemohuahque ica tehhuanten!

¹²Oquihtohuayahque in Bernabé ocatca se dios Júpiter huan in Pablo ocatca se dios Mercurio, tleca yehhuatl in tlahtohuani. ¹³Huan in tiopixqui den Júpiter oquipiyaya itiopan canic oahsiyayahque ipan in altepetl. Oquihualicac in cuacuehnen huan in xochitl tlen ic quinxochihuayanihque. Huan in tlacamen oquinequiyayahque quinmahuestilisque. Quinmictilinihque in cuacuehnen quen tlatemactilten. ¹⁴Huan ihcuac oquichiuhue cuenta in Pablo huan Bernabé, opeuque quitzohtzomotzahque intlaquen tleca otlocoxticaten queman oquinehnehuilihque quinmahuestilisquiyanihque. Huan ocalajque inepantla inon tlacamen, tzahtzitihue:

¹⁵—iTlacatzitzin! ¿Tleca ijcon nanquichihuahque? Tehhuan noyojqui titlacamen quen namehhuan huan ic inon tihuitzen ic tamechiluisque quen xicahuacan nochin in tlen ahmo mechpalehuis, huan xicuitlapapanuican in Dios yoliuatoc. Yehhuatzin in aquin oquichihualoc in neluicactli huan in tlalticpactli, huan in mar huan nochin tlen oncan nohuiyan. ¹⁶Ipan in oc sequin tonalten oquinmocahuili in Dios maquichihuacan in tlacamen quen oquinejque, ¹⁷masque nochipa oquinmonextilohuaya aquin Yehhuatzin quen oquinmochihuiiyaya in tlen cuali. Yehhuatzin omohualtitlaniyaya in

quiahuatl huan in cuij tlamilolten huan otechmacalohuaya miyac ica tlen titlacuasque huan tipaquisque.

¹⁸Masque ijcon oquihtohque inon tlahtoli, molui tequiyi ic oquinmohsihuuhque in Pablo huan Bernabé quen quinmictiyanihque in cuacuehnen quen tlatemactilistli ic quinmahuestilisque.

¹⁹Oncan oahsicohque sequin judeahtecus den altepetl Antioquía huan den Iconio. Huan oquinyolchicauque in tlacamen huan oquitemacaque in Pablo. Oquinehnehuiliyahque quen yoquimictihque huan oquitotoxohque tlatentli den altepetl. ²⁰Huan ihcuac oquiyehualohque in tlaneltocanimen in Pablo, yehhua omoquetz huan oc sepa ocalac ipan in altepetl. Huan ic mostla oquis ihuan Bernabé huan oyahque ipan in altepetl Derbe.

²¹Oquinnonotzque in tlahtoli den tlamaquixtilistli ipan in altepetl Derbe huan miyac oquinneftoxtihque ic mochihuasque momachtiyanimen. Huan satepa omocuepque ipan in altepemen Listra huan Iconio huan Antioquía. ²²Ipan inon altepemen oquinyolchicauque in tlaneltocanimen maquineltocacan chicahuac. Huan oquiniluihque huelica quitlapanolisque miyac tlamantli acho ijson calaquisque ipan tetlatequiutlistzin in Dios. ²³Noyojqui oquintlalihque tequihuahnen ipan sehse tetiotlayehualoltzin Dios, huan satepa ihcuac omoyolmachtiyhque huan omosauque, otetlatlautilihque

in Totecohitzin maquinmaluilo in tlaneltocanimen.

Pablo huan Bernabé mocuepahque ic Antioquía den tlali Siria

²⁴Satepa opanoque ic Pisidia huan oahsitoque ipan in tlali den Panfilia. ²⁵Oquinonotzque in itlahtoltzin ipan in altepetl Perge, huan oncan oyahque ipan in altepetl Atalia. ²⁶Huan de ompa ohualahque ipan barco ic omocuepque Antioquía, in altepetl canin oquintitlanque ica itlasohtlistzin Dios ipan in tequilt tlen axan yoquitlamihque.

²⁷Ihcuac oahsique Antioquía, oquinsentlalihque nochin den itiotlayehualoltzin huan in Pablo huan Bernabé oquinnonotzque nochin tlen Dios oquinchihuiloc ica yehhuan. Oquiniluihque quen in Totecohitzin yoquinselilloc in aquin ahmo judeahtecus, huan yehhuan noyojqui cuij maquineltocacan. ²⁸Huan in Pablo huan Bernabé omocauque ompa miyac tonalten ihuan in tlaneltocanimen.

In mononotzalistli ipan in itiotlayehualoltzin Jerusalén

15 Ipan inon tonalten ohualahque oc sequin tlacamen den Judea aquin oahsitoque Antioquía. Opeuke quinnextiliyahque in tlaneltocanimen huan oquiniluihque ahhuol maquisasque in tlahmo quitlaliske in ixmatcayotl den judeaheco, quen oquihtohuaya in Moisés. ²Pablo huan Bernabé oquinccololihque tequin. Huan oquintocahhuihque

in Pablo huan Bernabé ihuan
oc sequinten, mayacan
Jerusalén maquicaquican inon
tlahtoli in tetiotlatitlaniluan
huan in tequihuahmen den
tetiotlayehualoltzin Dios de inon
altepetl.

³Oquintitlanque inon
tlaneltocanimen den
tetiotlayehualoltzin Antioquía. Ic
oyahyaya, opanohtayahque ipan in
tlalten den Fenicia huan Samaria,
huan oquinnotzayayahque quen
yehhuan aquin ahmo judeahtecos
yoquicauque in yihuehcau
intlaneltoquilis ic tecuitlapanusque
in Dios. Huan nochten in tocnihuan
opaquiyayahque molui ica inon
tlahtoli.

⁴Ihcuac oahsitoque Pablo
huan Bernabé ipan Jerusalén,
oquinmosehuihque ipan in
itlayehualoltzin in tlaneltocanimen
ihuan in tetiotlatitlaniluan
huan in tequihuahmen. Huan
oquinnotzque nochin tlen
Dios omochiu ica yehhuan.

⁵Huan sequin fariseos aquin
oquineltocaque omoquetzque huan
oquihtoque:

—In tlaneltocanimen aquin ahmo
judeahtecos quipiyahque tlen
quitlalisque in ixmatcayotl den
judeahteco huan quitlacamatisque
in itlanahuatil Moisés.

⁶Oncan omosentlalihque
in tetiotlatitlaniluan huan in
tequihuahmen para quiyectlalisque
inon tlahtoli. ⁷Satepa ihcuac
omononotzque huehcau, omoquetz
in Pedro huan oquiniluic:

—Tocnihuan, nanquimatihque
quen yihuehcau in Dios

onechtlaapehpeniloc ipan
namehhuan ic niquinnonotzas
in itlahtoltzin de temaquixtilistli
maquineltocacan in aquin
ahmo judeahtecos. ⁸Huan Dios
moixmati inyolo in tlacamen huan
oquinextililoc quen quinselilos
tleca oquinmacaloc in Itiotonatzin
ijcon quen otechmacaloc. ⁹Dios
ahmo aquin omoixpapatlac ica
tehhuanten huan yehhuanten tleca
noyojqui oquinyolchipahualoc
ihcuac oquineltocaque. ¹⁰Axan
tel, ¿tleca nanquinmohsihuisque
ic nanquinmatiltisque inon
tlanahuatili ipan inohque
tlaneltocanimen? Niyan
tehhuan niyan tocoluan ahhuel
tictlacamatihque. ¹¹Ahmo
maquinchihuilican ijcon tleca
ticneltocahque timaquisasque ica
tetlasohtlalis in Totecohtzin Jesús
ijcon quen yehhuan. Yeh in quen
otechuelitalo in Dios.

¹²Oncan nochten omocauque
tlamach, huan oquicajque ic
otlahtohque in Pablo huan Bernabé.
Oquinnotzque nochin tlen molui
mahuestic in Dios omochiu ipan
yehhuan aquin ahmo judeahtecos.
¹³Ihcuac otlanque tlahtohuahque,
in Jacobo oquiniluic:

—Nocnihuan, xinechcaquican.

¹⁴Yoquinonotz in Simón Pedro
quen Dios oquinseliloc ic achto
in aquin ahmo judeahtecos.
Noyojqui oquitlaapehpeniloc
impan yehhuan sequin tlacamen
para Yehhuatzin. ¹⁵Huan ijcon
quisa quen oquihcuilohque
in tlayolchicaucamen, ijcon
quen mihtohua in Dios ipan in
Itlahcuiloltzin:

- ¹⁶ Satepa de inin nimocuepas huan oc sepa niquintlalilis den ichanihcahuan David seya aquin tlicanas.
 Oc sepa niceyctlalis in tlen omocau,
 huan nimocuepas niquinnextilis ocachi
- ¹⁷ manechtemocan nochin tlacamen, yehhuan aquin israeltecos huan yehhuan aquin ahmo.
- ¹⁸ Ijcon mihtohua in Totecohtzin aquin oquinixmatiltiloc inin tlamanten den tlen yihuehcau panotoc.
- ¹⁹ Ic inon niquihtohua quen ahmo xiquinmohsihuican in aquin ahmo judeahtecos aquin omoyolcuepque ica in yihuehcau intlaneltoquilis ic maquineltocakan in Dios. ²⁰ Quinam quis quen matiquintlahcuiluican quen ahmo tlen maquitacan ica tlen quimahuasnequi ica inon dioses tlachihchiuten. Niyan aquin ahmo masihuaahuilti niyan matlacaahuilti. Huan ahmo xicuacan nacatl tlen tlamecanili, niyan in yestli. ²¹ Tleca de yihuehcau oncan ipan sehsen altepetl aquin tlanonotzahque ica itlanahuatil in Moisés. Inon tlen quiampaohuahque ipan in tiopanten de yehhuan ipan in tonali den nesehuilistli.
- ²² Ic inon in tetiotlatitlaniluan, huan in tequihuahmen, ihuan nocten ipan itiotlayehualoltzin oquintapehpenihque sequin de yehhuan, mayacan ic Antioquía ihuan Pablo huan Bernabé. Oquitocahhuihque in Judas tlen

noyojqui itoca Barsabás, huan Silas. Yehhuan tlacamen tequin tlen inquisca ipan in tlaneltocanimen. ²³ Huan ica yehhuan oquititlanque inon amatl tlen oquihto:
 "Tehhuan titetiotlatitlaniluan huan titequihuahmen huan namocnihuan tiquintlahpalohuahque in tocnihuan aquin ahmo judeahtecos huan in aquin chantihque ic Antioquía huan ipan in tlalten den Siria huan Cilicia. ²⁴ Ticmautoque quen sequin tlacamen quistoque den nican, niyan ahmo totlamatiyan, huan mechmosihuhtohque namehhuan ica tlahtolten huan mechtlapolochtihtohque. Quihtohticaten quen nanquipiyahque nanquitlalisque in ixmatcayotl den judeahteco huan nanquipiyahque nanquichihuahque cuenta ica itlanahuatil in Moisés. ²⁵ Ic inon tehhuan tinochten oticnehnehuilihque cuali matiquintocahhuican sequin tlacamen de tehhuanten ic mayacan mehitacan namehhuan san secnin inuan totlasohicnihuan Bernabé huan Pablo. ²⁶ Yehhuan omotemacaque ica innemilis tepampa Totecohtzin Jesucristo. ²⁷ Tel, tamechtitlaniliyahque in Judas huan Silas, huan yehhuan ic tlahtosque ihuan namehhuan ic mechyeconnotzasque nochin inin. ²⁸ Omosetilihque in Itiotonaltzin Dios ihuan tehhuan ahmo tamechtlalilisque niyan tlen ocachi yetec, san inin tlahtoli molui chicahuac. ²⁹ Ahmo xicuacan inacayo in yolcamen tlen quinmactihtoque in dioses tlachihchiuten. Noyojqui ahmo

xicuacan in yestli niyan in inacayo
in yolcamen tlen tlamecanilten.
Huan niyan aquin ahmo
masihuaahuitli niyan matlacaahuitli.
Tla nanquitlacamatisque inin
tlahtoli, cuali nanquichihuasque.
Cuali mayetocan."

³⁰Ijcon quen yoquintitlanque,
yehhuan oyahque in Antioquía.
Huan ompa omosentlalihque
ipan itiotlayehualoltzin huan
oquintemactilihque in amatl.
³¹Huan ihcuac in tocniuhan
oquimpohuilihque, ic inon
tequin oquinyolpactic inon
tlahtoli. ³²Huan quen cuali
tlanonotzasque noyojqui in Judas
huan Silas, oquinyolsehuihque
huan oquinyolchicaque molui in
tocniuhan ica intlahtol. ³³Satepa ic
panotoc se quesqui tonalten ompa,
in tocniuhan oquinnaahuatihque
tlamach in Judas huan in Silas
mamocuepacan ica aquin
oquinualtitlanque. ³⁴Huan Silas
oquinec mocahuas. ³⁵Noyojqui in
Pablo huan Bernabé omocauque
in Antioquía, huan ic oc miyac oc
sequinten oquinnextiliyahque
huan oquinnonotzoyahque in
itlahtoltzin Totecohtzin.

In Pablo ic oupa yau ic oc secnin matlanonotza

³⁶Satepa de quesqui tonali in
Pablo oquiluic in Bernabé:
—Tiohue oc sepa tiquinita in
tocniuhan ipan nochin altepemen
canin tiquinnonotztoque in
itlahtoltzin Totecohtzin, ic
tiquinitasque quen yesque.
³⁷In Bernabé oquinequiyaya
quihuicas in Juan Marcos. ³⁸Huan

in Pablo oquinehnehuili cuali
tla ahmo quihuicasque, tleca
oquinualcautehuac nepa Panfilia
huan ahmo oquincuitlapuanuyaya
ipan inon tequitl.

³⁹Omotlahtolchihuihque huan
omosesecnininuihque. In Bernabé
oquihuicac in Marcos huan oyahque
ipan in barco ic Chipre. ⁴⁰In Pablo
oquitlapehpeni in Silas huan
oquisque satepa ic in tocniuhan
otetlatlautiyahque maquinyequitalo
ica itlasohtlistzin in Totecohtzin.
⁴¹Huan opanoche ic in tlali Siria
huan Cilicia, quinyolchicautihue
in tocniuhan ipan in
itiotlayehualolten.

Timoteo quicuitlapuanuya in Pablo huan Silas

16 Pablo huan Silas oahsique
ipan in altepemen Derbe
huan Listra, canin ocahsitohque
se tlaneltocani itoca Timoteo,
iconeu se sihuatl judeahteco
tlaneltocani, huan in itata
griegohteco. ²In tocniuhan
aquin ochantiyayahque Listra
huan Iconio otlahtohuayahque
yec ihuan yehhuatl. ³In Pablo
oquinec maquicuitlapuanui in
Timoteo huan oquimacac in
ixmatcayotl den judeahtecos
ic ahmo quinixnamiquinihque
in judeahtecos in aquin
ochantiyayahque ipan inon tlalten,
quen nochten oquimatque itata
griegohteco. ⁴Huan ipan nochin
altepemen canic opanohuayahque,
oquinnaahuatihque in oc sequin
tocniuhan in tlen oquinmotlalihque
in tetiotlatlilaniluan huan
in tequihuahmen aquin

ocatcahque Jerusalén.⁵ Ijcon in tiotlayehualolten omochiuque chicahuac ipan intlaneltoquilis, huan omomiyaquiliyahque in tlaneltocanimen mostli.

Tlen oquimocochnextili in Pablo ica se tlacatl den Macedonia

⁶ In Itiotonatzin Dios ahmo oquimocahuli maquihtocan in itlahtoltzin ipan in tlali den Asia. Ic inon oquitlahcotejque ipan in tlalten den Frigia huan Galacia.⁷ Huan oahsique hasta tlacpac den tlali Misia. Huan ompa oquinehnehuiliyahque calaquisque ipan in tlalten den Bitinia, huan Itiotonatzin Dios ahmo oquimocahuli maquichihuacan.⁸ Oncan opanotayahque huehca ic Misia huan otemohque ic in altepetl Troas canin mosehuiyahque in barcos.⁹ Ompa ic tlayohua oquimocochnextili in Pablo, huan oquitac se tlacatl den tlali Macedonia aquin omoquetz iixpa huan oquitlatlautiyaya: “Mapano ic Macedonia huan xitechpalehuihetehua.”¹⁰ Huan ica tlen in Pablo oquimocochnextili, niman oticyectlalihque ic tiyasque Macedonia. Ticyecmauticatcahque technotzalohti in Dios ic matiquinnonotzacan in tlahtoli den temaquixtilistli.

Pablo huan Silas ipan in altepetl Filipos

¹¹ Otitlecohque tel, ipan in barco nepa Troas, huan otiyayahque saniman ic se tlali tlen ca inepanco in atl, itoca Samotracia, huan ic

mostla otiahsique in Neápolis.¹² De ompa otiyahque Filipos, yeh in altepetl ocachi hueyi ipan inon tlalten den Macedonia. Ompa oticatcahque sequin tonalten.

¹³ Se tonali den nesehuilistli otiquisque tlatentli den altepetl inahuac se atentli canin nochipa yahue moyolmacthiyahque. Otimotlahtlalihque ompa otiquinmacaque itlahtoltzin Dios inon sihuamen aquin omosentlalihtoyahque.¹⁴ Se de yehhuan itoca Lidia, huan inon de se altepetl itoca Tiatira. Yehhuatl oquinemacayaya sequin tatapahtli cuali in ipahyo morado. Inon sihuatl otemahuestiliyaya in Dios huan otecacticatca, huan in Totecohtzin oquiyoltlapoloc ic maquichhua cuenta in tlen oquihtohuaya in Pablo.¹⁵ Oncan omocuatequihque ihuan in ichanihcahuan huan satepa otechyeocolti, quen techiluihti:

—Tla nanquinehnehuiliyahque ic nele nitlaneltocani ipan Totecohtzin, xihualacan ximotepaluican nochan.

Huan otechtlatlautic matimotzecocan.

¹⁶ Opanoc se tonali ihcuac otiyayahque timoyolmacthiya, oticahsitoque se ichpochtli tlayolchicauqui. Ocatca inmajco in itecohhuan huan oquitlaniyaya miyac tomin ica inon itequiu.¹⁷ Inon ichpochtli opeu techcuitlapanuuya huan tlahtohti:

—Inin tlacamen tepalehuiyahque in Dios tlen huehcapa metztoc. Mechiluihthue ica in yancuic tlanehnehuilistli den temaquixtilistli.

¹⁸Oquichiu inin ipan miyac tonalten, ihcuac in Pablo yoquimohsihui. Omocuep huan oquiluic in ahmo cuali yehyecatl in tlen ipan ocatca yehhua:

—Ic Itocahtzin Jesucristo nimitztequiutiya, xiquisa ipan yehhua.

Huan in ahmo cuali yehyecatl oquicau saniman.

¹⁹Huan ihcuac inon in itecohhuan in ichpocatl oquitaque ayacmo ocatca tlen ic quitlanisque in tomin ica inon ichpocatl. Oncan oquinquitzquihque in Pablo huan Silas huan oquinuicaque inixpa in tequihuahmen ipan in tiyanquistli.

²⁰Oquintemactihtohque inahuac in tlixcomacanimen huan oquihtohque:

—Inin tlacamen yehhuan in judeahtecos, huan opeueque tlamohsihuiyahque ipan toaltepeu.

²¹Huan oquinextiliyahque intlanelnehnehuilis quen tehhuan ahhuvel ticselisque tleca tehhuan tiromanohtecos.

²²Oncan in tlacamen oquinixnamijke in Pablo huan Silas, huan in tequihuahmen otlatequiutihque maquintlaquenquixtican huan maquinuihuitequican ica tlacotl.

²³Ihcuac yoquinuihuitejque tequin, oquitequiutihque maquinixpiyacan yec. ²⁴Ihcuac oquicac inon tlanahuatili, in tlixpixqui oquincalaqui ocachi ompic tlahtec ipan in telpiloyan. Huan oquinxoilpihque yec ipan in cuartones.

²⁵Huan ic tlahcoyohuac in Pablo huan Silas omoyolmachtihtoyahque

huan ocuihcucatoyahque teca in Dios. Huan in oc sequin aquin ompa tzactoque oquincacticatcahque. ²⁶Huan san tlama ohualuehueyocatehuac chicahuac huan oquitzetzelo in tepamitl den telpiloyan. Huan niman omotlapohque in puertas huan otlacahcaque in cadenas ipan inohque aquin tzactohque.

²⁷In tlixpixqui oihosatehuac, huan oquitac in puertas den telpiloyan nochin tlapoutoche. Oquiquixti in espada ic momictini, tleca oquinehnehuili yocholohque in motzacuanimen. ²⁸Huan Pablo oquitzatzili:

—Ahmo tlen ximochihuili, tinocchten ticaten nican.

²⁹Oncan in tlixpixque oquitlahtlan in tletl, huan ocalac niman. Huan huehueyocatiu ica moucayotl, omotlamotlac icxitla in Pablo huan Silas. ³⁰Huan niman oquinquixti huan oquintlahtlan:

—Tlacatzitzin, tlen nicchihuas ic nimaquisas?

³¹Huan yehhuan oquinanquilihque:

—Xiteneltoca in Totecohtzin Jesucristo huan timaquisas, tehhuatl ihuan mochanihcahuan.

³²Huan oquinnonotzque itlahtoltzin Totecohtzin inuan nochin in ichanihcahuan. ³³Huan inon tlayohua in tlixpixqui oquimpaquili canin omoxoxoleuhe. Oncan yehhuatl inuan in ichanihcahuan oquinquatequihque. ³⁴Satepa oquinuicac ichan huan oquintlamacac. Huan yehhuatl huan in ichanihcahuan molui opactoyahque ic oteneltocaque in Dios.

³⁵Ic mostla in tequihuahmen oquintilanque in topilihten maquinahuati in tlrixpixqui maquincahcahuacan. ³⁶Oncan in tlrixpixqui oquiluic in Pablo:

—Ncipiya in tlanaahuatili den tequihuahmen manamechcahcahua namehhuan. Quen yicuali nanyasque tlamach.

³⁷Huan Pablo oquiniluic in topilihten:

—Tehhuanten titlacamen romanohtecus, huan otechuihhuitejque temiyacaixpa huan niyan ahmo otechixcomacahque, huan otechtzajque. Cox, īaxan techcahcahuasque san ichtacan? iHuelis ahmo! Mahualacan yehhuan techquixtican.

³⁸In topilihten oquinnonotzque in tequihuahmen huan yehhuan omomoutihque ihcuac oquimatque in Pablo huan Silas tlacamen romanohtecus.

³⁹Oyahque quintlatlautiyahque maquintlapohpoluican huan oncan oquinquixtihque huan oquintlatlautihque maquisakan ipan inon altepetl. ⁴⁰Ic oquisque den telpiloyan, yehhuan oyahque ichan in Lidia. Huan oquinitaque in tocnihuan huan oquinyolchicautejque, huan satepa oyahque.

Ic omococolihque ipan in altepetl Tesalónica

17 Ic oyahyaya in Pablo huan Silas, opanoque ic Anffípolis huan Apolonia huan niman oahsique ipan in altepetl Tesalónica canin ocatca se tiopantli

den judeahtecus. ²Huan saniman quen quichiutinemí, in Pablo oya ipan inon tiopantli. Huan ipan yiyi semana, ipan in tonali den nesehuilistli, otlanonotzque inuan. ³Oquinneyequiluihque tlen quihtosnequi in Itlahcuiloltzin Dios. Oquinnonotzque quen in Cristo omopix tlen otlapanoloc ic omicohuac. Huan satepa ic omicohuac omopix tlen oihxohuac. Huan oquiniluic:

—Yeh inin Jesús tlen namechnonotza, yeh in Cristo, tetlapehpenil Dios.

⁴Oncan sequin in judeahtecus oquineltocaque huan omosetilihque inuan Pablo huan Silas. Noyojqui oquineltocaque sequin griegohtecos aquin otemahuestiliyahque Dios, huan noyojqui miyaquin in sihuamen tlen hueyi inquisca.

⁵Huan ic inon in judeahtecus aquin ahmo oquineltocaque itlahtoltzin Dios ohualcualanque huan oquinsentlalihque sequin tlacamen ahmo cualten aquin san ompic onemiyayahque. Huan omocuahcualantihque huan oquinmohsihuihque nochin in altepetl. Huan oquixuitecticatcahque in ical Jasón ic quintemohticaten in Pablo huan Silas ic quinquixtisque huan quintemactinihque inmajco inon tlacamen. ⁶Huan quen ahmo oquinahsihque ompa, oquitotoxohatahque in Jasón huan oc sequin tocnihuan inixpa in tequihuahaten den altepetl huan otzahtzihque:

—Inin tlacamen aquin quinnetehuiltyahque nochin

tlacamen nohuiyan noyojqui yohualahsihque nican.⁷ Huan Jasón oquinseli ichan. Nochin yehhuan quixnamiquihque in tlanahuatilten den hueyixtoc romanohteco, tleca quihtohuahque oncan oc se hueyixtoc itoca Jesús.

⁸Ic oquicajque inin tlahtolten, in tlacamen huan in tequihuahmen omocuacualantihque.⁹ Huan Jasón huan in oc sequin oquitemactihque in tomin quen fianza huan oquincaque in tequihuaheten.

Pablo huan Silas ipan in altepetl Berea

¹⁰ Saniman in tocnihuau oquintitlanque in Pablo huan Silas ica yohuali ipan in altepetl Berea. Ic oahsitoque, oyahque ipan in tiopantli den judeahtecos.¹¹ In tlacamen den Berea ocachi cualten quen den Tesalónica. Tequin cualtzin oquiselihque in itlahtoltzin Dios huan mostli oquitemohuayahque ipan in Itlahcuiloltzin in tla ic nele melahuac quen quihtohuahque in Pablo huan Silas.¹² Miyachten de yehhuan oquineltocaque, huan noyojqui sequin sihuamen griegohtecos, aquin hueyi inquisca, huan noyojqui in tlacamen.

¹³Huan ihcuac in judeahtecos den Tesalónica oquimatzque quen in Pablo tlanonotzto ica itlahtoltzin Dios noyojqui ipan in altepetl Berea, oyahque ompa huan oquincualantihtohque in tlacamen.¹⁴ Huan in tocnihuau oquititlanque in Pablo mayau saniman intentla in mar, huan omocauque in Silas huan Timoteo ipan in altepetl Berea.¹⁵ In

aquin ihuan oyahyaya in Pablo oquihuicaque ipan in altepetl Atenas. Saniman omocuepque huan oquiniluihque in Silas huan Timoteo mayacan maquiahsisque ihsiuac in Pablo.

Pablo ipan in altepetl Atenas

¹⁶Ic oc quinchixtica in Silas huan Timoteo ipan in altepetl Atenas, in Pablo tequin omomohsihuic oquittac quen oquipiyaya in altepetl miyac santos tlachihchiuten.¹⁷ Ic inon, ipan in tiopanten otlahtohuaya inuan in judeahtecos huan oc sequinten aquin otemahuestiliyahque in Dios. Huan mostli otlanonotzayaya ipan in tiyanquistli ihuan aquin omahsiyaya ompa.¹⁸ Sequin tlacamen ompa omomachtiyahque ica intlanehnehuilis in aquin oquintocahhuiyahque epicureos. Huan oc sequin omomachtiyahque intlanehnehuilis den estoicos. In Pablo opeuke ihuan omonohnotza. Sequin oquihtohque:

—¿Tlen techiluiya inin tlacatl ic tequin tlatlahtohua?

Huan oc sequin oquihtohque:

—Nesi quen quitlanonotza intlanehnehuilis oc sequin dioses.

Ojcon oquihtohque tleca Pablo oquinnonotz in itlahtoltzin Jesús huan quen oihxohuac.¹⁹ Oncan ocuicaque nepa canin itocahyan Areópago, canin saniman omosentlaliyahque ic mononotza, huan oquitlahtlanihque:

—Cox, ¿cuali ticmatisque in tlen yancuic tlanehnehuilistli

ticualica? ²⁰Quen titechiluiya inin yancuic tlahtoli huan ticnequihque ticmatisque tlen quihtosnequi nochin inin.

²¹Huan nochin tlacamen den altepetl Atenas huan noyojqui in sentlapalchanimen aquin ochantiyayahque ompa, ahmo tlen oquichihuayayahque san matlacaquican huan maquihtocan itlahtlen oc se yancuic tlahtoli.

²²Oncan Pablo omoquetz inepanco yehhuan nepa itocahyan Areópago huan oquiniluic:

—Tlacatzitzin den Atenas, ic nochin namechita quen namehhuan molui nanquintlasohtlahque in santos. ²³Nehhuatl niquinitztinemyaya san campa nanquimahuestiliyahque. Huan onicahsic in tlaixpa seja quipiya tlahcuiloli inin tlahtoli: “Ica in dios aquin ahmo teixmatihque.” Cuali tel, inin dios aquin nanquimahuestilisque niyan ahmo nanquixmatihque, yehhua in Dios ica in aquin namechiluiya.

²⁴In Dios in aquin omochiu in tlalticpactli huan nochin tlen ca ipan yehhua, teyaxca in neluicactli huan in tlalticpactli. Ahmo chantilo ipan tiopantli tlachihchiuten den tlacamen. ²⁵Niyan ahmo mopiya tlen motas ica in tlacamen ica tlen cuali tepalehuisque ica Yehhuatzin. San Yehhuatzin nele techmacalo nochin in nemilistli, huan iihyou in tlacatl, huan nochin tlen ca.

²⁶San ica se tlacatl Yehhuatzin omochiu nochin tlacamen ic mayetocan ipan nochin tlalticpactli. Huan quinextilohtoc in tonalten de inemilis seja

huan campa cuali mochantisque.

²⁷Huan omonec matitetemocan, tla cana cuali titeahsisque, masque ic nele ahmo huehca ilohuac cada se de tehhuanten. ²⁸Tleca ica techicahualis ticateen huan tinemihque. Quen noyojqui oc sequinten den tlahcuilohuanimen de namehhuan oquihtohque: “Tehhuan titechanihcahuan Dios.”

²⁹Tla nele titechanihcahuan Dios, ahmo ticnehnehuilinihque in Dios quen se santo tlachihchiutli den oro, noso plata, noso tetl, intlachihchiu in tlacamen, quen nanquinehnehuiliyahque. ³⁰Dios ahmo omochiu cuenta quen ahmo oquinehnehuiliyahque in tlacamen ipan in tonali achto. Huan axan quintequiutilo nochin tlacamen mamoyolcuepacan.

³¹Tleca Dios yimotlalihtoc tlen tonali quinixcomacalos in tlacamen den tlalticpactli ica tlen melahuac. Yiquitocahhuilohtoc aquin mochihuas in tlrixcomacalistli. Oquinmatiltloc nochten, quen oteihxitiloc ipan in mijcamen.

³²Ihcuac oquicajque ica in ihxohualistli den mijcamen, sequin teca otlahtohque, huan sequin oquihtohque:

—Ocachi cuali timitzcaquisque xitlahto ic inin ipan oc se tonali.

³³Oncan Pablo oquincautehuac.

³⁴Huan sequin tlacamen oquicuitlapapanuihque huan oquineltocaque. Ipan yehhuan ocatca in Dionisio aquin ocatca seja den Areópago, huan noyojqui se sihuatl itoca Dámaris, huan oc sequinten.

Pablo ipan in altepetl Corinto

18 Huan satepa de inin, Pablo oquis den Atenas huan oya ipan altepetl Corinto. ²Ompa oquiahsic se tlacatl judeahteco oquitocahhuiyahque Aquila, ialtepeu ipan in tlali Ponto. Oc chihton achto in Aquila huan isihuau Priscila oahsitohque ic Italia, canin oquipixque tlen quisasque. Tleca in hueyixtoc Claudio oquintequivi maquisacan nochin in judeahtecos ipan in altepetl Roma. Huan Pablo oya quinita. ³Huan quen yehhuatl se itlatzoncaicniu, in Pablo omocau inuan matequitican san secnin. Ijcon oquinchihchihuayayahque inon lonas. ⁴Huan sehsen tonali den nesehuilistli in Pablo oyaya in tiapan huan oquinnonotzayaya nochten in aquin judeahtecos huan in aquin ahmo.

⁵Ihcuac Silas huan Timoteo oahsitohque ic Macedonia, in Pablo oquimatiyaya quipiya quen ic tlanonotza ica in itlahtoltzin Dios huan oquinyequiluiyaya in judeahtecos quen inon Jesús Yehhuatzin in Cristo, tetlapehpenil in Dios. ⁶Huan yehhuan opeuque camanaltihque huan quixnamiquihque. Huan ic inon in Pablo ijcon omotzetzelo itlaquen, maquichihuacan cuenta quen yahtica. Huan oquiniluic:

—Namehhuan nanquipiyasque namotlahtlacol ica namomiquilis. Ayacmo nehhuatl notlahtlacol. De axan niyau niquinnonotza in aquin ahmo judeahtecos.

⁷Oquis den tiapan huan oya ichan se tlacatl itoca Justo. Yehhuatl

oteneltocayaya in Dios huan ochantiyaya ic inahuac in tiopantli.

⁸Huan in tequihua den tiopantli, itoca Crispo, oteneltocac in Totecohtzin ihuan ichanihcahuan. Huan noyojqui miyacten den altepetl Corinto, ic oquicajque in itlahtoltzin Dios, oquineltocaque huan omocuatequihque. ⁹Oncan in Totecohtzin oquimoluilic in Pablo se tlayohua quen ic otecochitac:

—Ahmo ximomouti.

Xiquinnonotztiye huan ahmo ximocahua. ¹⁰Huan nehhua mohuan nica huan ahhuel aquin tlen mitzchihuilis tleca nechneltocasque miyac tlacatl ipan inin altepetl.

¹¹Ijcon in Pablo omocau se xihuitl huan tlahco ipan in altepetl Corinto. Oquinnextilihtoya itlahtoltzin Dios.

¹²Huan ipan inon tonalten, queman Galión ocatca hueyixtoc den tlali Acaya, omosentlalihque in judeahtecos ic oquixnamijque in Pablo. Huan ocuicaque ipan in presidencia. ¹³Huan oquiteluihque iixpa in hueyixtoc:

—Inin tlacatl quinnonotztinemi in tlacamen quen matemahuestilican in Dios ica se manera tlen quixnamiquis totlanahuatil.

¹⁴Huan ihcuac in Pablo opeu tlahtohua, in Galión oquitlapopolochti huan oquiniluic in judeahtecos:

—In tla cana oquichiu se tlahtlacoli noso itlaheten molui ahmo cuali, cuali yeni nehhua namechcaquis namehhuan nanjudeahtecos. ¹⁵Huan tla san ica tlaholtli huan namotlanahuatiluan, namehhuan ompa xicyectlalican,

tleca nehhua ahmo nicnequi nimochihuas tlrixcomacani ica inon tlahtoli.

¹⁶Huan oquintotocac quiahuac ipan in presidencia. ¹⁷Oncan nochten in griegohtecos oquiquitzquihque in Sóstenes, yeh in hueyixtoc den tiopantli, huan oquihuihuitejque san ompa iixpa in hueyixtoc. Huan in Galión ahmo tlen omocalacti ipan inon.

Pablo omocuep Antioquía huan opeu ic yexpa yau tlanonotza

¹⁸Pablo oc omocau miyac tonalten nepa huan satepa oquinnaahuatihtehuac in tocnihuan. Huan oyahque ipan in barco ipan in tlali den Siria, sansecnин inuan Priscila huan Aquila. Ompa ipan altepetl Cencrea, ic yasque ipan in barco, achto oquitlamixihxin itzonteco ic matlami se tlahtoli in tlen oteiluic. ¹⁹Ihcuac oahsique ipan in altepetl Efeso, in Pablo oquincau in Priscila huan Aquila. Huan oya ipan in tiopantli huan oquinnonotzato in judeahtecos canin ompa omosentlaliyahque. ²⁰Yehhuan oquitlatlautihque mamocahuani oc sequin tonalten, huan yehhuatl ahmo oquinec. ²¹Oncan oquinnaahuatihtehuac. Oquiniluic:

—Nicpiya tlen niyes Jerusalén ihcuac tictlaolichtisque in iluit tlen ompahuitz. Oc nimocuepas namechitas in tla Dios quimonequiltiya.

Huan otlehcoc ipan in barco huan oquis Efeso. ²²Ihcuac oahsito in altepetl Cesarea, in Pablo oquis ipan in barco huan oya

Jerusalén. Oquintlahpalo in oc sequinten den tiotlayehualoltzin huan niman otemoc ic Antioquía.

²³Omocau sequin tonali nepa huan satepa oixnen ipan in tlali Galacia huan Frigia. Huan oquinyolchicautinemiyaya nochin tlaneltocanimen.

Apolos tlanonotza ipan in altepetl Efeso

²⁴Ipan inon tonalten oahsihto Efeso se judeahteco itoca Apolos, ialtepeu Alejandría. Inon se cuali tlanonotzqui huan oquixmatiyaya yec in Itlahcuiloltzin Dios.

²⁵Oquinehnehuili inon yancuic tlanehnehuilistli den Totecohtzin huan oquinnonotzayaya tequin. Huan oquinnextiliyaya tlamelajcan ica in Jesús, masque san oquixmatiyaya itlacuatequilis quen oquimachtiyaya in Juan Tlacuatequiyani. ²⁶In Apolos opeu tlanonotza ipan in tiopantli huan ahmo omomouti. Huan ihcuac oquicajque in Priscila huan Aquila, ocuicaque secnин huan oquiyequiluihque ocachi ica in yancuic tlanehnehuilistli den Dios. ²⁷Oncan ihcuac Apolos oquinec panos ipan in tlali Acaya, in tocnihuan oquipalehuihque huan oquintlahcuiluihque in tlaneltocanimen de nepa ic maquisehuican yec. Ihcuac in Apolos oahsic Acaya oquimpalehui miyac in aquin oquineltocaque, quen quinuelitalo in Dios. ²⁸Tleca oquinextiliyaya iixpa nochten huan ijcon omotlapolochtihque in judeahtecos ica in tlahtoli tlen ahhuel

quixtlatisque. Oquinnextiliyaya ica in Itlahcuiloltzin quen Jesús Yehhuatzin in Cristo, tetlapehpenil Dios.

In Pablo ipan in alteptl Efeso
19 Ihcuac Apolos ocatca Corinto, in Pablo opanoc ipan in tepetla huan oahsic in Efeso, canin oquinahsipto sequin tlaneltocanimen. ²Huan oquintlahtlanic:

—Cox, ɿonanquiselihque namehhuan in Itiotonaltzin Dios ihcuac onanquineltocaque?

Huan oquinanquilihque:

—Nyan queman ahmo ticactoque in tla ca in Itiotonaltzin Dios.

³Oncan Pablo oquintlahtlan:

—¿Tlen tlacuatequilibistli onanquiselihque?

Oquinanquilihque yehhuan:

—Otimocuatequihque quen oquincuatequiyaya in Juan Tlacuatequiyani.

⁴In Pablo oquiniluic:

—In Juan oquincuatequiyaya in tlacamen quen maquichihuacan cuenta quen yehhuan mamoyolcuepacan. Huan noyojqui oquiniluiyaya in Juan quipiyahque tlen quineltcasque ica in aquin hualuilohuas satepa de yehhua. Inon quihtosnequi ica in Jesús, Yehhuatzin in Cristo, tetlapehpenil Dios.

⁵Ic oquicajque tlen oquinonotz in Pablo, omocuatequihque yehhuan ic teneltcasque Totecohtzin Jesús.

⁶Huan ihcuac Pablo oquintlalili in iman ipan yehhuan, in Itiotonaltzin Dios ohualuilohuac impan yehhuan, huan omonohnotzayayahque

ica intlahtol oc se sehse. Huan oquinnonotzayayahque ica itlahtoltzin Dios. ⁷Ocatcahque ic nochten cana mahtlactli huan ome tlacamen.

⁸Ipan cana yiyyi metztli in Pablo oyahticatca nochin tonali den nesehuilistli ipan in tiopantli canin oquinnonotzayaya huan ahmo omomouti. Huan oquinnonotzayaya in tlacamen ica quen quintequiutilos in tlacamen aquin teneltcasque in Dios. ⁹Huan oc sequinten tequin mohsiucamen huan ahmo oquineltocaque.

Huan iixpa in tlacamen opeuque ica tlahtohuahque in yancuic itlanehnehuilistzin in Dios.

Oncan in Pablo omoxelo de yehhuan huan oquinuicac in tlaneltocanimen ipan in escuela de se tlacatl itoca Tiranno, huan ompa oquinnonotzayaya mostli.

¹⁰Ijcon oquixico ome xiupa, ijcon quen nochten in aquin ochantiyayahque ipan in tlalten den Asia oquicajque in itlahtoltzin Totecohtzin, quenin judeahtecos huan quenin ahmo judeahtecos.

¹¹Huan Pablo oquichihuayaya molui mahuestic ica techicahualis Dios. ¹²Oquihualiquilihque impayo noso itlahtlen den itlaquen in cocoxcamen, ipan maquintlali iman in Pablo. Huan ijcon oquintlalilihque ipan in cocoxcamen huan opahtique.

Huan oquisayayahque in ahmo cuali yehyecatl ipan in aquin oquipiyayahque.

¹³Huan sequin judeahtecos san onemiyayahque quinquixtiyahque in ahmo cuali yehyecamen

ipan in tlacamen. Oquinejque quichihuasque ica techicahualis Totecohtzin Jesús. Huan oquitequiutihque inon yehyecamen:

—Namechtequiutiya xiquisacan ica ichicahualistzin Jesús teca aquin Pablo tlanonotza.

¹⁴Ijcon oquichihuayayahque inon chicome ipiluan se judeahteco itoca Esceva, aquin tequihua den tiopixcamen. ¹⁵Huan se tonali ihcuac ojcon oquichiuhue, inon ahmo cuali yehyecatl oquinnanquilic:

—Niquixmati in Jesús, huan niquixmati aquin Pablo, huan ahmo namechixmati namehhuan.

¹⁶Ic inon impan omotohuetzo in tlacatl aquin oquipiyaya in ahmo cuali yeyecatl. Ica chicahualistli oquincohoco inon chicome icnimen huan tequin oquinuihhuitec hasta ocholohque ipan in cali xihxipetzten huan omocohcohque. ¹⁷Huan oquimatque nochten tlen opanoc in chanimen den Efeso, in aquin judeahtecus huan in aquin ahmo. Huan ic inon tequin omomoutihque huan otemahuestilihque Totecohtzin Jesús.

¹⁸Noyojqui miyacten de yehhuan aquin oquineltocaque moyoluihtihiuitzen ican tlen ahmo cuali tlen achto oquichiuhue. ¹⁹Huan miyacten aquin otlamatcatiyayahque oqualicaque in iamahuan huan oquintlatihque iixpa nochten. Ihcuac oquinehnehuilihque ica in ipatiu inon amamen cana tlahco ciento mil tomin de plata. ²⁰Ijcon

miyaquin oquicajque itlahtoltzin Totecohtzin huan oquichiuhue cuenta ica techicahualis.

²¹Satepa de inon, in Pablo omotemamac quinitztinemis in tlaneltocanimen ipan in tlalten Macedonia huan Acaya, huan ijcon quichiutas hasta ic ahsis Jerusalén. Ijcon oquihtohuaya, satepa ic yas Jerusalén quipiya tlen yas noyojqui Roma. ²²Oncan oquintitlan ic Macedonia in Timoteo huan Erasto, aquin oquipalehuiyahque. Ic inon omocau oc sequin tonalten ic Asia.

Omocococolihque in tlacamen den altepetl Efeso

²³Ipan inon tonali omocococolihque in tlacamen den altepetl Efeso ica itlahtoltzin Dios.

²⁴Oquinixpehualti se tlacatl itoca Demetrio, aquin itequiu platero. Inon tlacatl oquichihchiuhaya san tlen tlachihchiutoton de plata ixnesihque quen tiopanten den inantzin Diana. Ijcon miyac oquitlaniyahque in aquin otequitiyahque ihuan.

²⁵Oquinsentlali inohque plateros san secnin ihuan oc sequinten aquin otequitiyahque aquin saniman intequiu huan oquiniluic:

—Tlacatzitzin, namehhuanten nanquimatiyahque timotecpanohuahque ica inin tequitl tlen ticpiyahque. ²⁶Huan namehhuan nanquitahque huan nanquicaquihque quen inin Pablo quihtohtinemis mach in santos tlachihchiuten ahmo melahuac dioses. Ijcon oquintlaneltocti miyac tlacamen ahmo san nican Efeso, tlahmo nochin lado ipan

tlali den Asia. ²⁷Inin molui maluili. Cuali ticpolosque in tlen ic timotecpanosque, huan noyojqui quipolos iquisca in tiopantli in tonantzin Diana, huan ijcon quixtohuetzosque ihueyilis inon Diana. Huan nochten den Asia huan nohuiyan ipan in tlalticpactli ayacmo quimahuestilisque inon Diana.

²⁸Ihcuc ac oquicajque inon, molui ocualanque huan otzahtzihque:
—iMayeto Diana den efesiohtecos!

²⁹Ijcon oquintlapolochtihque nochin tlacamen den altepetl. Oquinquitzquihque in ome tlacamen den Macedonia intoca Gayo huan Aristarco. Yehhuan noyojqui quicuitlapanihtinemihque in Pablo. Huan oquintotoxotahque canin omosentlaliyahque in tlacamen. ³⁰In Pablo oquinequiyaya calaquis ompa ic quinnonotzas in tlacamen, huan in tlaneltocanimen ahmo oquicauque. ³¹Noyojqui sequin tequihuaheten den tlali Asia, aquin itenonotzcahuan, oquinahuatihque quen ahmo macalaqui ompa.

³²Ic inon, quen omosentlalihque, sequin tzahtzihque ica se tlahtoli huan oc sequinten ic oc sequin tlahtoli. Inon tlacamen yimotlapolochtiyahque huan in oc sequinten ahmo oquimautoyahque tlen ic omosentlalihque. ³³Huan sequin den judeahtecos oquitaque se tlahtolchiuqui itoca Alejandro. Oquinquitzquihque huan oquitlaliyahque matlahto ic maquimpalehui. Alejandro omasou ic maquichihuacan cuenta. ³⁴Huan ihcuac omomacaque cuenta yeh

in judeahteco, ahmo oquicauque matlahto, tlahmo otzahtzihque nochten cana ome hora:

—iMayeto Diana den efesiohtecos!

³⁵Oncan se tequihua den altepetl oquintlacahualti in tlacamen, huan oquihto:

—Tlacatzitzin den Efeso; nochin tlacamen den tlalticpactli quimatihque quen in tlacamen den Efeso quimaluiyahque ic quitasque in tiopantli de tonantzin Diana, huan noyojqui quitasque in itlachihchiucau tlen ohuetz den neluicac. ³⁶Quen niyan aquin ahhuel quixtlatlis inin, xicahuacan tlamach huan ahmo xicchihuacan niyan tlen, in tlahmo acho xinehnehuilican yec. ³⁷Inin tlacamen aquin onanquinualicahque ahmo tlen quichiutoque, niyan ahmo tlen ica otahtohque in tla ahmo cuali in tonantzin Diana.

³⁸In tla Demetrio huan in aquin ihuan otequityayahque quinteluisnequihque san aquin, oncan tlixcomacanimen. Cuali quinixcomacasque iixpa in tequihuahmen. Ijcon cuali seja mamopalehui. ³⁹Huan tla ic oc se tlamantli in tlen namehhuan nanquitlahtlanisque, quipiya tlen nanquitasque ic nanmosentlalische se tonali tlamelajcan. ⁴⁰Quipiya tlen timomaluisque ic ahmo matechteluican inahuac in oc sequin tequihuahmen, quen ottimocococolihque ica inin tlen panotica axan. Ahmo oncan niyan tlen tlahtoli cuali tiquinmacasque tla techtlahtlanisque ica tlen ottimosentlalihque axan.

⁴¹Huan satepa ic oquihto inin, oquinnahuati nochten in aquin omosentlalihque.

**Quen oya in Pablo ipan tlali
Macedonia huan Grecia**

20 Ihcuac otlan in necocolistli, in Pablo oquinnotz in tlaneltocanimen ic quinnonotzas sequin tlahtolten. Oncan oquinnahuatiuhuac ica mahuesyotl huan oya Macedonia. ²Oquinitato nochin inon altepemen, quinyolchicautinemi miyacten in tocnihuan ica itlahtol, huan satepa oahsito in tlali Grecia. ³Ompa omocau yiyi metztlí, huan yasquiyani ipan in barco ipan in tlali Siria. Huan oquimat in Pablo quen in judeahicos quiquizquisquiyanihque. Ic inon omotemamac mocuepas ipan in tlali, ic panotas oc sepa ipan in tlali Macedonia. ⁴Ihuan oyahyaya Sópater den altepetl Berea, huan Aristarco huan Segundo den altepetl Tesalónica, huan Gayo den altepetl Derbe, huan Timoteo, huan noyojqui Tíquico huan Trófimo den tlali Asia. ⁵Huan inin tocnihuan otlicanque huan otechchixque ipan in altepetl Troas. ⁶Satepa den iluitl den pan ahmo semauqui, otiquisque den altepetl Filipo huan ottitlecohque ipan in barco. Huan ipan macuili tonali otiquinahsítóhque ipan in altepetl Troas canin otimocauque chicomé tonali.

**In Pablo quinta in tlaneltocanimen
ipan in altepetl Troas**

⁷Ipan in achto tonali den semana omosentlalihque in tlaneltocanimen

ic quimomahsehuihque tetlaolichtilis Totecohtzin. Huan oquinnextiliyaya in Pablo. Quen oquipiyayaya tlen quisas ic mostla, oquinonotzticatca hasta ic tlahcoyohuac. ⁸Ompa omosentlaliyahque ipan inon yiyi tlanepanoli cali, huan oxotlahticatcahque miyac tlanexten. ⁹Huan se telpochtli itoca Eutico oyehuatoya ipan in ventana. Quen Pablo ohuehcau ica itlanonotzalis, tequin ocochmic inon telpochtli. Oncan omocochtepehxihui ipan in yiyi tlanepanoli cali, huan otemoque in tlaneltocanimen huan ocahsítóhque mijqui. ¹⁰Oncan in Pablo omopachoc inahuac inon telpochtli huan oquieu. Huan oquiniluic in tocnihuan:
—Ahmo ximomoutican, yoltica oc sepa.

¹¹Oncan in Pablo otlehcoc oc sepa canin ocatca, huan oquixeloc in pan matlacuacan in tocnihuan. Otlacuahque huan oc otlanonotzticatca in Pablo hasta ic otlatuic, huan oya. ¹²Ijcon ocuicaque yolqui ichan inon telpochtli huan nochten molui opactoyahque.

**De ipan in altepetl Troas oquisque
hasta Milet oahsítóhque**

¹³Tehhuanten otitlicanque huan otiyahque ipan barco hasta otiyahsihque in altepetl Asón ic oticanatohque nepa in Pablo. Ijcon otimocauque tleca yehhua oquinec nehnemis. ¹⁴Ihuan Pablo otimoahsihque nepa Asón huan otlehcoc ipan in barco. Huan otiyahque ipan in altepetl

Mitilene. ¹⁵Otquisque de ompa huan ic mostla oticpanahuihque in tlali Quío, huan ic huipbla otiyahsitoque ipan in altepetl Samos. Otimosehuhtohque ipan altepetl Trogilio, huan ic mostla otiyahsitoque in altepetl Mileto. ¹⁶Ijcon oticchiuque tleca Pablo ahmo quinequi huehcahuis ipan in tlalten den Asia. Ic inon ahmo oya Efeso tleca oquinequiyaya ahsisquiyani ihsiu Jerusalén, mayompa yeto para in iluitl den Pentecostés.

**Tlen oquinnonotzato in Pablo
inon tequihuahmen den Efeso**

¹⁷Yetoc in Pablo ipan in altepetl Mileto, otlatitlan maquinnotzacan in tequihuahmen den itiotlayehualoltzin den Efeso. ¹⁸Huan ihcuac ohualahque, oquiniluic:

—Namehhuan yinanquimauticaten quen oninentinemyaya hasta ic oniahsico ipan in tlali Asia huan hasta axan. ¹⁹Nochin tonalten onicatca namohuan onitepalehuihticatca in Totecohtzin san tlamach, hasta onimoyolcoco. Huan noyojqui nanquimatihque quen onechcocolihque in judeahicos ic nechmictinihque. ²⁰Huan nochipa namechnonotzticatca itlahtoltzin Dios tlen mechpalehuis. Onamechnextili canin mosentlaliyahque huan noyojqui namochan. ²¹Oniquinnahuati quen judeahicos huan quen ahmo judeahicos mamoyolcuepacan teixpa in Dios huan maquineltocacan ica Totecohtzin

Jesucristo. ²²Axan tel, niyau Jerusalén, quen nechtequiutilo in Itiotonatzin Dios, huan ahmo nicmati tlen nechpanos nepa. ²³San se tlahtoli nicmati, quen nechiluilohtoc in Itiotonatzin Dios ipan nochin in altepemen canin napanotas. Nechuicasque ipan in telpiloyan huan nitlapanos tequin. ²⁴Huan ahmo tlen niahcomani, niyan ahmo nicchihuas cuenta ica nomemilis. San manictlami ica paquillistli inin tequitl tlen nechmacalohtoc Notecohtzin Jesús, ic manamechnonotza in cuali itlahtoltzin quen techtlasohtlalo in Dios.

²⁵'Onamechnonotz namochten quen tlatequiutilos Dios in aquin teneltocasque. Huan axan nicmati ayacmo nannechitasque nican tlalticpac niyan se de namehhuan. ²⁶Ic inin, nicnequi namechiluis axan ayacmo notlahtlacol ica in aquin ahmo quineltocas. ²⁷Tleca onamechtlamiiulic nochin in tlen mochihuas in Dios, huan ahmo tlen oniquixtlati. ²⁸Ic inon san namehhuan ximomaluican huan xiquinixpiyacan noyojqui namoicnihuan ipan itiotlayehualoltzin Dios. Tleca yeh in Itiotonatzin Dios mechtlatlihtoc quen paxtolten maquinitzinemican ica in tlaneltocanimen.

Omicohuac Totecohtzin ica yehhuan intlahtlacol. ²⁹Nicmati ihcuac namechcautehuas nehhuatl, hualasque sequin tlacahcayaucamen huan quinectiyesque quinxinisque in tlaneltocanimen quen quichihuahque in lobos

ic quinxixiniyahque in calnelohten. ³⁰Huan yesque sequin de namehhuan aquin quipatlasnequisque itlahtoltzin Dios ic quincahcayahuasque in tlaneltocanimen ica in oc se tlanehnehuilistli, in tla cana quincuitlapapanuisque in tetlapehpeniluan Dios.

³¹Ximomaluican tel, huan xiquilnamiquican quen nochin inon yiyi xiupa, quen tlahca huan quen tlayohua onamechnonotzcaticatca cada se de namehhuan hasta onimoyolcoco.

³²Axan tocnihuan, namechtatlalihoc temajco in Dios, mamechuelitalo. Maquichihuacan cuenta ica inon itlahtoltzin tlen cuali mechpalehuis. Tleca itlahtoltzin mechyolchicahualos ica inon namotlaneltoquilis. Huan ijcon nanquiselisque nochin tlen monequis mechmacalos inuan nochin tetlapehpeniluan Dios.

³³Ahyic onicnec nicuilis niyan aquin itomin noso itlaquen. ³⁴Tleca nanquimatihque quen onitequit ica nomahuan ic onimotequipanoc, huan oniquimpalehui in aquin nohuan onemiyayahque.

³⁵Nochipa namechnextilihtoc quen nantequitiske huan nanquimpalehuisque in aquin quimpolohua. Xiquilnamiquican in itlahtoltzin Totecohtzin Jesús, quen omihto: “Ocachi pactoc in aquin quitemaca quen in aquin quiseliya.”

³⁶Satepa ic ijcon oquihtoc in Pablo, omotlancuaquetz huan omoyolmacthi inuan. ³⁷Nochten ochocaque huan oquinahuahetejque in Pablo ic oquimahuestilihque.

³⁸Huan tequin otlocoxque tleca oquiniluic ayacmo queman quiitasque. Huan niman oquicahuatoque ipan in barco.

Oc sepa oya in Pablo in Jerusalén

21 Ihcuac otiquincauque in tocnihuan, ottitlecohque ipan in barco huan otiyahque niman in tlali Cos, huan ic mostla otiyahsitoque in altepetl Rodas. Huan de ompa otiyahsique ipan in altepetl Pátara. ²Ipan Pátara oticahsique oc se barco tlen oyahticatca ic in tlali Fenicia. Huan ottitlecohque ipan in barco huan otiyahque. ³Ic otipanoque, otiquitaque in tlali Chipre huan oticauque ic tlacpac, huan otiyahque hasta in tlali Siria. Quen in barco ocuicayaya tlamamali para in altepetl Tiro, otitemohque huan oticalajque inon altepetl. ⁴Otiquinahsitoque in tlaneltocanimen huan inuan otimocauque chicome tonali. Huan quen yoquinahuahtihtoya in Itiotonatzin Dios, in tlaneltocanimen oquinahuatihque in Pablo ahmo yasquiyani in Jerusalén. ⁵Huan ic otlan inon chicome tonali, otquisque. Otechcuitlapapanuihque nochin tlaneltocanimen inuan insihuau huan in cocone hasta ic otquisque ipan in altepetl. Huan ompa itentla in hueyi atl otimotlancuaquetzque huan otimoyolmachtihque. ⁶Huan otimonahuatihque ica tlasohtlalistli huan ottitlecohque ipan in barco. Huan yehhuan omocuepque inchan. ⁷Otquisque Tiro huan otinehenenque ipan in mar ic

otiyahsique in altepetl Tolemaida canin otiquintlahpalohque in tocnihuan huan inuan otimocauque se tonali. ⁸Ic mostla otiquisque, Pablo huan tehhuan aquin ihuan oticatcahque, huan otiyahsitoque ipan in altepetl Cesarea. Huan ompa otiyahque ichan in Felipe in tlayolchicaupi. Yehhuatl seja den chicome tlaxelohuanimen, huan ihuan otimocauque. ⁹In Felipe oquimpiyayaya nahue ichpochuan, huan cuali san tlen quiyolitahque ica Itiotonaltzin Dios. ¹⁰Ompa oticatcahque quesqui tonali ihcuac oahsito ic in tlali Judea se tlayolchicaupi itoca Agabo. ¹¹Otechualitac huan oquitilanili itlahcolpica in Pablo, huan omoxoilpi, huan omomayalo, huan oquiluic:
 —Omiho in Itiotonaltzin Dios quen nepa Jerusalén in judeahtecos quilpisque in iteco inin itlahcolpica huan quitemactisque inmajco in sentlapalchanimen.

¹²Ic oticajque inin, tehhuan inuan in tlacamen den Cesarea oticlatlautihque in Pablo ahmo mayau Jerusalén. ¹³Huan in Pablo otechnanquilic:

—¿Tleca nanchocahque huan nannechtlocolmaca? Nimocuihcuitica ahmo san ic nechilpisque, tlahmo noyojqui nim quis nepa Jerusalén tepampa Totecohtzin Jesús.

¹⁴Huan quen ahhuel oticyolcuepque, oticaque ic otiquiluihque:

—Mamochihua in tetlanequilis Totecohtzin.

¹⁵Satepa de inin otimochihchiuque huan

otiyahque Jerusalén. ¹⁶Huan otechcuitlapuanuihque sequin tlaneltocanimen den Cesarea. Huan otechuicaque ichan se tlacatl de Chipre itoca Mnasón, quen yihuehcau tlaneltocani. Ompa otiyahque timotepaluiyahque.

Pablo oya quiita in Jacobo

¹⁷Ihcuac otiyahsitoque Jerusalén, in tocnihuan otechselihque ica paquelistli. ¹⁸Ic mostla tohuan oya in Pablo ihcuac otiyahque tiquitahque in Jacobo. Huan ompa no ocatcahque nochten in tequihuahmen den tlayehualotzin. ¹⁹Pablo oquintlahpalohque huan niman oquiniluic se huan oc se tlahtoli, quen Dios yomochiu ica yehhuatl ihcuac onentoya inuan in aquin ahmo judeahtecos. ²⁰Ihcuac oquicajque, otemahuestilihque in Dios. Oncan oquiluihque in Pablo:

—Cuali inon, tociyu, huan tiquita quesqui mil den judeahtecos yoquineltocaque. Huan nochten yehhuatl quiluiyahque mach titlacamatisquiyanihque in itlanahuatil Moisés. ²¹Huan quincaquiltihtoc quen tehhuatl tiquinmachtis nochin judeahtecos in aquin chantihque ic sentlapal, ahmo maquichihuacan cuenta ica in tlen otlanahuati in Moisés. Huan quincaquiltihtoc quen tehhuatl otiquiniluic inon judeahtecos ayacmo quipiya quintlalilisque in ixmatcayotl ic tlen moixmatisque judeahtecos, niyan ahmo quipiya quicuitlapanuisque inon itlanehnehuilis judeahteco. ²²Huan ic inon ijcon otimonohnotzque. In tlaneltocanimen mosentlalisque

ihcuac quimatisque quen yotihuala. ²³Ocachi cuali xicchihua oc se ijcon. Nican caten tohuan nahue tlacamen aquin quipiyahque tlen quichihuasque quen motemacatoque ica itlanahuatil Moisés. ²⁴Xiquinuica huan ximotlamicuaxihxima huan xiquintlaxtlahuili in gastos ic yehhuan noyojqui cuali motlamicuaxihximasque. Ijconon nochten momacasque cuenta ticyectlacamautoc in itlanahuatil Moisés. ²⁵Huan yitiquintlahcuiluihque in tlaneltocanimen aquin ahmo judeahtecus, quen ahmo quipiyahque tlen quichihuasque cuenta inon itlanehnehuilis judeahteco. San ahmo maquicuacan in nacatl tlen quimacatoque in santos, niyan in yestli, niyan inacayo yolcamen tlen tlamecanilten ahmo maquicuacan. Huan niyan aquin ahmo masihuaahuilti niyan matlacaahuilti.

Oquiquitzquihque in Pablo ipan in tiopantli

²⁶Oncan in Pablo oquinuicac in nahue tlacamen huan ic mostla omochipauque san secnin huan niman ocalajque in tiopan ic quinnahuatisque ihcuac tlamic in tonalten den tlachipahualistli. Quen tiquitosque, cada se de yehhuan quipiya tlen quitemactis itetlahpalol.

²⁷Huan ihcuac yau tlami inon chicome tonali, inohque judeahtecus den tlalten den Asia oquitaque in Pablo ipan in tiopantli

huan omocococolihque nochin tlacamen. Huan oquiquitzquihque in Pablo, ²⁸huan otzahtzihque:

—Tlacamen den Israel, xitechpalehuican. Nicanca in tlacatl aquin nohuiyan quinnextilihtinemí nochin tlacamen ic ahmo maquiequitacan ica tehhuan judeahtecus, niyan ica itlanahuatil Moisés, huan niyan icaimin tiopantli. Huan noyojqui axan mocalactihtoc ipan in tiopantli inuan sequin griegohtecos aquin tlaihtlacohtinemihque ipan in tiopantli canin tlachipaucan.

²⁹Ijcon oquihtohque tleca quinitztoque achto ipan in altepetl in Pablo ihuan Trófimo den Efeso, huan oquinehnehnuilihque quen Pablo noyojqui oquihuicac ipan in tiopantli inon Trófimo.

³⁰Nochin in altepetl omocococolihque huan in tlacamen ohualtzecuunque. Oncan in Pablo oquiquitzquihque huan oquicalquixtihque. Huan niman otlatzajque in tiopan.

³¹Oquinequiyahque quimictisque ihcuac ocahsito se tlahtoli in capitán den soldados quen nochin in tlacamen den Jerusalén yimococolihtohque. ³²Oncan in capitán oquinsentlali isoldados huan in tlayecancamen, huan oahsitihueztitohque inahuac in tlacamen. Ihcuac oquitaque in capitán huan in soldados, ayacmo oquihuuhuitejque in Pablo.

³³Oncan in capitán omopacho huan oquiquitzqui preso in Pablo. Oquinnahuati maquiilpican ica ome cadena. Satepa oquitlahtlan aquin yehhua huan tlen oquichiu. ³⁴Huan

in tlacamen tzahtzique oc sehse ic ohualtlahohque quen ahuel maquinehnehuili in capitán, san miyacten ohualtlahohque. Huan oquintitlan maquihuicacan ipan in comandancia. ³⁵Queman oahsito iixpa in escalera den comandancia, in soldados oquipixque tlen quiahcocuisque in Pablo ic ixtomamictihue in tlacamen. ³⁶Tleca nocten ohualayahque icuitlapa tzahtzitihuizen:
—¡Mamiqui!

In Pablo mopalehuiya iixpa in tlacamen

³⁷Ihcuc ac oquicalaquihticatcahque in Pablo ipan in comandancia, yehhua oquiluic in capitán den soldados:
—¿Cuali niquihtos itlahtlen?
Huan in capitán oquinanquilic:
—¿Quen tehuatl ticmati titlahtos griego? ³⁸Cox, zahmo tehuatl inon tiegipciohteco aquin yipanotoc sequin tonalten oticchiu ic otiquinnetehuilty, huan otiquinquixti ipan in acahualtlahlti cana nahue mil temictiyanimen?

³⁹Oncan Pablo oquiluic:
—Neh no njudeahteco, noaltepeu Tarso, se hueyi altepetl den tlali Cilicia. Nimotlatlautiya xinechcahua manitlahto ihuan in tlacamen.

⁴⁰In capitán oquicau matlahto in Pablo, huan omoquetz ipan in escalera. Huan san ica iman oquintlacahualti in tlacamen. Ihcuc ac yomocauque, oquinnohnotz ica itlahtol hebreo, huan oquihto:
22 —Tocnihuan huan tetahmen, xicaquican tlen ic niyau nimopalehuiya.

²Ic oquicajque quen quinnonotza ica in itlahtol hebreo, ocahi omocauque, huan Pablo oquiniluic:

³—Nehhua njudeahteco. Onitlacat ipan in altepetl Tarso den tlali Cilicia. Huan oniyolico nican Jerusalén, huan onechmachtli in Gamaliel, huan molui niixnamictihtoc ica in tlanahuatili den tochichicacoluan. Nochipa nicyehyeltihtoc huan nitetlacamautoc in Dios ica nochin noyolo, ijcon quen namehhuan nanquichihuahque ipan inin tonali. ⁴Nehhua ic achto oniquinmatecatinemiyaya in tlaneltocanimen ica inon yancuic tlanehnehuilistli, huan oniquintzac quen tlacamen huan quen sihuamen. ⁵In tlayecanqui den tiopixcamen huan in tetecten cuali quihtosque quen yehhuan onechmacaque in amamen den tequihua ic maquichihuacan cuenta in tocnihuan judeahtecos ipan in altepetl Damasco quen onechtequiutihque maniquinquitzqui in quesqui tlaneltocanimen niquinahsis ompa, huan maniquinualica tlaquitzquilten ic Jerusalén canin quintlapanoltsiquianihque.

Pablo oquinonotz quen oquineltoctiloc in Jesús

⁶Huan ihcuc oniyaya ipan ohtli ic niyahsitiu Damasco cana ic nepantla, san tlamach ohualpetlan den neliuicac se tletl chicahuac ic nonahuac. ⁷Huan onihuetz tlalpa huan niman onicac se tlaholti tlen onechiluic: “Saulo, Saulo, ¿tleca tinechmatecatinem?” ⁸Oncan

onitlahtlan: “¿Aquin Tehhuatzin, Notecohtzin?” Huan onechiluiloc: “Nehhua niJesús noaltepeu Nazaret. Nehhua aquin tehua tinechmatecatica.”⁹ Oncan in aquin ocatcahque nohuan oquitaque inon tlanextli huan omomoutihque, huan ahmo oquicajque in tlahtoli den aquin onechnotz.¹⁰ Oncan neh oniquihto: “¿Tlenon nicchihua, Notecohtzin?” Huan in Totecohtzin onechiluiloc: “Ximoquetza huan xicuitlapanui in ohtli hasta tiahsis Damasco. Huan ompa mitziluisque nochin in tlen ticchihuas.”¹¹ Quen in tlanextli onechpopoyotili, onechuicaque in aquin inuan oniyaya. Onechmaquitzquihtahque hasta oniahsc Damasco.

¹²’Ompa Damasco ocatca se tlacatl itoca Ananías, aquin nele oquitlacamat itlanahuatil in Moisés. Huan nochin judeahtecos aquin ochantiyayahque Damasco oquihtohque molui cuali tlacatl.

¹³ Ananías ohuala nechita, huan ic oahsico, onechiluic: “Nocniu Saulo, xitlachiya oc sepa.” Huan ipan inon hora onitlachixtehuac.¹⁴ Oncan onechiluic: “In Dios den totatahhuan omittlapehpeniloc xicmati in tetlanequilis huan ic tiquitas in Tlamelajcatzintli Jesús huan nele ticaquis tetlahtoltzin.¹⁵ Huan tehhuatl ticchipahuas ica Yehhuatzin iixpa nochin tlacamen huan tiquinnonotzas nochin tlen tiquitztoc huan ticactoc.¹⁶ ¿Huan axan tleca san timotlaliya? Ximoquetza huan tiyasque. Nehhuatl nimitzcuatequis ica itequihuahyotzin Totecohtzin huan mitzylchipahuasque ica motlahtlacol.”

Pablo oquinonotz quen oquititlaniloc in aquin ahmo judeahtecos

¹⁷’Ihcuc ac onimocuep Jerusalén oniya nimoyolmachiya ipan in tiopantli huan onicochitac.

¹⁸ Oniteitac in Totecohtzin huan onechiluiloc: “Xihsihui xiquisa den Jerusalén, tleca ahmo quichihuasque cuenta in tlen timochipahuilis ica nehhuatl.”¹⁹ Oncan nehhuatl onicteluic: “Notecohtzin, yehhuan yiquimatihque quen oniyaya ipan in tiopanten huan oniquinuicayaya in telpiloyan huan oniquinuihuitequiyaya in aquihque oteneltocaque.²⁰ Huan ihcuac oquimictihque in Esteban aquin oquimochipahuili ica Tehhuatzin, oticsematiyahque quen oticmictihque. Huan hasta nehhuatl quen tlayecanqui, oniquixpix intlaquen in aquin oquimictihque.”²¹ Huan in Totecohtzin onechiluiloc: “Xiyau, tleca nimitztitlanis huehca. Xiquinno notzas inon aquin ahmo judeahtecos.”

Pablo imajco in capitán

²² Hasta inon tlahtoli oquicajque. Oncan opejque tzahtizque:
—iMamiqui inon tlacatl. Ayacmo manemi!

²³ Huan ijcon otzahtziticatcahque huan quitohuezohtinemihque intlaquen huan oquitlasque in teutli ipan yehyecatl.²⁴ In capitán oquintequiuti maquicalaqui can in Pablo ipan in comandancia. Oquinna huati maquihuetequican in Pablo ic mamoyoluiti tlen ic

quicocoliyahque. ²⁵Huan ihcuac yiquilpihuitoque in Pablo ic quihuitequisque, oquilaic in Pablo inon tlayecanqui aquin ompa ocatca:

—Cox, ¿cuali nanquihuitemquisque se tlacatl romanohteco huan ayamo quixcomacahque?

²⁶Ic oquicac inin, in tlayecanqui oya quinahuatiya in capitán:

—Ximomalui ica in tlen tiyau ticchihua, tleca inin tlacatl romanohteco.

²⁷Oncan in capitán omopacho inahuac in Pablo huan oquitlahtlani:

—Cox, ¿nele, tehhua titlacatl romanohteco?

In Pablo oquinanquilic:

—Queme.

²⁸Oncan in capitán oquilaic:

—Nehhuatl miyac tomin onictlaxtlau ic onimochiu niromanohteco.

Huan Pablo oquihto:

—Huan Nehhuatl ic onitlacat niromanohteco.

²⁹Ic inon oquicauque in aquin quihuihuitequinhque in Pablo. Huan omomoutic in capitán ic quitequiutihtoc maquihuihuitequican in Pablo tleca noyojqui tlacatl romanohteco.

In Pablo moyolchipahua iixpa in tequihuahmen den judeahtecos

³⁰In capitán oquinectoya quimatis tlen ic in judeahtecos oquiteluihque in Pablo. Ic mostla oquiquixtili in cadenas huan oquinsentlali in tlayecancamen den tiopixcamen huan nochin tequihuahmen. Oncan oquihualicaque In Pablo huan oquiixpantihque in tequihuahmen.

23 In Pablo oquinixitac in tequihuahmen huan oquiniluic:

—Tocnihuan, nehhuatl niyetoc hasta axan ahmo tlen nechyoltzacuiliya teixpa in Dios.

²Oncan Ananías, quen yehhua tlicanqui den tiopixcamen, oquintequiuti in aquin inahuac in Pablo maquitentecapanican. ³Huan Pablo oquinanquilic:

—iIn Dios mitzuitequilos tehhuatl, san ome moxayac! Tla nele tinechixcomacas quen ca in tlanahuatili, ijcon ahuel tiquixnamiquis inon tlanahuatili ic tinechuitequis.

⁴Oncan in aquin ocatcahque ompa oquitlahtlanihque:

—¿Tleca ijiconon tictlaholmacas in hueyixtoc den tiopixcamen den Dios?

⁵Huan Pablo oquinanquilic:

—Nocnihuan, nehhuatl ahmo onicmatiyaya in tla yehhuatl in hueyixtoc den tiopixcamen. Quen quihtohua in Itlahcuiloltzin: “Ahmo ticamanaltis ihuan se tequihua den mocnihuan.”

⁶Oncan Pablo oquichiu cuenta quen sequin tequihuahmen saduceos huan oc sequinten fariseos. Huan otlahto chicahuac:

—Nocnihuan, nehhuatl nifariseo, ihuan nochanihcahuan. Huan nannechixcomacaticaten tleca nicneltoca ihsasque oc sepa in mijcamen.

⁷Ihcuac oquihto inon, in fariseos huan in saduceos opeuque motlatlaxiliyahque san yehhuan in tlahtoli, huan omoixnamijque.

⁸Tleca in saduceos quihtohuahque

quen in mijcamen ahmo ihsasque huan ahmo caten in ángeles, niyan in yehyecamen. Huan in fariseos quineltocahque ica nochin inin. ⁹Nochten otzahtzihque huan omoquetzque sequin tlamachtiyanimen den tlanahuatili quen oquisematiyahque nochten in fariseos huan oquihtohque:

—Inin tlacatl ahmo tlen quichiuotc in tlen ahmo cuali, huan tla cana yiquicactoc se tlahtoli ipan neliuac noso den se ángel, ahmo matiquixnamiquican in Dios.

¹⁰Omotlahtolmohsihuihque tequin huan in capitán omomoutihticatca quen quimocohcotonanihque in Pablo. Ijcon otlanahuati mahualacan in soldados ic quiqxistisque ipan yehhuan. Huan oc sepa ocuicaque ipan in comandancia.

¹¹Ic mostla tlayohua in Totecohtzin oquimonextililoc in Pablo huan oquiluiloc:

—Ximoyolchicahua Pablo, tleca ijcon quen yititlanonotztoc ica nehuatl nican Jerusalén, noyojqui ijcon tiquinnotzas nepa Roma.

Omosetilihque quenin quimictisque in Pablo

¹²Huan ic mostla oc sequin judeahtecus oculosematque quenin quimictisque in Pablo. Oquicaquiltihque intlahitol quen ahmo tlacuasquiyanihque niyan quionisquiyanihque itlahtlen hasta quimictisque in Pablo. Huan oquihtohque: “Matechpolocan in tlahmo melahuac.” ¹³Ocatcahque ocachi de ompohuali tlacamen in aquin omosechiueque ijcon.

¹⁴Huan oyahque quitahque in tlancaman den tiopixcamen huan in tetecten den judeahtecus huan oquiniluihque:

—Tehhuanten oticaquiltihque totlahtol ahmo tlen ticusasque hasta ticmictisque in Pablo.

¹⁵Huan axan namehhuan huan in oc sequinten tequihuahmen xictlahtlanilican in capitán quen mostla macualica namoixpa in Pablo, tla cana nanquiyoluitisque tlen ic ticyecmatisque. Huan nochin tehuan ticchixtiyesque para ticmictisque san quen ahsiquiu.

¹⁶Huan in iconiu in icniu Pablo oquimat inon tlahtoli huan oya ipan in comandancia quinahuatiya in Pablo. ¹⁷Oncan Pablo oquinotz se in tlayecanqui huan oquiluic:

—Xicuica inin telpochtli inahuac in capitán, tleca quipiya tlen quinohnotzas.

¹⁸In tlayecanqui oquihuiquili in capitán huan oquiluic:

—In tlataluili Pablo onechnotz huan onechtlahtlanili manicualiquili inin telpochtli nis. Quinequi tenohnotzas.

¹⁹In capitán oquimaquitzqui inon telpochtli huan ihuan omoxeloc secnин huan oquitlahtlani:

—¿Tlenon ticnequi tinechiluis?

²⁰Oncan inon telpochtli oquiluic:

—Inohque judeahtecos omohualsechiueque ic tetlahtlanilisque mostla mamohuica in Pablo iixpa in tequihuahmen tla cana quiyoluitisque ic quiyecmatisque tlen oquichiu.

²¹Huan ahmo xiquinneltoca tleca ocachi de ompohuali tlacamen quipihpixtacaten. Oquicaquiltihque

intlahtol quen ahmo tlen
quicuasque niyan quionisque hasta
quimictisque in Pablo. Huan axan
yompa mochixtoque ica motlahtol.

²²Oncan in capitán oquinahuati
in telpochtli ahmo maquiilui niyan
aquin in tlen oquiluihtoya.

**In Pablo quititlanihque
iixpa in hueyixtoc Félix**

²³Oncan in capitán oquinnotz
ome tlayecancamen huan
oquintequiuti mamoyectlalican ome
ciento soldados huan yehpohuali
huan mahtlactli ipan incahuayo,
huan oc ome ciento ica in lanza
ic yasque Cesarea cana chicnahue
horahyohuac. ²⁴Huan noyojqui
oquintequiuti maquiyectlalican
se cahuayo para in Pablo ipan
yas. Huan oquintitlanque
maquitemactican tlamach iixpa in
hueyixtoc Félix. ²⁵Inuan oquititlan
se amatl tlen oquihto:

²⁶“Neh ni Claudio Lisias
nitetlahpalohua in molui cualtzin
quen hueyixtoc Félix. ²⁷In
judeahtecos oquipixtoyahque
quen motzacuani in Pablo huan
oyayahque quimictiyahque. Ihcuac
nehhuatl onicmat quen inon
tlacatl romanohteco, oniya ihuan
nosoldados nicpalehuiya. ²⁸Tleca
onicnequiyaya nicmatis tlen ica
quiteluiyahque, onicuicac iixpa
in tequihuahmen judeahtecos.
²⁹Huan tlen ic oquiteluiyahque
ica in tlanahuaultilten de
yehhuan, huan ahhuell
oquitlahtlacoltiyahque ica tlen
quimictisque niyan quitzactosque.
³⁰Huan quen onicmat quen
quichihuasquiyanihque in

judeahtecos ic quimictinihque in
Pablo, axan nican nitetitlaniliya.
Huan noyojqui yoniquintlahtlanili
in aquin quiteluiyahque mayacan
teixpa ica tlen quiteluiyahque
yehhuan. Huan hasta mostlatzin.”

³¹Oncan in soldados, quen
oquinnaahuatihque, oquihuicahque
tlayohua in Pablo hasta ipan
in altepetl Antípatris. ³²Huan
ic mostla in soldados aquin
onehnenque omocuepque ipan in
comandancia huan in caballeros
oquihuicahque in Pablo quen
tlateluili. ³³Ic oahsito hque Cesarea
oquimacaque in amatl in hueyixtoc
huan oquitemactihque in Pablo.
³⁴In hueyixtoc oquipou achto inon
amatl huan oquitlahtlanic de canin
ialtepeu in Pablo, huan oquimat
yehhua den tlali Cilicia. ³⁵Huan
oquiluic:

—Nimitzcaquis ihcuac hualasque
in aquin mitzeluiyahque.

Oncan oquintequiuti
maquixpixtiyecan ipan in telpiloyan
den hueyixtoc Herodes.

Mopalehuiya in Pablo iixpa in Félix

24 Ipan macuili tonali in
Ananías in hueyixtoc den
tiopixcamen oahsito in Cesarea
inuan sequin teteceten huan se
tlahtolchiuqui, itoca Tértulo.
Inohque omotemactihque iixpa in
hueyixtoc ic oquiteluihque in Pablo.
²Ihcuac oquihualicahque in Pablo,
in Tértulo opeu quiteluiya, huan
oquiluic in hueyixtoc Félix:

—Tlasohcamati temahuesiyotzin,
ica tehhuatzin tlamach ticaten
huan tipactoque, huan nochin
cuali ca ica in tetlamatilis. ³Nochin

inin ticseliyahque nochipa huan nohuiyan, notetlasohcau Félix, huan ica miyac mahuestilistli.

⁴Huan axan ic ahmo titetonalpoluisque, nitetlatlautiya tequin matechuelitalo huan matechcaqui inin rato. ⁵Quen ticmautoque, inin tlacatl san techmohsihuiya. Huan nohuiyan ipan in tlalticpactli quintlahtolmaca huan quinxelohua in judeahtecos.

Huan yehhua in tlayecanqui den ololi nazarenos. ⁶Oixcohyeu quihtlacohua in tiopantli huan tehhuanten otiquitzquihque huan oticnejque tiquixcomacasque quen quitequiutis totlanahuatil. ⁷Huan in capitán Lisias omocalacti ica chicahualistli hasta otechcuili inon Pablo. ⁸Huan oquihto in aquin quiteluiyahque quipiyahque tlen hualasque ica tehhuatzin. Cuali motlahatlantis huan momatis in tlen melahuac ica nochin inin tlen ic ticteluiyahque.

⁹Inon judeahtecos aquin ompa ocatcahque noyojqui oquihtohque inin nochin melahuac. ¹⁰Oncan in hueyixtoc oquicau matlahto in Pablo, huan oquihto inon Pablo:

—Tequin nipaqui ic nimopalehuis teixpa tleca nicmati tehhuatzin in tlixcomacani de inin judeahtecos de yihuehcau. ¹¹Quen tehhuatzin cuali momatis, san hueloc mahtlactli huan ome tonali oniahcico Jerusalén ic nitemahuestilis in Dios. ¹²Huan ahmo onechahsique aquin ihuan nimahhuatica, niyan niquincooliya in tlacamen den tiopan, niyan in judeahtecos niyan canin ipan in altepetl Jerusalén. ¹³Inin tlacamen ahhue

quichipahuasque ica inin tlahtoli tlen ic nechteluiyahque. ¹⁴Huan in tlen nicmocuitis quen nitetlacamat in Dios de notatahhuan quen ixnesi in yancuic tlanehnehuilistli tlen yehhuan quiluiyahque ahmo melahuac. Tleca nicneltoca nochin tlen ca tlahuiloli ipan itlanahuatil Moisés huan ipan in amamen de inon tetlayolchicaucahan Totecohtzin. ¹⁵San no ijcon nicneltoca ica in Dios quen yehhuan quineltocahque. Ticneltocahque quen ihsasque in mijcamen, in aquin cualten quen in aquin ahmo cualten. ¹⁶Huan ic inon nochipa nicnequi ahmo maniquincocolmaca niyan Dios huan niyan tlacamen.

¹⁷Ipan quesqui xihuítl oninemiyaya ipan oc sequin tlalten, huan onimocuep neh notlalpa. Huan oniquinmacti in prohues in tlen oquintlocolihque in aquin ahmo judeahtecos huan noyojqui ic nictemactis in notetlocolil.

¹⁸Nehhua onichiuticatca ijcon ihcuac sequin judeahtecos den tlalten Asia onechahsique ipan in tiopantli niyolchipahuac quen ca in tlanahuatili. Huan niyan ahmo ocatcahque miyac tlacamen nohuan, niyan ahmo ottimocococolihque.

¹⁹Yehhuan inohque quipiyahque tlen hualasque motemactisque nican ic nechteluiyahque in tla quipiyahque itlahtlen ica nehhuatl.

²⁰In tlahmo yojqui, mateiluican inihque tla onechahxililhque notlahtlacol ihcuac onicatca inixpa in tequihuahmen den judeahtecos.

²¹In tlahmo san ijcon ihcuac ompa onicatca inuan oniquiniluic: “Axan nannechixcomacaticaten

ic nicneltoca quen ihsasque in mijcamen."

²²Yiquicaquiltihtoque inon hueyixtoc Félix ica in yancuic tetlanehnehuilis in Cristo. Queman oquicac in Pablo, oquincahuili oc se tonali huan oquiniluic:

—Ihcuc ac hualas in capitán Lisiás nictlahtlanis ocachi ican inin tlahtoli.

²³Oncan in hueyixtoc Félix oquitequiuti in tlayecanqui quenin Pablo ma ompa quiixpixtocan, huan maquinacahua quitasque huan quitecpangohtiesque in itenonotzcahuan.

²⁴Huan satepa in oc sequin tonalten oahsito oc sepa in hueyixtoc Félix ihuan isihuau Drusila, yehhuatl in judeahteco. Huan otlatequiuti maquinotzacan in Pablo ic mamonohnotzacan ican in itlaneltocalistzin Jesucristo.

²⁵Huan ihcuac Pablo oquinonotz ican in melahuac nemilistli huan quen ahmo maquichihua san tlen tleca satepa huitz in tlixcomacalistli teixpa in Dios, Félix omomouti huan oquiluic:

—Axan xiayu, huan ihcuac cuali, oc sepa nimitznotzas.

²⁶Noyojqui in hueyixtoc Félix oquichiyayaya in Pablo maquimaca in tomin ic quicahcahuasquiyani, huan ic inon oquinotz miyacpa para ihuan monohnotzas. ²⁷Ijcon opanoc ome xiupa huan oncan Félix oquiquixtilihque in itequihuahyo huan otequian in Porcio Festo, ipatlaca in Félix. Huan quen Félix oquinequiyaya quimpacmacas in judeahtecos, oquicau tzactoc in Pablo.

Pablo iixpa in hueyixtoc Festo

25 Oncan Festo oahsico ic mochihuas hueyixtoc huan yi yi tonali satepa oquis Cesarea ic tlehcos Jerusalén. ²Nepa in achtohque den tiopixcamen huan in judeahtecos aquin hueyi inquisca oquimactihque in tlen ic quiteluiyahque in Pablo. ³Omotlatlautihque inahuac in hueyixtoc quen maquianacan in Pablo Jerusalén. Yehhuan oquinejque maquichtacamictican ipan in ohtli. ⁴Huan in hueyixtoc Festo oquinannquilic quen in Pablo tzactoc Cesarea, huan yehhuatl oquinehnehuili yas ompa ipan sequin tonalten ayacmo huehca. ⁵Oquiniluic:

—Ic inin aquin namehhuan nantequiuhahmen nanyasque nohuan Cesarea, huan tla inon tlacatl quichiutoc itlahtlacol, cuali nanquiteluisque.

⁶Oncan in hueyixtoc Festo ocatca Jerusalén cana chicueyi tonali noso mahtlactli, huan omocuep Cesarea. Huan ic mostla yehhuatl oquian itequiu den presidencia huan otlatitlan macualicacan in Pablo. ⁷Ihcuc Pablo ocalac, omopachohque in judeahtecos in aquin oahsitoque den Jerusalén huan oquiteluihque ica miyac tlahtoli masque ahuel quichipahuilisque niyan tlen.

⁸Oncan Pablo oquihto tlen ic mopalehuis: —Nehhuatl ahmo tlen nicchiutoc, niyan ica in tlanahuatili den judeahtecos, niyan ica in tiopantli, niyan ica in hueyixtoc romanohteco.

⁹Huan quen in hueyixtoc Festo oquinequiyaya quimpacmacas in judeahtecus, oquitlahtlani in Pablo:

—¿Ticnequi tiyas in Jerusalén huan neh nimitzixcomacas ompa?

¹⁰Huan Pablo oquinnanquilic:
—Nica niexpa in presidencia den hueyixtoc romanohteco. Yehhua in canin nicpiya nimixcomacas. Quen moyecmautica, ahmo tlen nicchiutoc ica in judeahtecus. ¹¹In tla nicchiutoc itlahulen tlahltacoli ic tlen nimiquini, nimotemaca ic nimquis. Huan in tlahmo oncan tlen melahuac ica inon tlahfoli tlen ic nechteluiyahque, ahhuel aquin nechtemactis inuan. Nictlahtlani san yeh in hueyixtoc romanohteco manechixcomaca.

¹²Oncan satepa ic omonohnotzque inuan itlanonotzcahuau, in hueyixtoc Festo oquiliuc:

—Yotictlahtlani mamitzixcomaca in hueyixtoc romanohteco. Tiyas tiquitas yehhuatl.

Pablo mopalehuiya iixpa in hueyixtoc Agripa

¹³Satepa ipan in oc sequin tonalten, in hueyixtoc Agripa huan isihuau Berenice oyahque in Cesarea ic quitlahpalohuahque in Festo. ¹⁴Quen omotzecohque sequin tonali nepa Cesarea, in Festo oquinonotz in hueyixtoc tlen oquipanoc in Pablo, huan oquiliuc:

—Oncan se motzacuani nican oquicautehuac in Félix. ¹⁵Ihcucan onicatca Jerusalén in achtohque den tiopixcamen huan in tequihuahmen den judeahtecus onechmactihque tlataluili ica yehhuatl, quen manictlahtlacolti.

¹⁶Neh oniquinnanquilic quen ahmo itlamachilis in tequihuahmen romanohtecos maquintlahtlacoltican ica miquilistli in aquin ayamo quixcomacahque, ic mopalehuiyahque. ¹⁷Ic inon, ihcuac yehhuau ohualahque nican, ahmo onitonapolo. Ic mostla onicalac ipan in tequihuahyotl huan onitlatitlan maquihualicacan inon tlacatl. ¹⁸Huan in aquin omoixpantihque ic quiteluisque ahmo tlen oquiuhque ica yehhuatl in tlen onicnehnehuiliyaya.

¹⁹Oquiteluiyahque san ica intlaneltoquilis huan ic oc seja itoca Jesús quen omic, huan Pablo quiuhua yehhuau yoltoc. ²⁰Quen Nehhuatl ahmo onicmatiyaya quen nicchihuas ica tlahfoli quen inin, onictlahtlani in Pablo tla quinequi yas Jerusalén ic moixcomacatu nepa ica inon tlahfoli. ²¹Huan quen yehhuatl oquitlahtlan moixcomacas inahuac in hueyixtoc Augusto César, onitlanahuati maompa tzactoc hasta ihcuac Nehhuatl cuali nictitlanis inahuac in hueyixtoc.

²²Oncan in Agripa oquiliuc in Festo:

—Neh noyojqui nicnequi nicaquis inon tlacatl.

Huan Festo oquinanquilic:

—Mostla mocaquis.

²³Huan ic mostla, ihcuac in Agripa huan isihuau Berenice oahsitoque, ocalajque ic mohueyilihihue ipan in cali inuan in tlayecancamen soldados huan in tequihuahmen den altepetl. Festo otlatitlan macualicacan in Pablo, ²⁴huan oncan oquihto:

—Hueyixtoc Agripa huan tlacatzitzin san secnin tohuan nican ihilohuac, nican nanquitahque inin tlacatl. Miyacten den judeahtecos nechnonotztoque ica yehhuatl, quen Jerusalén huan nican Cesarea, huan ahmo quilcahuahque ic nechiluiyahque quen mamiqui. ²⁵Ica nehhuatl ijconon nesi ahmo tlen quichiutoc ic maticmictican. Huan quen yehhuatl oquitlahtlan ic moixcomacas inahuac in hueyixtoc Augusto César, nictemactilis yehhuatl.

²⁶Huan quen ahmo nicpiya tlen yec nictlahcuiluis notecohtzin in hueyixtoc ica yehhuatl, nicualica namoixpa, huan ic nochin teixpa tehuatzin hueyixtoc Agripa, ic mamoistlacaahsi yec. Ic inon manicpiya tlen nitlahcuilos ica yehhuatl. ²⁷Tleca ica nehhuatl, ijcon nesi quen san tlaluis nictitlanis se preso huan ahmo nitlanahuatis tlen ic quiteluihque.

26 Oncan in Agripa oquiuic in Pablo:

—Cuali titlahtos san tehuatl ic timopalehuis.

Oncan in Pablo oquiahcoc in iman maquicaquican, huan opeu tlahtohua:

²—Tequin nipaqui ic cuali titlahtos teixpa tehuatzin hueyixtoc Agripa, ic nimopalehuis ica in judeahtecos tlen oquiuhque ica nehhuatl. ³Ic achto tleca tehuatzin momati nochin intlamachilis tlen quipiyahque in judeahtecos huan ica tlen timonohnotzasque. Ic inon nitetlatlautiya manechcaquican tlamach.

Quen onemiyaya in Pablo ihcuac ayamo oquineltocac

⁴Nochten in judeahtecos quimatihque quen oninemiyaya inuan ipan noaltepeu huan ic Jerusalén queman oc nitelpocatl. ⁵Yehhuan noyojqui quimatihque quen ihcuac nitelpochtli nifariseo huan cuali quihtosque in tla quinequihque. Huan yehhuan fariseos quitlacamatihque in tlanahuatili ocachi quen nochin. ⁶Huan axan nechixcomakahque ica tlen nicneltoca, quen Dios oc sepa quinihxtilos in mijcamen quen oquiniluilic in tochichicacoluan. ⁷Nochin in mahtlaactli huan ome ololi den Israel quichiyahque ihcuac hualahsis inon tlahtoli, huan ic inon temahuestiliyahque in Dios quen tlahca huan quen tlayohua. Huan quen ijquin nicneltoca, tehuatzin hueyixtoc Agripa, ica inon in judeahtecos nechteluiyahque axan. ⁸Cox,  ahmo nanquineltocahque namehhuan quen Dios quinihxtilos in mijcamen?

⁹Neh noyojqui ic achto onicnehnehuiliyaya nicchihuas san tlen ica in Jesús tealtepeu Nazaret.

¹⁰Huan ijcon onicchiu ompa Jerusalén. Ica intlamatiyan den achtohque tiopixcamen nehhuatl oniquintzacu ipan in telpiloyan miyaquin tlaneltocanimen den yancuic nemilistli. Huan ihcuac oquinmictiyahque, inuan onicsematiyaya. ¹¹Miyacpa nehhuatl oniquintlapanoliyaya huan oniquinyoluiti tla cana tecamanaltisque ica in Jesús. Inin onicchihuayaya ipan

nochin tiopanten huan molui
oniquincocoliyaya, huan
oniquinmohsihuiyaya hasta ipan in
altepemen den sentlapal.

**Pablo oc sepa quinnonotza
quen omoyolcuep**

¹²Quen ic inon
onechtequiutiyahque, oniyaya
ipan in altepetl Damasco
ica itequihuahyo huan quen
nitlatitlanil in achtohque den
tiopixcamen. ¹³Huan ipan in ohtli,
oniquitac ic nepantla opetlan
tonahuac tehuantan se tlanextli
den neluicac ocachi chicahuac quen
itleyo den tonatzintli. ¹⁴Oncan
tinocchten otihuetzque tlalpa, huan
onicac se tlahtoli tlen nechiluiya
ica tlahtoli hebreo: “Saulo, ¿ticlea
tinechmohsihuiya? San tehuatl
timococohtica, quen quichhua
in cuacue ihcuac quitlasa in icxi
ica in tlacotl.” ¹⁵Oncan omiquiho:
“¿Aquin Tehhuatzin, Notecohtzin?”
Huan onechiluic in Totecohtzin:
“Nehhua niJesús, in aquin tehuatl
ticmohsihuihtinemí. ¹⁶Huan
ximoquetza, tleca onimitzmonextili
ica se tlahtoli. Xiquinmatilti
in tlen axan otiquitac huan
in tlen tiquitas ica Nehhuatl
satepa. ¹⁷Nimitzmaquixtis ica
in judeahtecus huan noyojqui
ica in aquin ahmo judeahtecus.
Huan axan nimitztitlaniliya
xiquinmatilti itlahtoltzin Dios.
¹⁸Nimitztitlani xiayu xiquincaquilti
ic maquinehnehuilican in
nemilistli tlamelajcan huan
ayacmo manehnemican ipan
in tlayohuilotl, tlahmo ipan in
tlanextli. Huan ahmo mayecan

imajco in ahmo cuali tlacatl,
tlahmo matecuitlapapanuican in Dios.
Huan ijcon cuali niquintlapohpoluis
ica intlahtlacol maquiselican
intetlocolil inuan nochin
tetlapehpeniluan Dios.”

**Pablo oquichiu cuenta
ica tlen oquicac**

¹⁹Ijcon tel, hueyixtoc Agripa,
ahmo san ic onicchiu in tlen
oniquitac ic neluicac. ²⁰In
tlahmo oniquinnonotz in
itlahtoltzin Dios achto in aquin
ocatcahque Damasco, huan
nimán in Jerusalén, huan
nohuiyan ipan tlali den Judea.
Huan noyojqui oniquinnonotz
in aquin ahmo judeahtecus.
Oniquinyolchicahuayaya
mamoyolcuepacan ica in Dios,
maquichihuacan intequiu in tlen
cuali. ²¹Ic inon onechquitzquihque
notlacaicnihuan judeahtecus
ipan in tiopantli huan
oquinequiyahque nechmictisque.
²²Huan quen onechpalehuihque in
Dios, hasta axan nicchipautinentica
iixpa nochten, masque hueyi
inquisca noso ahmo tlen inquisca.
Ahyic tlen niquinnonotza in
tlahmo yeh in tlen oquihohque
in tetlayolchicaucahuán Dios huan
in Moisés, nochin in tlen quihiya
tlen panos. ²³Quihtosnequi quen in
Cristo omopiyayaya tlen tlapanolos
huan satepa de micohuas maye
in achto aquin ihxohuas ipan in
mijcamen. Ijcon maquinnonotzalo
ica itlahtoltzin den temaquixtilistli,
ijcon quen ica in tochantlacahuán
huan quen ica in oc sequin
tlacamen.

**Pablo quinequi quiyolcuepas
in hueyixtoc Agripa quen
teneltocasquiyani**

24 Ic oquihto in Pablo inin tlaholtli tlen ic mopalehuis, in Festo otzahtzitehuac:

—iTiloco Pablo! Ic tequin timomachtihtoc hasta tiloco otimocuep.

25 Huan Pablo oquinanquilic:

—Ahmo niloco, tehhuatzin in Festo. Nochin tlen niqlihohua tlamelajcan. **26** Nicanca in hueyixtoc Agripa. Yehhuatzin moyequixmati inin tlaholtli. Huan ic inon nitlahtohua ahmo ica pinaucayotl teixpa yehhuatzin. Nicmati yec nele yehhuatl noyojqui momati nochin inin tlaholtli, tleca ahmo timonohnotzahque ica tlaholtlen san ichtaca. **27** ¿Tlen cox, hueyixtoc Agripa, ahmo moneltoca tehhuatzin in tlen oquihtohque in tlayolchicaucamen? Neh nicmati quen moneltoca.

28 Huan in hueyixtoc Agripa oquiliuc:

—Ic oc chihton tinechyolcuepani ic nimochihuani nitlaneltocani.

29 Oncan Pablo oquihto:

—Maye chihton noso miyac, Yehhuatzin in Dios momati. Nicnequi ahmo san tehhuatzin, in tlahmo noyojqui nochten in aquin axan tlacacticaten, mamochihuacan quen nehhuatl, huan ahmo ica inin cadenas.

30 Satepa quen Pablo oquihto inin, omoquetzque in hueyixtoc Agripa huan in hueyixtoc Festo inuan in Berenice huan nochten aquin ompa oyehuatoyahque. **31** Huan

omoxelohque ic omononotzque inon tlaholtli. Huan oquihtohque sequin de yehhuan:

—Inin tlacatl ahmo tlen quichiutoc ic maquimictican, niyan ic matzacto ipan in telpiloyan.

32 Huan in hueyixtoc Agripa oquiliuc in Festo:

—Cuali ticalahuanihque inin tlacatl in tlahmo san yehhuatl oquitlahtlan maquixcomaca in hueyixtoc Augusto César.

Oquititlanque in Pablo ic Roma

27 Ihcuac omotemacaque tecchtitlanisque ic in tlali Italia, Pablo inuan oc sequin presos oquintemactihque ihuan se tlicanqui itoca Julio. Ocatca den ololi den soldados ihuaxca in hueyixtoc Augusto César. **2** Otitlecohque ipan se barco itocahyan Adramitio tlen panohtas ipan in altepemen den Asia. Noyojqui tohuan ocatca Aristarco, chani den Tesalónica, se altepetl den Macedonia. **3** Huan ic mostla otiahsique ipan in altepetl Sidón, canin in tlicanqui Julio oquicau in Pablo mayau quinita in itenonotzcahuan, huan ijcon maquipalehuican yehhuan. **4** Ic otquisque in Sidón, otipanoque ic se lado inon tlali tlen ca inepanco in atl, itoca Chipre, tleca otiquixnamijque in yehycatl. **5** Otictlahcotejque in hueyi atl iixpa in atlalentli den tlali Cilicia huan Panfilia, huan otiahsique ipan Mira, se altepetl ipan in tlali Licia.

6 Ompa in tlicanqui den soldados oquiahsic oc se barco den altepetl Alejandría. Yehhua

in tlen oyahticatca ic Italia, huan otechtlehcahui ipan matiyahtiyecan.⁷ Ipan miyac tonali otinehnentictahque yolic, huan ica molui tequiyo otiahsique iixpa in altepetl Gnido. Quen oc otiquixnamicticatcahque in yehyecatl, otipanohque iixpa in tlali tlen ca ipan in atl, itoca Salmón, ic oticyehualohque in tlali tlen ca ipan in atl, itoca Creta.⁸ Ica miyac tequiyotl otipanotayahque ic huehca atlalentli, huan otiahsique ipan se altepetl tlen ca intentla in atl, itoca Buenos Puertos, ic inahuac in altepetl den Lasea.

⁹Huan opoliu miyac tonali, huan yocatca molui maluili nemohuas ipan in hueyi atl, tleca yoahsiticatca ipan in tonali ocachi yehyeca.¹⁰ Ic inon in Pablo oquinnonotz:

—Tlacatzitzin, nicmati quen yes ocachi maluili tla ticseguirosque axan huan ticpolosque quen in barco huan quen in tlamamali huan hasta noyojqui tehuan timopolosque.

¹¹Huan in tlicanqui den soldados oquichiu cuenta in aquin quinehnemiltiya in barco huan ahmo ica in Pablo.¹² Huan quen inon altepetl tlen ca intentla in atl ahmo cuali ic mocahuas inon tonali, casi nocten oquinehnehuilhque ocachi cuali tiquisasque de nepa, in tla cuali tiahsisque ipan in oc se altepetl den Creta, itoca Fenice, cuali timocahuasque inon tonali.

In tetzahuitl ipan in hueyi atl

¹³Oncan quen opeu yehyeca yolic, oquinehnehuilhque quen cuali tinehnentiyesque. Huan

otquisque, huan otipanohque inahuac in atlalentli den Creta.

¹⁴Huan satepa oquixnamic inon barco inon yehyecatl oquitocahhuihque Nordeste.¹⁵ Inon opeu quitilana in barco. Quen ahuel oquixnamijque in yehyecatl, ijcon otimocauque matechuica.

¹⁶Otipanohque icuitlapa se tlali quitzinin ipan in atl itoca Clauda, canin ahmo oyehyecaticatca chicahuac, huan ica miyac tequiyotl otictehcahhuihque in quitzinin barco in tlen oquitilantaya.

¹⁷Queman otictehcahhuihque in barquito, oquitlahcoyalohque inon hueyi barco ic ahmo maixsoui. Huan omomoutihticatcahque ic yas moxaltocas in barco ihtech inon xalsoquitl itocahyan Sirte. Ic inon oquitemohuihque inon lona den barco huan ijconon omocauque maquinuica inon yehyecatl.

¹⁸Huan ic mostla sajconon oyehyecaticatca chicahuac. Oncan opeuque quitohuetzohuahque inon tlamamali ihtech in mar.

¹⁹Huan ic huiptla ica tomahuan otictehcahhuihque ipan in atl nochin inon tlen oquihuicayaya ipan inon barco.²⁰ Ipan miyac tonali ahuel otiquitaque in tonaltzintli niyan in sitlatlen, huan tequin chicahuac in yehyecatl otechpanoc. Yotimohmoutihque ayacuel timaquisasque.

²¹Quen yotipanoque miyac tonali ahmo aquin tlacuahtoc, in Pablo omoquetz huan oquiniluic:

—Tlacatzitzin, ocachi cuali nannechcaquinihque huan ahmo tihualquisanihque den Creta para titlapanonihque huan

titlapoloniuhque. ²²Huan axan ximoyolchicahuacan tleca niyan se de namehhuan ahmo miquis, masque in barco polihuis. ²³Tleca inin tlayohua onechmonextili se ángel tetlatitlanil inon Dios aquin tehuan nimosetilihtoc huan nitepalehuihtoc. ²⁴Huan in ángel onechiluic: “Ahmo ximomouti, Pablo, tleca ticpiya tlen timotemactis iixpa in hueyixtoc romanohteco. Huan mopampa Dios mechmaquixtilos den miquilistli nochten in aquin mohuan caten ipan in barco.” ²⁵Ic inon, ocachi ximoyolchicautzinocan, tleca nicmati nele Dios in tlen onechiluic inon ángel, nochin quisas. ²⁶Huan ticpiyahque tlen tiquisahihue ipan se tlali tlen ca inepanco in atl.

²⁷Se yohuali satepa de inon ome semana ic tiyahaticaten, oticatcahque ipan in mar itocahyan Adria. Otechuicataya san canic inon yehyecatl. San ihcuac yitlahcoyohuac inon tlacamen den barco otlamatque yoahsitayahque ipan tlali. ²⁸Huan oquitamachiuque ic huehcatla in atl huan oquipiyayaya sempohuali huan caxtoli huan se metro. Huan ocachi ompic oquitamachiuque oc sepa huan oquipiyayaya sempohuali huan chicome metro ic huehcatla. ²⁹Huan omomoutiyayahque cana moixuitequis in barco ipan inon tetl. Huan ic ahmo nemis ocachi, oquintemohuihque ihtech in atl nahue huehhueyi ganchos tlen ilpihtoc icuitlapa in barco. Huan ica moucayotl oquichixque matlatui. ³⁰Satepa inon tlacamen den barco oquinehnehuilihque

maquisasque, huan ic inon opeuke quitemohuiyahque in barquito, quen yasquiyanihque quitlasanihque oc sequin ganchos ic iixpa ipan inon barco. ³¹Huan Pablo oquinahuati in tlayecanqui den soldados huan oquiluic:

—In tla inihque ahmo mocahuasque ipan in barco, namehhuan ahhuell nanmaquisasque.

³²Oncan in soldados oquitejque in lazo ic oilpihtoyahque inon barquito huan oquicauque mahuetzi ipan in atl.

³³Huan ic yau tlatui, in Pablo oquintequiuti nochten maquicuacan itlahtlen huan oquinto:

—Yiquipiya ome semana namehhuan ahmo nancochtoque huan niyan nantlacuahque.

³⁴Namechtlatlautiya, xicuacan itlahtlen. Inon ic nele mechpalehuis. Tleca niyan aquin ahmo quipolos niyan se itzon.

³⁵Ic oquihto inin, Pablo oquian se pan huan omotlasohcamat ica in Dios iixpa nochten. Oncan oquiomequixti huan opeu tlacua.

³⁶Oncan nochten omoyolchicauque huan noyojqui tlacuahque.

³⁷Oticahcatca ic tinachten ipan in barco ome ciento huan yehpohuali huan caxtoli huan se tlacamen.

³⁸Huan satepa ic yotipachiuque, oquitlasque in trigo ipan in mar ic oquichiuque ocachi ahmo yetec in barco.

Quen omoatocac in barco

³⁹Ihcuac otlatuic, in tlacamen den barco ahmo oquixmatque in tlali. Huan oquitaque canic

panosque inepantla in tetl hasta in atlalentli, huan omixcohyejque yec in tla cuali quipachosque in barco ompa. ⁴⁰Oquitejque inon lazos den ganchos huan oquincaque ipan in mar. Huan oquicaxanihque in timón tlen quihtosnequi inon tlen ic quinehnemiltiyahque in barco. Oncan oquiajcojque inon lona ic iixpa maquipalehui in yehyecatl. Oncan in barco opeu mopachohua in atlalentli. ⁴¹Huan oahsito ipan canin quixnamiquis inon chicahuac atl huan in barco otillito ipan in xali. In ic iixpa omoxaltocato in barco, huan ic icuitlapa opeu cohctoni ic chicahuac oquihuitecitatca in atl. ⁴²Oncan in soldados oquinejque quinmictisque in presos ic ahmo macholocan malihtasque. ⁴³Huan in tlayecanqui den soldados oquinec quimaquixtis in Pablo, huan ahmo oquincahuili maquichihuacan ijcon. Tlahmo oquintequivuti in aquin oquimatzque maliyahque mamotlasacan ipan in atl ic maahsican atlalentli. ⁴⁴Huan in oc sequinten mayahtiyecan ipan in tablas noso in tlen cohctonque den barco. Ijcon omaquisque nochten ic tlalpa.

**In tlen opanoc ica Pablo
ipan in tlali Malta**

28 Ihcuac yotimaquisque tinochten, oticmatque inon tlali tlen oticahsique itoca Malta. ²Inon chanimen de ompa otechyequitaque. Huan oquixotlaltihque se hueyi tletl ic omochiuticatca in itztic huan ic oquiauticatca. Huan otechiluihque

tinochten matimopachocan timototonican. ³Oncan in Pablo oquitilan oc chihton cohuitl huajqui huan oquitlalihticatca ipan in tletl ihcuac se cuatl ocholohcticatca den tlatotonilotl huan oquiquitzqui ipan iman. ⁴Ihcuac inon chanimen oquitaque inon cuatl pilcatica ipan iman in Pablo, omoluihque yehhuanten:

—Inin tlacatl huelis temictiyani, masque omaquis ipan in mar, itlahtlacol ahmo quicahua manemi.

⁵Huan Pablo omomatzetzelo ica in cuatl ipan in tletl, huan ahmo tlen oquipanoc. ⁶Nochten oquichixticatehque maposahui noso mahuetzi mijqui, huan ic huehcau oquichixticatehque ihcuac oquitaque ahmo tlen oquipanoc. Omoyolcuepque huan opeuke quihtohuahque quen in Pablo yehhua se dios.

⁷In tequihua de inon tlali itoca Publio. Yehhua oquimpix sequin calten ahmo huehca de ompa, huan otechtlatlauti ma ompa timocahuacan. Ic inon ompa otimocauque yi yi tonali.

⁸Opanoc quen in itata in Publio omococohtoya ica in totonqui huan tlahyili. Huan Pablo oya quiita. Huan ihcuac omoyolmachti huan oquitlali in iman ipan yehhuatl, ijcon opahtic. ⁹Huan ic inon ohualahque noyojqui oc sequin cocoxcamen aquin ochantiyayahque ipan inon tlali, huan noyojqui oquimpahti. ¹⁰Huan ijcon molui otechtlasohtlahque huan queman otiyahque oc sepa ipan in barco, otechmacaque nochin tlen ticnequisque ipan inon viaje.

In Pablo yoahsic in Roma

¹¹ Satepa de yiyi metztlí ipan inon tlali, otiyahque ipan in barco tlen ompa oquipanoc inon tiempo itztic. Inon se barco de Alejandría huan ocuicayaya iixpa intlachialis de inon dioses Cástor huan Pólux. ¹² Otiyahsique canin in itentlatepetl Siracusa canin otimocauque yiyi tonali. ¹³ Huan de ompa otiyahque san atlalentli ic otiyahsique itentlatepetl Regio. Huan ic mostla otiquixnamijque ic hualtemo yehyecatl. Huan ipan ome tonali otiyahsique itentlatepetl Puteoli. ¹⁴ Ompa otiquinahsitoque sequin tocnihuan huan otechtlatlatlautihque matimocahuacan se semana inuan. Huan satepa otiquisque para Roma. ¹⁵ In tocnihuan den Roma yiquimautoque de tehhuan, ijcon oyahque technamiquihque ipan in hueyi ohtli itoca Foro de Apio canin itocahyan Yiyi Calten. Ic oquinitac Pablo, omotlasohcamat ica in Dios huan ocachi omoyolchicau. ¹⁶ Ihcuac otiyahsique Roma, in tlayecanqui den soldados oquintemacti in presos in achto tlixpixqui. Huan Pablo oquicauque mamotepalui secnin ihuan se soldado aquin oquitzticatca.

Pablo tlanonotza ipan in altepetl de Roma

¹⁷ Huan satepa den yiyi tonali in Pablo oquinahuatic mahualacan in achtohque judeahtecus den altepetl Roma. Ihcuac omosentlalihque, oquiniluic:
—Nocnihuan, masque ahmo tlen oniquinchihuili in

totlacaicnihuan ica intlamachilis den tochichicacoluan, onechtemactihque iixpa in tequihuahaten romanohtecos nepa Jerusalén. ¹⁸ Ic nechchipahuilisque, yehhuan oquinequiyayahque nechcahcahuasque, tleca ahmo onechahxilihque niyan tlen tlahlacoli ic nechmictisque. ¹⁹ Huan inon totlacaicnihuan ahmo oquinejque manicahcahua, huan ic inon onictlahtlan manechixcomaca in hueyixtoc Augusto César, masque ahmo tlen ca ic niquinteluis. ²⁰ Ic inon onamechnonotz matimonohnotzacan, tleca ic nele nicchixtica ic techtiochihualos ijcon quen namochten. Ic inon nica niilpitoc ica in cadena.

²¹ Oncan oquiluihque:
—Tehhuanten ahmo tlen ticselihoque ica tehhuatl, niyan tlen amatl den tlali Judea, huan ahmo tlen techiluihque totlacaicnihuan aquin ohualahque de nepa. ²² Ticnequisque ticaquisque in tlen ticnehnehuilihtica tehhuatl, tleca ticmatihque nohuiyan ica tlahtohuahque ica inon yancuic tlanehnehuilistli.

²³ Ijcon tel, oquiluihque tlen tonali huan oahsitoque miyac tlacamen canin ocatca in Pablo. Huan de sancuel huan hasta tiotlac oquinnonotz ica in tetlatequiutilistzin Dios. Oquinequiyaya ijcon quinyolcuepas ica Jesús. Ijcon oquinnonotzayaya ica in itlanahuatil Moisés, huan ica tlen oquihcuilohque in tetlayolchicaucahuian de yihuehcau. ²⁴ Sequin

oquineltocaque in tlen in Pablo
oquihtohiticatca, huan oc sequinten
ahmo oquineltocaque.²⁵ Huan
quen ahmo quisematiyahue
ic yehhuanten, opeque yahue
sequin. Oncan Pablo oquiniluic:
—Yec inon tlahtoli oquimacaloc
in Isaías in Itiotonatzin Dios,
maquinilui in tochichicacoluan.²⁶ Ic
inon oquiluic:

Xiayu huan xiquinilui inon
tlacamen in tlen omihto in
Dios:

“Namehhuan nanquicaquisque
huan ahmo
nanquinehnehuilisque.

²⁷ Tleca nanyoltepitzautoque
huan ayacmo
nanquicaquisnequihque.
Huan ica tlen
onanquitaque, ahmo
onanquinehnehuilique,

ic nanmocuepacan huan
namechtlapohpoluini
namotlahtlacol.”

²⁸ Xicmatican namehhuan tel, de
axan inin tlamaquixtilistli den Dios
momachiltiyahue in aquin ahmo
judeahtecos, huan yehhuan ocachi
quicaquisque.

²⁹ Ihcuac Pablo oquihto inon,
oyahue inon itlacaicnihuan huan
tequin otahtolchiunque ica tlen
oquicajque.

³⁰ Huan Pablo omocau ome
xihuitle ipan in cali canin
oquitlanehuihtoya huan
oquinseliyaya nochin aquin
yahue quiita.³¹ Niyan aquin ahmo
oquitlacahualti huan ahmo ica
moucayotl oquinonotzayaya quen
quinteuiutilos in tlacamen in
Dios. Huan oquinextiliyaya ica
Totecohtzin Jesucristo.